

LUCAS-GAYABURBA-NUED

LUCAS

GEBE-SOGLENAID

Garda-nug

Lucas, ina-duled gued. We-dulede, Judío-dulesulid, degine, Jesús'ba nanadii gusadsurbalid. Lucas, we-garda Teófilo'ga narmaksad. Lucas, nuekwaa Jesús-nanasad-narmakega dulemar-Jesús-daksamaladse nue igar-amiar gusad, degine, e-uayagwar-ibmar-itosmaladse igar-amiar gusad.

Lucas, Pablo'ba arbas gusbalid. Degine, Lucas Gusmalad-Garda (Hechos) narmasgusbalid (Gusmalad 1:1; 16:11). Binsamardo, we-gardamar birga 63-68'gi narmakles-insaye.

Lucas-Gayayburba-Nuedgi weyob sunmaklenaid

We-gardagi, Bab-Dummad-Burba-Isligwaledba Lucas sogsado, we-Jesús'de, sanale dulega-gunoniye. Deginbali, Jesús gwen isgussurye, degi, bela dulemar-wiledakdii gusad. Lucas sogsabalid, Jesús, dulemar-isgued-anar nakrusgi-burgwega, we-napnegse noniki, adi, dulemar bela nabir abonolemalagar. Jesús, nakrusgi-burgwisgu, ibapaagi gannar durgusad.

We-gardagine, weyob ilemakar sunmaklenaid:

1. Lucas, Dummad-Teófilo'ga narmaksiid (1:1-4).
2. Juan-Bautista, degi, Jesús, bipigwaungudigusad (1:5-2:52).

- 2a. Baliwitur Juan-Bautista-gwalulegoedgi, degi, Jesús-gwalulegoedgi, sunmaksad (1:5-38).
- 2b. Juan-Bautista-gwalulesad (1:39-80).
- 2c. Jesús-gwalulesad (2:1-20).
- 2d. Jesús dungusad (2:21-52).
- 3. Jesús e-arbaed-imakesokalid (3:1-4:13).
 - 3a. Jesús-diigi-oglesad (3:1-22).
 - 3b. Jesucristo-e-dad-dummagan (3:23-38).
 - 3c. Jesús nega-dulesulidganba gudigusad (4:1-13).
- 4. Jesús, Galilea-yargi arbasad (4:14-9:50).
 - 4a. Jesús ibmar-imaksad (4:14-7:17).
 - 4b. Jesús, degi, Juan-Bautista (7:18-35).
 - 4c. Jesús-ibmar-imaksad, degi, ibmar-odurdaksad (7:36-9:21).
 - 4d. Jesús, Dule-Wargwen-Barmiledagoye (Cristo) soglesadid (9:22-50).
- 5. Jesús, Jerusalén'se nadapigusad (9:51-19:27).
- 6. Jesús, Jerusalén'gi gudigusad (19:28-21:38).
- 7. Jesús-wilegoed-ibagan (22:1-24:12).
 - 7a. Jesús nakrusgi-bioklesokalid-iba (22:1-62).
 - 7b. Jesús-wilesad, degi, e-burgwisad (22:63-23:56).
 - 7c. Jesús gannar-durgusad (24:1-12).
 - 7d. Jesús durgusad-sorba ibmar-imaksad (24:13-53).

Be itogua.

1. LUCAS, DUMMAD-TEÓFILO'GA NARMAKSIID

(1:1-4)

¹ Aisaar bukidar dulemar igar-napiragwad anmar-abargi-gusadi ilemakar-nasikoeyobi na binsasmalad. ² Igi gebesaila Jesús-sapingan na e-sunnad Jesús-daksamala, deyobi a-igargi anmar-odurdaksamarmogad. Ar Bab-Jesús we-dulemar e-igargi-sunmakega barmisgusad. ³ Dummad-Teófilo, nue an we-igargi ise-nergusmogad. Degisoggu, an dakdo, bur an bega Jesús-igar gebesaila-onoded-akar, nue ilemakar narmakergebe. ⁴ Adi, be nue-wisgumogagar Jesús-igargi-be-odurdaklesadi we napiragwadi, gakanisuli.

2. JUAN-BAUTISTA, DEGI, JESÚS, BIPIGWAUN-GUDIGUSAD

(1:5-2:52)

2a. Baliwitur

Juan-Bautista-gwalulegoedgi, degi, Jesús-gwalulegoedgi, sunmaksad

(1:5-38)

Baliwitur sogsa gusad, Diigi-dule-oged-Juan gwalulegoye

⁵ Deunni, Rey-Herodes, Judea-yargi negdakmaigu, dule-irwa-Bab-Dummadse-goled-wargwen, Abías'sikid mai-gusad. A-dulede, Zacarías'ye nugad, e-omedi Aarón-wagansikidid, Elisabet'ye-nugad. ⁶ Emide, ebobela, Bab-Dummad-asabin igar-innikigwadba damaladid. Bab-igar-uksadba, degine, Bab-Dummad-sogsadbali nanamalad-dulemalad. Agala, Bab-Dummad egi ibmar akarsoged sated. ⁷ Ar amarde, mimmi-satemalad, ar ade, Elisabet geg mimmi-baked, degine, bato amarde, seredgusmarbalid.

⁸ Ibagwengine, Abías-e-gwenadgansikmaladga Bab-Dummadse-goled-neggi-arbaega ibagan nonikid. Deunni, Zacarías Bab-Dummadse-goled-neggi dule-irwa-Bab-Dummadse-golega arbanonimogad. ⁹ Na gusgu igi dule-irwa-Bab-Dummadse-gormalad nugsalege, deyob Zacarías nugsalealid, adi, Bab-Dummadse-Goled-Neg-Islidikidgi dogegar, ina-wawadikid obupurmakegar. ¹⁰ Degin, ina-wawadikid-ogumaked-wachigi, deun bela-dulemar magaba Bab-Dummadse gorbukwa gusmalad.

¹¹ Zacarías, Bab-Dummad-Neg-Islidikidgi ina-wawadikid ogumaknaidgi, Bab-Dummad-baliwitur-wargwen, Zacarías'se ukiar magargunonikid. Ina-wawadikid-ogumakleged-ailanaba, argan-nuedsik gwichi dakalid. ¹² Zacarías, deyob Bab-Dummad-baliwitur-dakargu, gwakided, bela nue-dobee ito naded. ¹³ Ar baliwiturdi ega sogded: "Zacarías, melle be dobgu, ar Bab-Dummadse-be-goledi Bab-Dummad be-itosad, be-ome-Elisabet bega mimmi-wargwen-bakoedi, Juan'ye be onugsao. ¹⁴ Be mimmi-nikuoedba, be yeer itogoed, be weligwar itogoed, degin, be-mimmi gwalulenonikir, bukidar dulemar egi weligwar itomarmogoed.

¹⁵ "Ar be-mimmide, Bab-Dummad-asabin dule-dummadga guoed. Vino gobosulid, degi, inna-gagbid gobosurbalid. Degin, amba muu-neggi mai, bato Bab-Dummad-Burba-Isligwaled bela-bela nika guoed. ¹⁶ Deginbali, we-mimmi gannar Israel-dulemar Bab-Dummad-Jehová'ba-nanamalaga imakoed. ¹⁷ Ar be-mimmi-Juan, Elías'yobi Dule-Dummad-idu-

nadapi guoed. Deyob Bab-Dummad-Burba, degi, Bab-Dummad-gangued-nika guoed. Adi, babgan gannar na e-mimmiganbina itogerba guega, degi, dule-galagwensuli-gudimaladi dule-nueganga imakega, binsaed-nikaa damalaga, degi, guagwar dulemar-urbega, adi, Bab-Dummad-abingamalagar.”

¹⁸ Degi, Zacarías baliwiturga sogded:

—Degite we-deyob-guoedi, ¿igi-an wisguo-sunna? Ar ande seredgusad, an-omede bato seredgusmogad.

¹⁹ Baliwitur abin-imakdegu, ega sogded:

—Ani an Gabriel-gued, Bab-Dummad-asabin, Bab-Dummad-sogedba an ibmar imakega an gwichid. Ani an bega sunmakega, we-gayaburbanued-sogega an barmilealid. ²⁰ We-ibmar-an-bega-sogsad e-ibagan mosale, we deyob gunonikoed. Emide, be an-bengussoggu, geg bar sunmake be guoed. Be-mimmi-gwalulesad-sorba, geb be gannar sunna sunmake gunonibaloed.

²¹ Ar dulemardi, magaba Zacarías edarbebukmalad. Degi, ibiga Zacarías dikasurgus Bab-dummadse-goled-neg-islidikidyaba yoggumaiye binsaarmalad.

²² Zacarías agi noargu, geg emarga sunmake gusad. Agi magar daksamalad, we, Bab-Dummadse-Goled-Neg-Islikidigi wis ibya-apurus danikirgebye. Zacarías dulemarga sunmaksasulid, unnila argangi-oyogar emarga sunmaksad.

²³ Geb Zacarías, dule-irwa-Bab-Dummadse-goled-ibmar-imaked bergusgu, na e-negse nadsunnad. ²⁴ Geb a-ibagan-sorbali, e-ome-Elisabet gurgin-nika gunonikid. Agine,

Elisabet nii-walatar bar nossulid. Agi sokalid:
²⁵ “Bab-Dummad angi nabir binsanonikid. An mimmi-niksulidba dulemar-mer-bar-isdar-andakmalaga, aga anga mimmi-uknonikid.”

Baliwitur María’ga sognonikid, Jesús gwalulegoye

²⁶ Elisabet nii-walanergwagus (6) bonigwar gudiidgi, Bab-Dumjadi, Galilea-yarse, Nazaret-neggweburse, yagwa-gwensak María’ye-nugadse baliwitur-Gabriel-barmialid. ²⁷ A-yagwade, na José’ye-nugad-ebo-nikuega bato igar-nabogar gudiid. José’de Rey-David-wagwad. ²⁸ Baliwitur María-maidse dognonigu, ega sognonikid:

—¡Naa, degite! ¡Bab-Dummad begi nued binsasad! Bab-Dummad beba gudiguad. Baigan-omeganba Bab-Dummad bur nued begi binsasad.

²⁹ María’di baliwitur-dakargu, ibmar-ega-sogedba dobe-itoded, binsaded, wede, baliwitur weyob anse gornonikid ibi obarsunye. ³⁰ Degi, baliwitur ega sogdesunnad:

—María, mer be dobgu, ar Bab-Dummad nabir begi binsasad. ³¹ Emigindi, be gurgin-nika gunonikoed, mimmi-gwensak be nikuoed, Jesús’ye a-mimmi be onugsaoed. ³² We-mimmide dule-dummadga guoed, Bab-Dummad-Bur-Birigined-e-Machiye soglegoed, degine, Bab-Dummad, igi epenne Rey-David, reyga-mesisgusa, deyobi Bab-Dumjadi Rey-David-e-wagwa-imakmogoed. ³³ Degine, we-Jesús, Jacob-dulemar-negsemai degisadegu guoed. E-negsemai-guoeni gwen berguosulid.

³⁴ Geb degi, María, baliwiturga sogded:

—¿Ar wede igi guosunna? Ar amba an yagwad.

³⁵ Baliwitur, María'ga sogded:

—Bab-Dummad-Burba-Isligwaled begi aidenonikoed. Bab-Dummad-Bur-Birigined-e-gangued be-edunonikoed. Degisoggu, Dulegwage-islidikid-gwalulegoedi, Bab-Dummad-Machiye soglenonikoed. ³⁶ Degine, be-gwenad-Elisabet, bato seredgusadgi, geg mimmi-bakye-enik sogmaladi a-bela gurgin-nika gunonikid. Emide, nii-walanergwagus (6) gurgin-nika gudiid. ³⁷ Ar ade, Bab-Dummadgardi ibmar-geg-gudeeye soglesulid, bela ega ibmar guedbiid.

³⁸ Geb degi, María sogdesunnad:

—Andi, Bab-Dummad-e-mai gued. Be-sogedba be anga imakdo.

Degi, baliwitur, María'gi banguded.

2b. Juan-Bautista-gwalulesad

(1:39-80)

María, Elisabet'se atakapid

³⁹ A-ibagangi, María, Judea-yalaganba neggwebur-gwagwense gwae nade gusad.

⁴⁰ Zacarías-negse dogdapgu, Elisabet'se gordapid.

⁴¹ Elisabet, María-ese-gole-itosgu, dule-e-sapi-dukugi-maid ber dulagwar itoded. Degi, Elisabet bela-bela Bab-Dummad-Burba-Isligwaled-nika gunonikid. ⁴² Elisabet binnasur goted, sogded:

—Baigan-omeganba bur nued Bab-Dummad begi binsasad, be-dula-sapi-dukugi-maidgi bur-nued binsasbalid. ⁴³ Ar wede, ¿ibiga weyob angi nued binsalesa, emide, an-Dummad-e-nan anse ataknonigu?

44 "Be anse gornonikid-itodeyalaba, an-sapi-dukugi-maid weligwar-itogedba ber dulagwar itoded. 45 Be we-ibmar bengussulidba begi nued-binsalesad. Ar Bab-Dummad-bega-ibmar-sogsadba we-ibmar bela bega guoed."

María-namaksad

- 46 Geb degi, María, sogdemogad:
 "An-ulub-akar Bab-Dummad-nug an odummo-sun.
- 47 An-burba, Bab-Dummad-an-abonogedgi weligwar itosun.
- 48 An e-mai-bundor-binsaled-inigwele, Bab-Dummad an-sunonikid, nued angi binsanonikid, emigindi, bela dulemar angi sogmaloed, nued-egi-binsalesad-duleye.
- 49 Bab-Dummad-Bela-Gangued-Nikadi, anga ibmar-dummagan imaksad, e-nug, Isligwaledye nugad.
- 50 Bab-Dummad dulemar-e-dobee-nanadimalad wile daked, degine, a-e-waganse-bakar, wiledakdii sadeguoed.
- 51 Bab-Dumjadi, e-gangued na e-ardaedgi oyosad, dulemar-na-san-dummarba-imakdimalad-osulosad.
- 52 Bab-Dumjadi, dule-dummagan-negsemamaid-obelosad. Dulemar-na-san-bipi-imakdimalad-odummosad.
- 53 Degine, dulemar-ukumesdimaladga ibmar-bukidar uksad.

Degine, dulemar-mani-ibgan, ibmar-sate barmisad.

54 Bab-Dummadi, e-mai-Israel-dulamar-bendaksad, amar-wile-daked gwen iessulid.

55 Bab-Dummadi deyob anmar-dad-Abraham'ga sogsad, degi, e-waganga sogsagusad, e-wiledaked degisadeguoye.”

56 María, Elisabet-walik nii-walapaa megialid, geb a-sorba María, na e-negse gannar aligusad.

Diigi-dule-oged-Juan-gwalulesad

57 Elisabet e-ibagan warmaknonigu, mimmi-nikunonikid, susugwa ega uklenonikid. 58 E-neg-dikarba-mamaid, degine, e-gwenadgan itoarmargu, Bab-Dummadi Elisabet'gi nabir binsasye, degi, nue wile daksaye, Elisabet'ba wergusarmogad.

59 Geb ibabaabakgine (8), susugwa-gwalulesad-sorba, e-abgan-uka-duku-sikega, Moisés-Igar-Maidba-imakega, senonimalad. Degine, e-bab-Zacariás'ba mimmi-nug-imakbiguarmalad. 60 Ar e-nandi, weyob sokalid:

—Suli. Deyob-nugguosuli. Juan'ye nugguoe.

61 Elisabet'ga sogdemalad:

—¿Ibiga deyob be onugsabie? Ar be-gwenadgande deyob nugsurmalad.

62 Geb e-babse argangi-sunmakar egichiar-malad, goe igi-onugsaoye.

63 Zacariás urgo-bipigwa egichisad, agi susugwa-nug narmaksad. Juan'ye nugguoye sogsad. Bukmaladi bela geger itoarmalad,

wede ibiga deyob onugsabie. ⁶⁴ Geb a-gines, Zacarías gannar nabir sunmakded. E-gwabin-bipinmakdegu, Bab-Dummad-nug ogannoded.

⁶⁵ Bela-e-neg-dikarba-mamaid dobe itonadmalad. Bela Judea-yalaganba we-ibmar-deyob-gusadi gaya mimileded. ⁶⁶ Ar dulemar deyob bela-we-gayagan-itoarmalale, na e-gwagegi binsadmalad, sogdemalad: “Ar we-mimmide, ¿doa-dulega guosunna?” Ar dulemar bela wismalad, we-mimmibali Bab-Dummad-gangued gudii.

Zacarías, ibmar-guoed sogsad

⁶⁷ Juan-e-bab-Zacarías, Bab-Dummad-Burba-Isligwaled bela-bela nika gunonikid. Bab-Dummad-nuggi sunmakdesunnad, sogded:

⁶⁸ “Israel-dulemar-e-Bab-Dummad-nug odummomarsun,
ar ade, e-dulamarse na ataknonikid,
degine, isguedgine, e-dulamar-onononikid.

⁶⁹ Bab-Dumjadi, e-mai-David-wagwa anmarga barmialid.
Bab-Dumjadi, anmar-Abonoged-gandikid
anmarga ogwisnonikid.

⁷⁰ Ar igi gebesaila anmarga e-gayaburba-barsogmalad-islidikmaladba-sunmaksa,
deyob gusad.

⁷¹ Isdar-anmar-dakdimaladgi, degi, sae-anmar-dakdimaladgi
anmar-bendakoye sogsad.

⁷² Adi, Bab-Dummad anmar-babgan wile dakegar.
Degine, amar-ebo-igar-islidik-mesisad ebin-saegar.

- 73 Bab-Dummad na e-nuggi anmar-dad-Abraham-
ebo
napiragwadgi igar-mesisadi,
ede, imakedseye sogsad.
- 74 Bab-Dummadi isdar-anmar-dakdimaladgi
anmar-onogoye sogsad,
adi, dobsuli anmar ega arbaegar.
- 75 Bab-Dummadga nue-gwage-islidikidgi, degi,
nue-napiragwadgi
burgwedse anmar ega arbadii guegar.
- 76 "Mimmi, bedina,
Bab-Dummad-Bur-Dummad-e-gayaburba-
barsogedye be bilegoed.
Ar bede, Dule-Dummad-barmiledagoye-
sogsad-idu, igar-mayega nadapi guoed.
- 77 Be abonoged-igargi e-neggwebur-odurdakega
be guoed.
Adi, Bab-Dummad dulemarga isgumalad-
eliegar.
- 78 Ar anmar-Bab-Dummadi ise-wile-anmar-
dakedba, neg-meegwadyob anmarga dule-
barmialid.
A-dule, nibneg-akale, dad-nakwedanikiyobi
danikid.
- 79 Adi, negsichidgi-bukmalayobid, Bab-Dummad-
akudakmalad, gwallu-mee-imaklegeyobi,
Bab-Dummad-magar dakegar.
Degi, dule burgwileged-dobmalad ega osulogegar.
Degine, igar-bogidikidba anmar-niegar."
- 80 Degine, mimmi dungumai, e-burba gangu-
mai gusad. Juan, Israel-dulemarga Bab-Igargi-
sunmakdedse nega-dulesulidganba gudii gusad.

2 2c. Jesús-gwalulesad

(2:1-20)

(Mateo 1:18-25)

¹ Amba yoo Jesús-gwaluleged-idu, deun Augusto-César saila-dummadga Roma'gi maigu, igar mesialid, bela-dulemar-bukwad ebisoye, igi mergudibeye. ² Deun, Cirenio, Siria-yargi dummadga negdakmaiun, dule-ebisleged gebe imaklesad. ³ Bela ebislemalagala na e-neggwebur-e-neggweburse nadegusmalad.

⁴ José, Galilea-yargi, Nazaret-neggweburgigudii Judea-yarse, Rey-David-neggweburse, Belén'ye-neg-nugadse aligusmogad. Ade, José, David-e-wagwad, aga Belén'se nonigusad. ⁵ Adi, a-neggweburgi e-ome-María'mala ebislegegar. Deun bato ebo nikuoye igar-maid. Degine, deun María bato gurgin-nika gudiid.

⁶ Belén-neggweburgigudimaladgine, María'ga nagued-ibagan warmaknonikid. ⁷ Degine, gebe ega susugwa uklenonikid. Geb samorgi-obirmas, moli-omaed-urgi mimmi-mesisad, ar ade, emarga gabedneg sate gusad.

Baliwiturmar sognonikid, Jesús gwalulesye

⁸ Deun, a-ibagi Belén-neggwebur-dikarba, sibad-wawaad-edarbemalad, e-sibad-wawaad mutik edarbebukwa gusmalad. ⁹ Agine, Bab-Dummad-e-baliwitur-wargwen ukiar amarse nonikid, degine, Bab-Dummad-e-yeerdaklegedi bela emar-ebilis ibegwar ganonikid. Degidbali, sibad-wawaad-edarbemaladi nue dobe itoarmalad. ¹⁰ Ar baliwiturdi amarga sogded:

—Mer be dobgumar, ar bemarga gayaburbanned, bela dulemar-weligwar-saed an sedanikid.

¹¹ Rey-David-gwalulesad-neggweburgi, Belén'gi, emi-ibagi bemarga Cristo gwalulesad. A-dule, Dule-Abonogedid, Dule-Bur-Dummadid, Bab-Dummad-dule-wargwen-barmidagoye-sogsad-duled. ¹² Magar be itomalagala, weyob-mai be dakdapmaloed: Mimmi samorgi-anwar moli-omaed-urgi mai be dakmaloed.

¹³ Degine, ukiar, baliwitur-abargi bukidar baliwiturmar-nibnegginmalad-baigan, Bab-Dummad-nug ogannonanai daklealid. Weyob sognanaid:

¹⁴ “Nibneggi bela-bela Bab-Dummad-nug odum-momarsun.

Dule-nuegangi-yeer-binsalesmaladga, we-napneggi neg-bogidikid nagusun.”

¹⁵ Degine, gannar baliwiturmar nibnegse nad-margu, sibad-wawaad-edarbemalad na ga sokar-malad:

“Anmar Belén-neggweburse nae. Neg-gusad anmar daknae. Ar Bab-Dummad anmar-owisosad.”

¹⁶ Degisoggu, gwae-gwae armarsunnad. José, María'bo sii, degi, mimmidi, moli-omaed-urgi mai daknonimalad.

¹⁷ Deyob daksamargu, sibad-wawaad-edarbemaladi, baliwiturmar-ega-mimmigi-sunmaksadba, dule-baiganga sogssamalad. ¹⁸ Ar bela-dulemar sibad-wawaad-edarbemalad-ibmar-sogedi, geger itosmalad. ¹⁹ Ar María'di, bela na e-gwagegi wargwen sedii gusad, agi binsadii gusad.

²⁰ Ar sibad-wawaad-edarbemaladi, ega-ibmar-soglesadba-ibmar-gusadi bela-daksamalad, degi,

bela itosmalad. Degidbali, gannar armargu, Bab-Dummad-nug-odummodani, degi, ogannodani gusmalad.

2d. Jesús-dungusad

(2:21-52)

Jesús Babse-goled-negse seleapid

²¹ Jesús ibabaabakgus (8) gwalulesadgi, Judío'mar-igar-maidba imakegala, e-abgan-ukaduku siksamalad. Jesús'ye onugsasmalad. Ar igi baliwitur amba yoo María gurgin-nikued-idu ega sogsagusa, aba deyob onugsasmalad.

²² Moisés-Igar-Mesisadba na san-uruked-ibagan-imaked-bergusmargua, José, María-ebo, Bab-Dummadga Jesús-ukega Jerusalén'se Jesús-senonimalad. ²³ Ar igi Bab-Dummad-igargi narmakar mai:

“Ar gebesaila machigwa-inse nangi aidenonikile,
Bab-Dummadga be ukoed,
adi, unnila egadga guegar.”

Éxodo 13:2, 12

²⁴ Degine, Bab-Dummad-gardagi narmakar-naibalid, Bab-Dummadga we-ibmar-ukoye:

“Sapur-nuu-gwabodibe,
wagnuu-mimmigan-gwabodibe.”

Levítico 12:8

We-igar-maidba imakegala, na
nonimalad.

²⁵ A-ibagangine, dule-wargwen, Simeón'ye-nugadi, Jerusalén'gi gudigusad. A-dulede, dule-gwage-nuedid, Bab-Dummad-dobee-nanadiidid, na Israel-bendakleged-edarbedimogad-duled. Bab-Dummad-Burba-Isligwaled a-duleba gudiguad. ²⁶ Bab-Dummad-Burba-Isligwaledi

Simeón'ga sogsad: “Be burgosurye, Bab-Dumjadi, dule-wargwen-barmidagoye-sogsadi be dakedsegoye.”

²⁷ Geb Bab-Dummad-Burba-Isligwaled-sogedba, Simeón Bab-Dummadse-goled-negse nonikid. José, María-ebo Moisés-Igar-Maidba-imakegala Bab-Dummadse-goled-negse mimmi-Jesús-senonimalad. ²⁸ Agine, Simeón na e-swidagi mimmi-mesisgua, Bab-Dummad-nug-odummoded, weyob sogded:

²⁹ “Bab-Dummad-Bela-Negsemaid, an be-mai gued.

Emigindi, be-ibmar-sogsadyob, bogidikidgi be an-sedsun,

³⁰ ar ade, an-ibyangwar Bab-Dummad-dule-abonogoed-barmialid an daksad.

³¹ Bab-Dummad, we-mimmi, dulemar-bukwad-abargi

be guagwar barmialid.

³² Dulemar-yar-baid-baidgi-bukmaladga neg-meegwadga guoed.

Degi, we-mimmi, Israel-dulemarga gandikidba-be-nug-odummogedga guoed.”

Isaías 42:6; 49:6

³³ José, degi, María, Simeón-Jesús'gi-ibmar-sognaid geger itomalad. ³⁴ Geb degi, Simeón,

José'ga, degi, María'ga sogsagu, Bab-Dummad begi nued binsaoye. A-sorbali, mimmi-e-nan-María'ga sogded:

—We-mimmi sulesad, Israel-yargi dulemar-dummagan-bukidar onogegar, degi, dulemar-binsarmalad dummaganga imakegar. We-mimmi Bab-Dummad-wilubga guega nonikid,

oyogegar, Bab-Dummad sunna nabir dulemar-abonoye. Ar degi-inigwele, dulemar-bukidar mimmi-abingaosurmalad. ³⁵ We-mimmiba bukidar-dulemar-gwage-binsananaid magar daklegoed. María, ar begardi be-san-burbagi es-suid-yolenaiyob be nunmak itogoed.

³⁶ Agine, Bab-Dummad-gayaburba-barsoged-bundor Ana'ye-nugadi, Bab-Dummadse-goled-neggi gudimogad. A-omede, Faniel-sisgwad, Aser-e-wagansik danikidid. Ana'de bato nue-seredgusad. Unnila birgagugle (7) sui-nika gudigusad. ³⁷ Emide, birga-dulabake-gakabake (84) nikad. A-mukwade Bab-Dummadse-goled-neggi gudigudaed, gwen nodisulid. Ibginedba, degi, mutikidba Bab-Dummadse gordii, degi, Bab-Dummadse-golega mas-gunsuli gudidaed.

³⁸ Simeón deyob sunmakgwichidgi, Ana nonimogad. A-mukwa, Bab-Dummadga Jesús'gi dog-nuedye sogsagusad. Degi, Ana bela Jerusalén'gi dulemar-Bab-Dummad-abonogoed-edarbedimaladga mimmigi sunmakdedaed.

Jesús gannar Nazaret'se nonikid

³⁹ José, María-ebo bela Bab-Dummad-Igar-Maidba ibmar-imaksad-sorba, gannar Galileayarse na e-neggwebur-Nazaret'se-nonimalad.

⁴⁰ Degine, mimmidi dungumai, gangumai, degine, nue-binsaed-ibed-gumai gusad. Ar Bab-Dummad a-machi-bipigi nue nabir binsadii gusad.

Jesús, Babse-goled-neggi gudigusad

⁴¹ Birga-irba Jesús-e-babgan, Oburgwilegoenad-Iba-daknaega Jerusalén'se naddamalad. ⁴² Jesús

birgambe-gakabo-nikadgi (12), e-babganba Jerusalén'se nadmogad.

⁴³ Ibamar-bergusgu, Jesús-babgan gannar Nazaret'se armargu, machigwa-Jesús'di Jerusalén'gi besad. José, degi, e-nan-María'di Jesús-besad wissurmalad. ⁴⁴ E-babgandi, dulemar-danar-danimaladba Jesús daniye bimalanad. Ibagwengus-nanaedgine e-gwenadgan-abargi, degine, mag-dakmalad-abargi Jesús-amiarmalad, gwen amissurmalad. ⁴⁵ Ar amissurmarsoggu, gannar Jerusalén'se Jesús-aminonimalad.

⁴⁶ Geb ibapaagine amidapmalad. Bab-Dummadse-goled-neggi, Moisés-Igar-Mesisad-nue-wisimalad-abargi-sii, amar-itosii, degi, amarse ibmar-egichii dakdapmalad. ⁴⁷ Ar itobukmaladi bela geger dakmalad. Nue-ibmar-wisi Jesús-dakmalad. Degine, nue-imas Garda-Narmaked-Dulemar-abin-imake dakmarbalid.

⁴⁸ E-babgan, dummagan-abargi-sii Jesús-dakarmargu, geger dakarmalad. E-nan Jesús'ga sogded:

—Machi, ¿ibiga we deyob be anmar-imaksa? Emide, an be-babmala surbinsa bebina mia-makdimalad.

⁴⁹ Geb degi, Jesús ega sogded:

—¿Ar ibiga be an-amidimala? ¿Ar be wissurmarsi an-Bab-arbaedgi an arbaergebed?

⁵⁰ Ar e-babgandi, Jesús-ega-ibmar-sogedi magari-itossurmalad.

⁵¹ Jesús e-babganba gannar arsunnad, Nazaret'se nonisunnad. Jesús na e-babgan-sogedba gudigussunnad. Ar e-nandi bela we-

ibmarmar na e-gwageginbi sedii, egi binsadii gusad.

⁵² Ar Jesús'di ibmar-nue-wisidgi, e-dunguedgi, degine, Bab-Dummad-nue-nabir-egi-binsaedgi, degi, dulemar-nued-egi-binsaedgi, dungumai gusad.

3. JESÚS E-ARBAED-IMAKESOKALID

3

(3:1-4:13)

3a. Jesús-diigi-oglesad

(3:1-22)

Diigi-dule-oged-Juan Bab-Dummad-igargi sunmaksad

(Mateo 3:13-17; Marcos 1:9-11)

¹ Birgambe-gakatargus (15) Tiberio-César Roma'gi-negdakmaidgi, Poncio-Pilato deun Judea-yargi dummadga maid. Degi, Herodes Galilea-yargi dummadga maimogad, e-urba-Felipe Iturea-yargi, degi, Traconite-yargi dummadga maimogad. Degine, Lisantias, Abilinia-yargi dummadga maimogad. ² Deunni, Anás, Caifás-ebo dule-irwa-Bab-Dummadsegoled-bur-dummadga maimogad. A-ibagangine, Bab-Dummad Zacarías-machi-Juan'se gornonikid. Deun, Juan nega-dulesulidganba gudiid.

³ Juan bela Jordán-diwar-dikarba-neggwebur-bukmaladse nadegusad. Dulemarga Bab-Dummad-diigi-ogleged-igargi sunmakdii gusad, degi, na e-ismaladga bukib-binsamarye sogdii

gusad. Adi, e-daed gwagmalagar, adi, isguedgi abonolemalagar.

⁴ Epenne Bab-Dummad-gayaburba-barsoged-Isaías, Juan'nik weyob narmaksagusad, deun sogsagusgu:

“Dule-wargwen nega-dulesulidganba binnasur sunmaknonikoed,
dulemarga sognonikoed:
'Dule-Dummad-idu igar-mayemar,
igar-swilidik mesmar.

⁵ Bela nebagan swilidik guoed,
yarmala, degi, neg-mullugana, omatolegoed.
Igar-bire-bire-mamaid innikii imaklegoed,
igar-muru-muru-mamaid oswirmakle-
baloed.

⁶ Bela dulemar Bab-Dummad-abonoged-wisgumaloed.' ”

Isaías 40:3-5

⁷ Dulemar-bukidar Bab-Dummad-diigi-ogleged-igar-imakega Juan'se duurmaknonidamalad. Juan amarga sogdedaed: “¡Ar bemar naibe-bulegan-mimmiganyob gumalad! ¿Ar doa Bab-Dummad nue-urwe-danikoed-idu-wakinned bemar-odurdaksa? Bab-Dummad-diigi-oglegedgi bemar nuguosurmalad. ⁸ Degisoggu, be-daedgine na be oyomar, bemar nue-gwagsamalad, be-isguedga na be bukib binsasmalad.

”Mer unnila na be sogmalo: ‘Anmar Abraham-wagan gumarye. A-ulale, Bab-Dummad anmargi nabir binsaergebye.’ Suli, degisuli. Ar be Abraham-wagwasulile, akarsulid, ar Bab-Dummad sunna we-akwamar Abraham-waganga imaked.

⁹”Deginbali, ar bato akan guar sapi-maligi yoid. Ar degisoggu, sapi nue sanmaksulile, a-sapi sikle-goed, ogumaklegega soogi melledoed. Deyob Bab-Dummad dulemar-imakmogoed.”

¹⁰ Ar degi, dulemar Juan’s e egichiar dasunnad, ega sogdedamalad:

—Degite, ¿ibu anmar imakmarsunnoe?

¹¹ Juan, abin-imakdegu, sogded:

—Dule suba-gobo nikale, dule-subasulidga gogwen ukmogo. Amba deyob masgunneddik imakbaloed.

¹² Roma-dummadga-mani-gaedgi-arbamaladi, Bab-Dummad-diigi-ogleged-igar-imakega Juan’s e nonimarmogad. Amar ega sogdemarmogad:

—Odurdaked-saila, ¿anmardi ibi imakmarmogoe?

¹³ Juan amarga sogded:

—Melle dulemargi wilub-obichaa be mani gamalo, ar unnila bemarga igar-uklesadba be mani gamaloed.

¹⁴ Degine, suar-ibmala ese egichiamarmogad:

—Anmardi ¿ibi imakmarmogoe?

Juan, abin-sogded:

—Mer emar-annik gannadba mani suo, degine, mer binsa aimar-ogakansao. Ar bema na bebennuklegedgi, gusbin be itomalo.

¹⁵ Dulemar Juan-sunmaked-itobukmaladi Cristo-edarbebukmarsoggu, na e-gwagegi binsabukmalad, we-Juan, Cristo-sogeye. Cristo sogleged, Bab-Dummad-dule-wargwen-barmidagoye-sogsad-duleye. ¹⁶ Juan abin-imakdegu, bela dulemarga sogded: “Ar andi, Bab-Dummad-diigi-ogleged-igar-imakedid. Unnila

diigi an emar-ogdiid, ar dule-baid-danikoeddi, ar bur anba dule-dummadid. Ar e-sapat-dubsebakar, geg an ei esiked. Ar a-duledi, Bab-Dummad-Burba-Isligwaledgi, degi, soogi beognonimaloed.

¹⁷ "Igi dulemar oros-gwag egwamala, deyob, a-dule, oros-gwag-egwaega bato guagwar e-argangi bigbi-gani gwichid. Degi, oros-gwag-nued e-urbed-neggi nue urboed, e-ukadi soogi ogumakoed. Ar we-soode, geg soo-ginnedid, degi-gasii-sadeguad-sood." We sogledo, dule-dummad oros-gwagyob dulemar-imaknonikoye.

¹⁸ Weyobi, Juan bukidar dulemar-unadii gusad, Bab-Dummad-Gayaburba-Nuedgi dulemarga sunmakdii gusad.

¹⁹ Herodes dummadga-maigu, e-urba-Felipe-ome-Herodías'ye-nugad-nikusad-ular, degi, bela-ibmar-iskanamar-imaksad-ular, Juan sabsur Herodes'ga ibmar sogsad. ²⁰ Ibmar-baid-iscana imaksadbali, Herodes esgaryagi Juan-meted.

Diigi-dule-oged-Juan, Bab-Dummad-diigi Jesús-ogsad

(Mateo 3:13-17; Marcos 1:9-11)

²¹ Degidgine, bela dulemar Bab-Dummad-diigi-ogleged-igar-imaknanaigua, Jesús Bab-Dummad-diigi-ogleged-igar imaksamogad. Jesús Bab-Dummadse gotegu, nibnega argade gusad.

²² Jesús'gi Bab-Dummad-Burba-Isligwaled sanale, nuuyobi aidenonikid, degi, nibneggi gayaburba gollar gusad, sogded:

"Be An-Machi-sabed-sunnad gued. An beba weligwar itoged."

3b. Jesucristo-e-dad-dummagan

(3:23-38)

(Mateo 1:1-17)

²³ Jesús na e-arbaed imakdegu, deun birgadurgwen-gakambe (30) nikad. Jesús, José-e-machiye bimalanad. Jesús-e-dad-dummagan, wemalad:

José, Elí-machi.

²⁴ Elí'di, Matat-machid.

Matat'di, Leví-machid.

Leví'di, Melqui-machid.

Melqui'di, Jana-machid.

Jana'di, José-machid.

²⁵ José'di, Matatías-machid.

Matatías'di, Amós-machid.

Amós'di, Nahúm-machid.

Nahum'di, Esli-machid.

Esli'di, Nagai-machid.

²⁶ Nagai'di, Maat-machid.

Maat'di, Matatías-machid.

Matatías'di, Semei-machid.

Semei'di, José-machid.

José'di, Judá-machid.

²⁷ Judá'di, Joana-machid.

Joana'di, Resa-machid.

Resa'di, Zorobabel-machid.

Zorobabel'di, Salatiel-machid.

Salatiel'di, Neri-machid.

²⁸ Neri'di, Melqui-machid.

Melqui'di, Adi-machid.

Adi'di, Cosam-machid.

Cosam'di, Elmodam-machid.

Elmodam'di, Er-machid.

²⁹ Er'di, Josué-machid.

Josué'di, Eliezer-machid.
Eliezer'di, Jorim-machid.
Jorim'di, Matat-machid.
³⁰ Matat'di, Leví-machid.
Leví'di, Simeón-machid.
Simeón'di, Judá-machid.
Judá'di, José-machid.
José'di, Jonán-machid.
Jonán'di, Eliaquim-machid.
³¹ Eliaquim'di, Melea-machid.
Melea'di, Mainán-machid.
Mainán'di, Matata-machid.
Matata'di, Natán-machid.
³² Natán'di, David-machid.
David'di, Isaí-machid.
Isaí'di, Obed-machid.
Obed'di, Booz-machid.
Booz'di, Salmón-machid.
Salmón'di, Naasón-machid.
³³ Naasón'di, Aminadab-machid.
Aminadab'di, Aram-machid.
Aram'di, Esrom-machid.
Esrom'di, Fares-machid.
Fares'di, Judá-machid.
³⁴ Judá'di, Jacob-machid.
Jacob'di, Isaac-machid.
Isaac'di, Abraham-machid.
Abraham'di, Taré-machid.
Taré'di, Nacor-machid.
³⁵ Nacor'di, Serug-machid.
Serug'di, Ragau-machid.
Ragau'di, Peleg-machid.
Peleg'di, Heber-machid.
Heber'di, Sala-machid.

36 Sala'di, Cainán-machid.
 Cainán'di, Arfaxad-machid.
 Arfaxad'di, Sem-machid.
 Sem'di, Noé-machid.
 Noé'di, Lamec-machid.
 37 Lamec'di, Matusalén-machid.
 Matusalén'di, Enoc-machid.
 Enoc'di, Jared-machid.
 Jared'di, Mahalaleel-machid.
 Mahalaleel'di Cainán-machid.
 38 Cainán'di, Enós-machid.
 Enós'di, Set-machid.
 Set'di, Adán-machid.
 Adán'di, Bab-Dummad-machid.

4 3c. Jesús nega-dulesulidganba gudigusad

(4:1-13)

*Jesús, nia-sailase wilubdaklesad
(Mateo 4:1-11; Marcos 1:12-13)*

¹ Jesús, Bab-Dummad-Burba-Isligwaled nue-nikagudii, Jordán-diwargi banguded. Geb degi, Bab-Dummad-Burba-Isligwaled nega-dulesulidganba Jesús-sesa gusad. ² Agi ibadulabo (40), nia-saila Jesús-wilubdakdii gualid. A-ibagangine, Jesús mas-gunsuli gudigusad, degisoggu, ukudmaada itoalid. ³ Agi Jesús'ga nia-saila sokalid:

—Ar be Bab-Dummad-Machi-sunnadiile, we-akwaga be soge: 'Maduga be binyeye.'

⁴ Jesús, abin-imakdegu, nia-sailaga sogded:

—Noar be soge, ar Bab-Dummad-gayaburbagi weyob narmakar naid:

‘Dule maduginbi dula-gudii guosulid,
[bela Bab-Dummad-gayaburba-itogedgi dula
gudigubaloed].’

Deuteronomio 8:3

⁵ Geb degi, nia-saila yar-matusulidse Jesús-sesad. Agi belagwable-napneg-naid-ugakse ega ukiagwar ilagwen-oyoar imaksad. ⁶ Agi nia-saila Jesús’ga sokalid:

—We-neggweburmar-an-bega-oyosadi bela e-ganguedi, degi, e-gandikidba-yeerdaklegedi an bega ukoed. Ar bela we-neggweburmar anga uklesad. Degisoggu, ar doaga an ukbie, an aga ukoed. ⁷ Degisoggu, be an-asabin Bab-Dummadyob an-nug-odummogega yokorgi sindigar sigele, we-neggweburmar bela begadga guoed.

⁸ Jesús, abin-imakdegu, sogded:

—Nia-saila be angi bangu. Ar Bab-Dummad-Gardagi weyob narmakar naid:

‘Bab-Dummad-be-Dummad-e-nug be odummodii nanao.

Unnila agarbi be ibmar imako.’

Deuteronomio 6:13

⁹ Geb degi, nia-saila Jerusalén’ses Jesús-sesbalid, Bab-Dummadse-goled-neg-uas-birgi ogwisdapid. Geb Jesús’ga sogded:

—Ar be Bab-Dummad-Machi-sunnadiile, nase be ichomakdo. ¹⁰ Ar Bab-Dummad-Gardagi weyob narmakar naid:

‘Na e-baliwiturmar be-edarbega bega barmida-goed,

e-argangi be-gamalagar.

¹¹ Adi, melle be akwagi gowarmakegar.’

Salmo 91:12

¹² Jesús, abin-imakdegu, sogded:

—Nabir be sogendo, ar Bab-Dummad-Gardagi weyob narmakar sognaibalid:

‘Melle Bab-Dummad-be-Dummad, be wilubdako.’

Deuteronomio 6:16

¹³ Ar nia-saila bela Jesús-wilubdaked bergusgua, sikwas wis egi bangud gusad.

4. JESÚS, GALILEA-YARGI ARBASAD

(4:14-9:50)

4a. Jesús ibmar-imalsad

(4:14-7:17)

Jesús na e-ARBADedgi onoded

(Mateo 4:12-17; Marcos 1:14-15)

¹⁴ Jesús gannar Galilea’sé nonigu, nue Bab-Dummad-Burba-IsliGWaled-gangued-nikadba nonikid, degi, bela neggweburmar-dikarba-bubukwad Jesús-ibmar-imakdiid wisguarmalad.

¹⁵ Jesús, Judío’mar-onmakedneggi dulemar-odurdakdii gualid. Bela Jesús-nug-odummogedbi gusmalad.

Jesús, Nazaret’gi gudigusad

(Mateo 13:53-58; Marcos 6:1-6)

¹⁶ Jesús Nazaret-neggweburse nonikid, ar ade, agi dungusadid. Obunnoged-ibagi, Jesús na gusgu e-daedba Judío’mar-onmakednegse dogdapid. Agi Bab-Dummad-Garda-absogega gwisguded.

¹⁷ Ar ade, Jesús’ga Bab-Dummad-gayaburba-barsoged-Isaías-narmaksad uksamalad. Jesús a-garda-egasgu, weyob-narmakar-naid absoded:

¹⁸ “Bab-Dummad-e-Burba angi maid.

Ar ade, dule-wilemaladga gayaburba-nuegangi-sunmakega, Bab-Dummad an-susad.

Bab-Dummad an-barmialid:

Dule-gwage-nunmak-itodimaladga gwage-armakegar.

Dule-galesbukmaladga binnasur sogegar, bemark ainimarye.

Dule-ibyasuli-gudimaladga ibya-egaegar.

Dule-mesagwar-gudimalad-ollor-imakegar.

¹⁹ Bab-Dummad-e-birga-nuedgi sunmakega, an-barmialid.”

Isaías 61:1-2

²⁰ A-sorba, Jesús Bab-Dummad-Garda-obipirmasgu, Judío'mar-onmakednegdaked-dulega garda-uksagu, sigisad. Agi-bukmalad bela Jesús'ginbi atakbukwa gusmalad. ²¹ Geb degi, Jesús sogded:

—Emi-ibagi, bemark-abargi we Bab-Dummad-Gardagi-narmakar-naid sanar-gunonikid.

²² Bela-dulemar-bukmaladi, Jesús'gi nuedbi sunmakedbimalad. Geger dakmalad, ibiyobi Jesús yeer sunmake. Degine, sogdemalad:

—¿Ar wede, José-machisursi?

²³ Jesús amarga sogded:

—An wisi, wegi-sogleged be anga sogdamaloed: 'Ina-duled, na be dukin san nudake, adi, be anmarga nue-ibmar-wisid oyogegar. Ar Capernaúm-neggweburgi bukidar ibmar-imaksaye anmar be-itosmaladi, wegi be-neggweburgine be imakmoga.'

²⁴ Degi, Jesús sogdebalid:

“Napira an bemarga soged, Bab-Dummad-gayaburba-barsoged-wargwensaar na e-neggweburgi geg e-nug odummoleged. ²⁵ Napira an bemarga soged, deunni, Elías-ibagangi, bukidar Israel-yargi, mukwamar-ei-sui-burgwismalad gudigusad. A-ibagangine, deun birgapaa-abala dii gwen wissulid, degidbali, bela napneggine ukud-dummad nagononigusad. ²⁶ Degite, Elías a-mukwamarse gwen barmilessulid. Bur Sarepta-neggwebur-Sidón’gi-siidse mukwa-wargwen-ei-sui-burgwisadse barmilesigusad, adi, a-mukwa ega mas-ukegar.

²⁷ ”Deginbali, Bab-Dummad-gayaburba-barsoged-Eliseo-ibagangi, bukidar Israel-yargi, dulemar-naibe-buna-yaa-maleged nikagusmalad, degite, amar gwen nudaklessulid. Bur Siria-dule-Naamán’ye-nugadi nudaklesad.”

²⁸ Ar deyob Jesús-ibmar-soge-itosmargu, onmakedneggi-bukwamalad bela sae-itodmalad.

²⁹ Dulemar gwisgudmargu, Jesús-ise-onoar imaksamalad, geb neggwebur-magaba yar-birse Jesús-sesmalad, ar ade, a-yar-birgi neggwebur siid. Adi, a-neggwebur-gulluba egwanmalagar.

³⁰ Degi-inigwele, Jesús’di emar-abargi ganna-ganna noded, emar-abargi bangudsunnad.

*Jesús, dule-niaburba-nikad nudaksad
(Marcos 1:21-28)*

³¹ Jesús, Galilea’se Capernaúm’ye-neggwebur-nugadse nonikid. Geb obunnoged-ibagi dulemar-odurdakdii gualid. ³² Dulemar Jesús-ibmar-odurdakedi, geger-itomalad igi-Jesús dulemar-

odurdake. Ar ade, Jesús'de nue-igar-wisi sunmaked.

³³ Agi onmakedneggi dule-wargwen, niaburba-
isgana-nikad-siid binnasur goted, ³⁴ sogded:

—Jesús-Nazaret'gined, mer anmarse be achao, ¿ibiga be anmar-wiodaniki? ¿Be anmar-obelogega daniki? An be-wisi be doa-dule, be-dule-gwage-islidikidid, be Bab-Dummad-nuggi-danikid-duled.

³⁵ Jesús niase binnasur-uluded, ega sabsur weyob ibmar-sogded:

—¡Mer be sunmak! Dulegi-maid be noe.

Geb degi, nia emar-abargi dule-balimetegu, dulegi-maid nodegusad. Dule gwen akar-gussulid.

³⁶ Deyob ibmar-gusadi bela geger dakdemalad. Na agi sokarmarsunnad:

—¿Wede igid-gayaburba-barsunna? Nue-burbanika, gandikidba, niamarga ibmar soged. Niamar Jesús-ega-sogedba ibmar-imakdedamalad.

³⁷ Degi, bela Galilea-yalaganba Jesús-dulemar-nudakdiid wisgudmalad.

*Jesús, Simón-Pedro-e-sakbundor-uellemaid-nudaksad
(Mateo 8:14-15; Marcos 1:29-31)*

³⁸ Geb degi, Jesús Judío'mar-onmakedneggi-siidgi nodsunnad. Geb Simón-negse nadsunnad. Simón-sakbundor ise-uellegar mai dakdapid. Jesús'gi wilenaigusmalad, adi, Simón-sakbundor-nudakegar. ³⁹ Degi, Jesús Simón-sakbundor-walik gwisgunonigu, uellegedga sabsur-ibmar sogded. Agi uelleged yog-akinnar naded. Geb Simón-sakbundor yog gwisguar imaksad, geb a-sorba emarga yog-ibmar-imakar imaksad.

Obunnoged-iba-bergusgu, Jesús dulemar-bukidar-nudaksad

(Mateo 8:16-17; Marcos 1:32-34)

⁴⁰ Dad-argwategu, obunnoged-iba-bergusgu, bela galagwensuli-bonigan-nikamalad Jesús'se senonimalad. Jesús bonigan-nikamaladgi e-argan mesiad, geb bela amar-nudaksad. ⁴¹ Deginbali, Jesús bukidar niamar-onisbalid. Niamar ainider, binnasur-gote, sogdedamalad: “¡Bedi Bab-Dummad-Machi!”

Ar Jesús'di niamarse uluddaed, osunmakega gwen imakdasulid, ar ade, niamar wismalad, we, Bab-Dummad-dule-wargwen-barmidagoye-sogsad-dule-gue.

Jesús, Galilea-yalaganba Bab-Igargi sunmakdii gusad

(Marcos 1:35-39)

⁴² Neg-oibosgu, Jesús neggweburgi bangudsunnad, nega-dulesulidganba nadsunnad. Dulemar Jesús-amidii guarmalad. Dulemar Jesús-amismargu, mer-egi-bangueta, egi wilenaigusmalad. ⁴³ Ar Jesús'di amarga sogded:

—Ar neggwebur-baiganse Bab-Dummad-negdakmaid-e-gayaburba-nuedgi an sunmaknabalirgebed, ar a-ular, an barmilealid.

⁴⁴ Jesús Galilea'gi Judío'mar-onmakednegmargi Bab-Dummad-Gayaburba-Nuedgi sunmakdii gusad.

5

Simón-Pedro ua-ichesur gasad

(Mateo 4:18-22; Marcos 1:16-20)

¹ Ibagwengine, Jesús Genesaret-mata-dummad-naid-gakaba gudii, dulemar-bukidar ese nonimalad. Bab-Dummad-gayaburba itomalagala na barmesnanai guarmalad.

² Agi Jesús ur-warbo gakagi-nai dakalid. E-ibmaladi dii gakagi, saki enukbukmalad. ³ A-ur-wargwengi Jesús nakwisad. Dakleargu, a-ur Simón'gad daklealid. Jesús, Simón'ga sogded:

—Wis be-ur matasik be onoge.

Jesús a-urigi sigisad, agi-sii dulemar-bukidar-gakagi-bukwad-odurdakded.

⁴ Jesús odurdaked-bergusgu, Simón'ga sogded:

—Matasik be-ur be sede. Be agi ua-gaega saki mioed.

⁵ Simón, abin-imakdegu, ega sogded:

—Odurdaked-saila, anmar ua-gananai oiboalid, degite, anmar gwen gassurmalad. Degiile, besogedba an saki miodo.

⁶ Na saki-mismargu, bukidar-ua-gasmalad, agidbali saki achirmakbigualid. ⁷ Geb degi, na e-aimar-ur-baidgi-gunanaidse achasmalad, adi, emar-bendakdamalagar. Geb ese nonimargu, ulu-walabo ua-enosmalad. Ua-enadbali ur-dogbigualid.

⁸ Simón-Pedro ua-bukidar gales dakdegu, Jesús-abin yokorgi sindigar sigisad, ega sogded:

—Dummad, angi be bangu, andi isgudiid-duled.

⁹ Ar ua-bukidar-galesadba, Simón bela-belad dobe itoalid, degine, bela-eba-gunanaid bela-belad dobe itodmarmogad. ¹⁰ Degine, Simón-e-aimar Jacobo, degi, Juan, wemarde Zebedeo-masmalad, amarde dobee itodmarmogad.

Geb Jesús Simón'ga sogded:

—Mer be dobgu. Emisgindi, igi bemar uagae, debayobi, napneggi dulemar-gaega an be-odurdakmaloed, adi, dulemar anba nagumalagar.

¹¹ Geb gakase ur senonimargu, bela ibmar obesmalad. Degi, geb Jesús'ba nadmarsunnad e-sapinganga guegar.

Jesús, dule-naibe-buna-yaa-maleged-nikad nudaksad

(Mateo 8:1-4; Marcos 1:40-45)

¹² Jesús neggwebur-gwensakgi-gudigu, dulewargwen naibe-buna-yaa-maleged-yaisurnikad ese nonikid, yokorgi sindigar Jesús-asabin signonikid. We-dule Jesús'gi wilenaigusad, ega sokalid:

—Dummad, an wisid, be an-nudakbiele, sunna be an-nudaked.

¹³ Geb degi, Jesús e-argan ese achadgu, dule-ebusad, geb degi, ega sogded:

—Nugubi an be-abe. ¡Be nugusun!

Degi, dule-boni-nikadi yog-nuguar-gusad.

¹⁴ Jesús dule-nugusadga sogded:

—Melle dule-baiganga an be-onudaksad be sogo. Unnila dule-irwa-Bab-Dummadse-goledse be nae, aga be-nugusad be oyonae. Degin, be swilidik guegala, Moisés-Igar-Mesisadba-imakega Bab-Dummadga-ibmar-ukleged be sedo. Adi, amar be-nugusadi nue-wisgumalagar.

¹⁵ Aka bur bela-belad Jesús-nug dungumai gualid. Bela Jesús-ibmar-imakdiid wisguarmalad. Dulemar-bukidar Jesús-itogega, degine, e-nudakega duurmaknonidamalad. ¹⁶ Ar Jesús'di

walagwen-Bab-Dummadse-golega dulemar-
satedba dulemargi banguddaed.

Jesús, dule-abagan-burgwar-nikad-nudaksad
(Mateo 9:1-8; Marcos 2:1-12)

¹⁷ Ibagwengine, Jesús dulemar-odurdaksigu, Fariseo'mar, degi, Judío-igar-nue-wisimalad buk-wagusmogad. Amar bela Galilea-yargi, degi, Judea-yargi, degi, neggweburmar-bubukwadgi danimalad. Degine, Jerusalén-neggweburgi danimarbalid. Agi Bab-Dummad-gangued dulemar-gegumalad-nudakega Jesús'ba gudigusad.

¹⁸ Degi, daklealid, dulemar e-ai-wargwen-abagan-burgwar-nikad e-gabedgi-mai sedanimala. Amar Jesús-siidse negyaba e-ai-odobiguarmalanad, adi, Jesús-asabin mesmalagar, ega nudakegar. ¹⁹ Ar dulemar bukidarsoggu, geg odogedbali, neg-birgi nakwismalad. Geb neg-uas-egasmalad, abali, dule-abagan-burgwaled e-gabedgi-mai odesmalad. Jesús-siid-innik omesismalad.

²⁰ Jesús a-dulemar egi gwen bensuli dakdegu, dule-gegumaidga sogded:

—An-ai, be-isgudigusad, bega obelolesun.

²¹ Garda-Narmaked-Dulemar, degi, Fariseo'mar, na e-gwagegi binsadmalad, sogdemalad: “¿Wede doa-dule, Bab-Dummadgi dodogu? ¿Unnila Bab-Dummadbi dulega isgued elisursi?”

²² Ar Jesús ulubgi-duleamar-binsaedi magar-daksad. Degisoggu, amarga sogded:

—¿Ibiga ulubgi be deyob binsabukmala? ¿Geg isgued osulo be an-insasi? ²³ An dule-bonigwaledga

sogdibe: ‘¡Be-isgunaid an bega osulos!’ Ar igi an sog-barsundibe: ‘¡Nugusun, be nae!’ Degite, ¿igid bur-baisursunna imaklesunna? Suli, ebobela baisursunna imaklesuli. ²⁴ Degisoggu, ani Dule-Machi, dule-bonigwaled an nudakoed, adi, bemar wis-guegar, igi dule-bonigwaled an sunna nudake, de-bayobi, we-napneggi dule-gwage-isgunaid sunna an nudakbalid.

Jesús dule-abagan-burgwar-nikadga sogdesun:

—Ani an bega soded: Be gwisgu, be-egi-maid na be sede, be-negse be nae.

²⁵ Degi, dule-bonigwaled yog-nuguar-gusgu, emar-abargi yog-gwichibin imaksad, degi, na e-gabedgi-maid na gadebin imaksad, degi, geb e-negse nadsunnad. Na Bab-Dummad-nug-odummonadapi gusad. ²⁶ Agi belagwapa geger-dakedbimalad, bela Bab-Dummad-nug odummodmalad. Nue-dobe-itomala, sogdemarsunnad:

“Emi-ibagi, ibmar-gegerdakleged an daksamalad.”

*Jesús, Leví'se gochad, e-sapinga guegar
(Mateo 9:9-13; Marcos 2:13-17)*

²⁷ Jesús dule-nudaksadgi-gwichi nadgu, dule-wargwen Roma-dummadga-mani-gaedgi-armaed-Leví'ye-nugadi dakalid. Mani-galedged-neggi sii, mani-gasii dakalid. Jesús, Leví'se gote, ega soded:

—Anba be dage, an-sapinga guegar.

²⁸ Degi, Leví gwisgusgu, Jesús-sapinga-guega bela ibmar-obes, Jesús'ba naded.

²⁹ Leví, e-neggi Jesús'ga iba-dummad onosad. Agi dulemar-Roma-dummadga-mani-gaedgi-arbamalad bukidar bukwa gusmalad, degi, dule-baigan mese-naba emarba mas-gunbukwa gusmarmogad. ³⁰ Agi Garda-Narmaked-Dulemar, degi, Fariseo'mar, Jesús-sapinganga sunmakarmalad, sokarmalad:

—¿Ibiga dulemar-Roma-dummadga-mani-gaedgi-arbamaladba, degi, dulemar-baigan-isgudidimaladba, we-Jesús mas gunne, degine, eba gobbali?

³¹ Jesús, abin-imakdegu, sogded:

—Dule-gegusurmalad ina-duled abesulid, unnila dule-gegumaladbi ina-duled abedamalad. ³² Dule-innikii-nanadimaladse-golega an nonisulid. Dule-isgudidimaladse-golega, an nonikid. Adi, na e-isguedga bukib binsamalagar, mer bar isgumalagar.

*Bab-Dummadse-golega mas-gunsuli gudigued
(Mateo 9:14-17; Marcos 2:18-22)*

³³ Geb degi, dulemar Jesús'ga sokarmalad:

—Juan-sapingan imbagwenar Bab-Dummadse-golega mas-gunsuli gudidamalad. Amba deyob Fariseo-sapingan gudidamarmogad. ¿Ibiga be-sapingandi geg deyob damala? Be-sapingandi mas-gundii damalad, gobdidamarbalid.

³⁴ Jesús, abin burbar sogded:

—Dulemar, ome-nikued-ibase nonimalale, mas gunsurmar be insae. Suli, mas gunmala. Ar

dule-ome-nikunaidi ega mas uked. Ar ade, ome-nikunaidi amar-abargi gudiid. ³⁵ Ar ibagan non-ikoed, dule-ome-nikunaid e-idu seledod. A-ibagan nonikile, agindi, Bab-Dummadse-golega mas-gunsuli gudigumalodo.

³⁶ Geb degi, Jesús ega burbar sunmakdebalid, sogdebalid:

“Ar dule, mor-seredgi matu-nasikega, geg mor-binid matuga nasiked. Ar deyob imakele, unnila mor-binidbi achirmakosulid, deginbali, mor-binid mor-seredgi-matumakar-naid isdar daklebalid.

³⁷ ”Deginbali, dule bipisaale, vino-binid ibmar-uka-bugluga-sobaled-seredgi bardisulid. Degir, vino-binid mudele, we-buglu-sered esirmako-itole. Degir, binsa vino-wiogo-itole, degi, buglusebakar, binsa miledo-itole. ³⁸ A-ulale, vino-binid buglu-binidgi balileged, adi, ebobela nabir igarga guegar.

³⁹ ”Deginbali, dule vino-sered gobsale, sorba vino-binid bar gobbisurguardaed, ar ade sogdedaed: ‘Vino-sered bur vino-binidba nuedye.’ Dule-igar deyobmodo, igar-sered geg igar-binid-ebo atoged.”

6

Jesús-sapingan obunnoged-ibagi ibmar-gwag gwachamalad

(Mateo 12:1-8; Marcos 2:23-3:6)

¹ Ibagwengine, obunnoged-ibagi, Jesús orosgi-dakleged-digaled-abargi-nadapgu, e-sapingan orosgi-dakleged gwane-gwane imaknadapi gusmalad, degine, e-san-onogegala e-argan-abin

iir-iir-imaknadapgusmalad, geb gutedamalad.
² Degi, gwen-gwen Fariseo'mar-Jesús'banadapmaladi, Jesús-sapinganga sokarmalad:

—¿Ar ibiga bemar ibmar-gwag gwane-gwane nadapmala? ¿Obunnoged-ibagi mer arbaoye igar-maisursi? Emide bemar igar-maidgi annanaimalad.

³ Jesús, abin-imakdegu, ega sogded:

—An-sapingan igar-maidgi annanaisulid. ¿Ar bemar David-ibmar-imaksad absodisurmarsi? Deun, David, degi, e-sordamar ukumecharmargu, igi imaksamala.

⁴ "Ar David Bab-Dummadse-goled-negse dognoni gusad, degi, Bab-Dummadga-madu-uklesad guchagusad. Ar David, degi, e-sordamar a-madu gunnedsulnad, ar ade, madu-isedid. ¿Unnila dule-irwa-Babse-gormaladbi we-madugunnoye igar-maisursi? Degite, ¿David, degi, e-sordamar igar-noar-imaksar be insae? Suli, ar ukudba nabir madu guchamalad. Degisoggu, an-sapingan nabir imaksamarmodo."

⁵ Geb degi, Jesús sogdebalid:

"Ani Dule-Machi, obunnoged-iba-e-Dummadid."

*Jesús, dule-argan-burgwaled-nudaksad
 (Mateo 12:9-14; Marcos 3:1-6)*

⁶ Obunnoged-iba-baidgi, Jesús, Judío'maronmakednegse dognonigu, emar-odurdaksii gusbalid. Agine, dule-wargwen, sakwa-nuedsik-argan-burgwaled sii gusad. ⁷ Agi Garda-Narmaked-Dulemar, degi, Fariseo'mar, Jesús-argabukwa-gusmalad, dakega, bule obunnoged-ibagi

Jesús dule-nudakodibeye, adi, egi sogmalagar, obunnoged-igar-maidgi annadiiye.

⁸ Ar Jesús'di nue-wisid igi binsabukmala, a-ular dule-argan-burgwaledga sogded:

—Dage, neg-abarse be gwisguda.

Geb agi neg-abargi dule gwisgunonikid. ⁹ Geb degi, Jesús sogded:

—Ibmar-soggwen an bemarse egisbimardo: Obunnoged-ibagi ibmar-nued-imakedi, wede, ¿igar-nuedi? Ibmar-iscana-imakedi, wede, ¿igar-nuedi? ¿Igid bur-nabiri? ¿Dule-oburgwedi? ¿Dule-odurguedi? ¿Igi bemark sogsunna?

¹⁰ Jesús bela dulemar-dikarba-bukmalad-daksagu, dule-argan-burgwaledga sogded:

—Be-argan be onak.

Dule na e-argan-onakgwidgu, yog-nuguar-naded.

¹¹ Dummagan-bukmalad sae-itodmalad, na sunmakarmalad, igi anmar Jesús-imakmalargebye.

Jesús, e-sapingan-bur-dummaganga-guega ambe-gakabo (12) susad

(Mateo 10:1-4; Marcos 3:13-19; Gusmalad 1:13)

¹² Deun, a-ibagangine, Jesús Bab-Dummadse-golega yarse nade gusad. Agi Bab-Dummadse-gorsii oibosad.

¹³ Oibosgu, eba-nanaimaladse gochad. Agi ambe-gakabo (12), e-sapingan-bur-dummaganga-guega susad. Amar-sulesad, e-sapingan-bur-dummaganye onugsanonikid. ¹⁴ Sulesmaladi, we-malad:

Simón, a Jesús, Pedro'ye onugsasbalid,
degi, Simón-e-urba-Andrés,

Jacobo, Juan,
 Felipe, Bartolomé,
¹⁵ Mateo, Tomás,
 Alfeo-machi-Jacobo,
 Simón, Zelote'ye-bimarbalid,
¹⁶ Jacobo-e-machi-Judas,
 degine, Judas-Iscariote, darba-Jesús-
 uknonikid-dule.

Jesús, dulemar-bukidar-nudaksad
(Mateo 4:23-25)

¹⁷ Jesús e-sapingan-ambe-gakabogwadmala
 (12), e-sordagan-bamaladmala, gulluse
 aidenonikid. Agi nebagi dulemar-bukidar-
 bukwamalad. Amar, wemalad:

Jesús'ba-nanaimalad-baigan,
 Judea-yalaginmalad,
 Jerusalén'ginmalad,
 degi, demar-gakaba-bukmalad: Tiro-dorgan,
 degi, Sidón-dorgan.

Amarde, bela Jesús-itogega nonimalad,
 degi, ega bonigan-osulogega
 nonimalad.

¹⁸ Agi dulemar niaburbase-nue-
 wiledigusmalad nudaklesmalad. ¹⁹ Bela dulemar-
 bukidar Jesús-ebubidamalad, ar ade, e-gangued-
 nikadba, bela dulemar-onudakdiid.

Doamargi bur-nued binsalesa
(Mateo 5:1-12)

²⁰ Jesús e-sapingan-dakdegu, sogded:
 “Bemar-wilemalad, bemargi nued binsalesad,
 ar Bab-Dummad-e-negdakmaid, bemarga-
 did.

- 21 Bemar-emi-uku-mesdimalad, bemargi nued
binsalesad,
ar bemar immerbaa itononimaloed.
Bemar-emi-bodidimalad, bemargi nued binsale-
sad,
ar bemar allenonimaloed.
- 22 Ani Dule-Machi, an-nug-ular,
dulemar isdar be-dakarmalar,
dulemar be-obannarmalar,
dulemar be-ichoarmalar,
degi, be-nuggi sunmakarmalar be dule-
isganamarye,
bemargi nued binsalesad.
- 23 A-ibagangi, dulemar sabsur-be-imaksadba, be
wergumaloed,
be weligwar itomaloed,
ar nibneggi bemarga ibmar-uklegoedi
dummarbagwad.
Ar e-babgan bemar-idu amba sabsur
Bab-Dummad-gayaburba-barsogmalad-
wiosmarmogad.
- 24 Ar bemar mani-ibgan, jduledar-wilesmar!
Ar bato bemardi wegi yeer itodimalad.
- 25 Ar bemar wegi-immedik-itodimalad, jduledar-
wilesmar!
Ar be ukud itononimaloed.
Ar bemar emi-alledimalad, jduledar-wilesmar!
Ar bemar nunmaked itononimaloed,
degine, bemar bononimaloed.
- 26 Ar bemargi bela-dulemar nuedbi sunmakar-
malar, jbe duledar-wilesmar!
Ar deyob e-babgan Bab-Dummad-
gayaburba-barsogmalad-napiragwadsulid
imaksamarmogad.”

*Jesús sogdad, be-isdarmalad be sabgumarye
(Mateo 5:38-48)*

²⁷ Jesús sogdebalid: “Ar bemar an-
itobukmaladgardi an sogdo:

Dule-isdar-be-dakdimalad be sabgumar,
dule sae-be-dakmaladga ibmar-nuegan be
imakmar.

²⁸ Dulemar-be-ukabsadimaladgi nued be
binsamar.

Dulemar-be-ogakansadimaladga Bab-
Dummadse ega be gormar.

²⁹ ”Ar dule-wargwen wagargi be-bibyosale,
wagar-baid ega be oyobalo. Dule mor-suid bei
susale, mer be-mor-baid ega be uksuli guo, ega be
ukbalo. ³⁰ Ar doa-dule bese ibmar egichialir, ega
be uko. Ar dule be-ibe-ibmar susale, mer ese be
gannar bar egiso. ³¹ Ar igi-dulemar be-imakbi be
abege, deyob dulemar be imakmogoed.

³² ”Ar dulemar-be-sabmaladbi be sabguele,
¿Bab-Dummadgi ibi-nued be amiosunna? Be ibmar-
nued amiosuli. Ar dulemar-isgudimalad deyob
dule-e-sabmalad sabgumarmogad. ³³ Ar dulemar-
ibmar-nued-bega-imakmaladgarbi ibmar-nued
be imakmogale, ¿Bab-Dummadgi ibi-nued be
amiosunna? Ibnued be amiosuli. Ar dulemar-
isgudidimalad amba deyob imakmarmogad.

³⁴ ”Ar unnila dule-gannar-bega-ibmar-
ukoedgarbi be ibmar ukele, ¿Bab-Dummadgi ibi-
nued be amiosunna? Ibnued be amiosuli. Ar
dule-isgudimaladi dule-isgudimaladga ibmar
ukdamarmogad, adi, sorba gannar ega ukbaligar.

³⁵ ”Degisoggu, be-isdarmalad be sabgumar,
ibmar-nued ega be imakmar. Ibmar-bei-abeged

ega be ukmar, mer gannar-bega-ibmar-uked edarbedii be gumalo. Ar bemarga ibmar-uklegoed bur-dummarba gued. Degine, Bab-Dummad-Bur-Birigined-e-mimmiga bemar gunonikoed. Ar Bab-Dummad bela dulemar-sunnasurdamalad, degi, dulemar-isganamar wiledakmaid. ³⁶ Ar igi be-Bab, dulemar-wiledakmaimoga, ayob bemar dulemar-wiledakmarmosundo.”

*Mer yogasaar be sogo, we dule-isganaye
(Mateo 7:1-5)*

³⁷ Jesús sogdebar: “Mer yogsaar be sogo, we dule-isganaye, adi, melle Bab-Dummad deyob begi sogmogagar. Mer be sogo, we-dule-sabsur-odurdakye, adi, melle Bab-Dummad sabsur be-odurdakmogagar. Dulemar begi nossuliyob be dako, adi, Bab-Dummad egi nossuliyob bemarkmogagar.

³⁸ ”Aimarga ibmar be uko, adi, Bab-Dummad bega ibmar ukmogoad. Bab-Dummad bega ibmar-wilubsaleged-nuedgi, nue-gindilegar, nue-gwamakar, degi, nue-enargwaagwadgi ibmar ukoed. Ar be ibmar wilub-imakedgine, Bab-Dummad bega ibmar wilubsamogoad.”

³⁹ Geb degi, Jesús burbar emarga ibmar sogded: “¿Ar dule-ibyasulid, sunna dule-ibyasulid-idumai guosi? Suli. ¿Ar ebobela yaa-guregedgi argwachasulir be insae? Argwachale.

⁴⁰ ”Dule-ibmar-durdaknaid geg e-sailaba dummad gued. Ar ibmar-durdaknaid obelosardi, sunna e-odurdakedyob gumogodo.”

⁴¹ Jesús burbar sogdebalid: “¿Ar ibiga be-gwenad-ibiyagi durgan-maid magarsunna be dake? ¿Ar ibiga be-ibya-yaba-suar-maiddi akusunna be dake?

⁴² ”Ar igi be-gwenadga be sogoe: ‘Be-ibya-yaba-durgan-maid an bega onogwelo.’ ¿Ar be-ibya-yaba suar-maiddina? ¡Bemar yogasaar-darbasunmakmaladid! Suar be-ibya-yaba-maid-insa be onoge. Geb agi nabir be atakoed. Adi, agi nabir be-gwenad-ibya-yaba-durgan-maid be onogoed.”

Dule e-daedgi mag be dakmaloed

(Mateo 7:16-20; 12:33-35)

⁴³ Jesús sogdebalid: “Sapi nuedile, geg san-igana nikued, e-sanmaked nued sanmaked. Ar sapi isganale, geg san-nued nikued, e-sanmaked ichakwa sanmaked. ⁴⁴ Ar sapimar war-wargwen na e-sanmakedgi dakleged. Ar higo-san ikogi sanmaksulid, degine, uva-san gwen sapi-ikogangi welesulid.

⁴⁵ ”Anmar-dule amba deyobmodo, dule-nued, na e-gwagegi ibmar-nued-nikadba ibmar-nued onoged. Ar dule-isganadi, na e-gwagegi ibmar-igana-nikadba ibmar-igana onomogad. Ar dule-sunmakedi, gwagegi-ibmar-naidba na sunmaked.”

Dulemar-neg-sobedgi Jesús sunmaksad

(Mateo 7:24-27)

⁴⁶ Jesús sogdebalid: “¿Ibiga be anse, ‘Dummadye, Dummadye,’ gormala? Ar degite an-ibmar-sogedba be dasurmalad.

⁴⁷ ”Ar bela dulemar anse danikile, an-ibmar-soged itogele, degi, eba daele, an bega sogmalo,

we-dule doasunnaa dae. Weyobdo: ⁴⁸ We-dule-gwensak na neg-sobbargu, yaa akwisad, matusur akwisad, degi, neg-e-saila akwa-birgi mesisad. Diwar noargu, diwar binnasur a-neggi yolenonikid, degite, gwen neg ogiglimaksasulid, ar ade akwasaila-birgi neg nue-sobar siid.

⁴⁹ "Ar dule an-gayaburba-itogele, ar a-sogedba imaksasulile, adi, we-dule weyobmodo: Dule neg-sobsagu, unnila napa-birgi sobsad, neg-e-saila mesissulid. Diwar noargu, a-neggi binnasur yolenonikid, neg-ayarided, neg dummad-bibichisdo. Be itogua."

7

Jesús, Roma-sorda-dummad-e-mai-nudaksad (Mateo 8:5-13; Juan 4:46-54)

¹ Jesús bela dule-e-itobukmaladga ibmarsogsad-sorba Capernaúm'se dognonikid. ² Roma-dule-sorda-dulatar-sediid-e-mai (100) ise-uellegar maid, burgwedani maid. A-dulede, na e-mai nue-sabed. ³ Roma-dule-sorda-dulatar-sediid dulemar-Jesús'gi-sunmak-itoargu, Jesús'se Judío-girmar-dummagan barmialid, adi, Jesús'ga sogega e-negse dagye, e-mai ega nudakdaye.

⁴ Judío-dummagan Jesús'se nonimargu, egi nue-wilenai gusmalad, ega weyob sognanai gusmalad: "We-dule-e-mai wis be bendakergebed, ⁵ ar Roma-sordamar-dummadde, anmar-neggwebur-nue-sabed, degine, anmarga onmakedneg sobsalid."

⁶ Jesús amarba nadsunnad. Neg-modanigusgu, Roma-dule-sorda-dulatar-sediid Jesús-abin e-aimar barmialid. Adi, amar Jesús'ga weyob

sogmalagar: “Dummad, an-negse be dogsulir, akarsulid, ar be an-negse gwen dogedwilubsulid, ⁷ degine, an bese gwen dagedsurmoganad. Ar unnila be sogsa-sae, an-mai yog-nuguar naoed.

⁸ ”Amba an dummad nikhmogad, a-sogedba an damogad. Degine, ani an dummadmogad, ani an sordamar-sedimogad. Ar sorda-wargwenga an sogdibe: ‘Be nae,’ yog naar daed. Sorda-baidga an sogbardibe: ‘Be dage,’ yog dagar daed. Degine, an-maiga an sogdibe: ‘Be we-imake,’ yog-imakar daed.”

⁹ Jesús deyob Roma-dule-sorda-dulatar-sediid ega ibmar-soge itoargu, geger-itoded. Geb degi, Jesús dulemar-e-sorba-duurmakdanimaladga sogded:

“An bemarga sogmar, gwen an Israel-yargi weyob dule-angi-nue-bensulid an dakdisulid.”

¹⁰ Ar dule-barmilesmalad gannar negse noni-margu, daknonimalad, mai-uellemai-gusad bato nugusa. Ar ade, bato Jesús bannapaa we-dule nudaksad.

Jesús, ome-ei-sui-burgwisadga machi-odulosad

¹¹ Jesús, Roma-sordamar-dummad-e-mai-nudaksad-sorba, Naín’ye-neggwebur-nugadse nadapgu, e-sapingan eba nadapi gusmarmogad, degine, bukidar dule-baigan eba nadapi gusmarmogad. ¹² Neggweburse-doged-yawagak-mosgu, dulemar neg-uanse dule-burgwisad-dignadapi gusmalad. A-burgwaled, ome-ei-sui-burgwisad-e-machi-wargwensakadid. Naín-neggweburginmalad bukidar a-omeba nadapi gusmarmogad.

¹³ Agi Dummad-Jesús dakargu, nue-wile a-ome-dakded, ega sogded:

—Mer be boe.

¹⁴ Jesús dule-burgwar-maid-selemaidse war-makdapgu, dule-mui-semamaid gwisgusmalad. Geb degi, Jesús a-egi-selemaid-ebusgu, sogded:

—Sapingwa, an bega soqe, be gwisgu.

¹⁵ Geb degi, dule-burgwar-maid gwisgusad, geb agi yog sunmakdeguad. Geb Jesús a-sapingwa e-nanse sessunnad.

¹⁶ Bela-dulemar dobee itodmalad, geb degi, Bab-Dummad-nug odummodmalad, sogdemalad:

“Bab-Dummad-gayaburba-barsoged-wargwen anmar-abargi gwisgunoni. Bab-Dummad na e-dulemarse ataknoni.”

¹⁷ Bela Judea-yalaganba, degi, neggweburmar-a-dikarba-bubukwad bela Jesús dule-burgwaled-odulosad wisguarmalad.

4b. Jesús, degi, Juan-Bautista

(7:18-35)

Diigi-dule-oged-Juan, Jesús'se e-sapingan-barmialid

(Mateo 11:1-19)

¹⁸ Deunni, Diigi-dule-oged-Juan-e-sapingan bela Jesús-ibmar-imaksad Juan'ga sognonimalad. Agi Juan na e-sapingan-warbose gochad. ¹⁹ Geb Jesús'se barmisad, adi, ese egisegar:

—Ar epenne Bab-Dummad-dule-wargwen-an-bemarga-barmidagoye-sogsadi, ¿ar be a-dule? ¿Anmar dule-baid amba edarbemaloe?

²⁰ Dule-warbo-barmilearmalad Jesús'se nonimalad, ega sognonimalad:

—Anmar bese ibmar-egisega Diigi-dule-oged-Juan anmar-barmialid. Bega sogega, bede, Bab-Dummad-epenne-dule-wargwen-an-bemarga-barmidagoye-sogsad-dule-sogeye. Anmar dule-baid amba edarbemalo-sogeye.

²¹ Agine, Jesús, Juan-sapingan-wagab, buki-dar dulemar-gegumalad, galagwensuli-bonigan-nikmalad, niaburba-nikmalad, degine, dulemar-ibyasurmalad nudaksad. ²² Geb degi, Jesús, Juan-sapingan-abin-imakdegu, sogded:

—Be namar, Juan’ga be ibmar-itosmalad sognamar, degi, ega be ibmar-daksamalad sognamar:

Dulemar-ibyasurmalad mag-atak an imaksad,
 dule-muya-muya-nanamalad nued-nanae an imaksad,
 dulemar-naibe-buna-yaa-maleged-nikmalad swilidik an imaksad,
 dulemar-uaya-yallirmalad nabir-mag-ito an imaksad,
 dulemar-burgwismalad gannar-durguega an imaksad,
 degine, dulemar-wileganaga Bab-Dummad-Gayaburba-Nuedgi an ega sunmaknonikid.

²³ ”Degine, Juan’ga be sogbalo: ‘Ar dule-anbensuliddi, a-dulegindi nued binsalesye.’ ”

²⁴ Diigi-dule-oged-Juan-sapingan-warbogwad nadmargu, Jesús, Juan’gi dulemarga sunmakalid, sogded: “¿Ar ibiga nega-dulesulidganba bemar arbisunna? ¿Nargammu-burwaba-aibangwichi-dakega bemar arbi? Suli.

²⁵ ”Degite, ¿ar ibi-dakega bemar arbisunna? ¿Bemar dule-wargwen-mor-nued-yoi-gudiid-

dakega arbimala? Suli. Ar dulemar mor-nued-yoi-gudimaladdi, wergudimalad, amardi reymar-negyagi gudidimalad.

²⁶ "Ar degite, ¿ibi-dakega bemar arbimarsunna? ¿Bab-Dummad-gayaburba-barsoged-dakegala? Eye. An bemarga sogmalad, a be daksamalad, degine, Bab-Dummad-gayaburba-barsogedba bur bule bemar daksamalad, ar ade, we-bur-dule-dummadid. ²⁷ Ar we-dulegine bato narmakar sognaid, Mesías'gi sunmaknaigu, Bab-Dummad soged:

'Be-iduale, anga-gayaburba-berbegeg an barmidoed,

Adi, be-iduar bega igar-mayegar.'

Malaquías 3:1

We-gayaburba-barsoged,
Juan'do.

Diigi-dule-oged-

²⁸ "Ani an bemarga soged: Dulemar we-
napneggi-gwalulemaid, Diigi-dule-oged-Juan'ba
bur-dummad sated. Ar degite, Bab-Dummad-
e-negdakmaidgi bur dule-bipigwadi, Juan'ba
bur-dule-dummadid."

²⁹ Bela dulemar Jesús-itosmalad, degi, Roma-
dummadga-mani-gaedgi-arbamaladse-bakar,
sogdemalad, Bab-Dummad-igar-napira-maid
inniki-maiye, ar amar, Diigi-dule-oged-Juan-
diigi-ogedgi oglesmalad. ³⁰ Ar Fariseo'mardi,
degi, Moisés-Igar-odulomaladdi, Bab-Dummad-igar-
emarga-uklenaid gwen abingassurmalad, Bab-
Dummad-diigi-ogleged-igar Juan-imakedi, gwen
imaksasurmalad.

³¹ Geb degi, Jesús sogdebalid: "Degite, emi
we-dulemar-bukmaladde, ¿ibubo wilubdakar an

egi sunmakoe? ¿Doa sunnaa damar be insae?
³² Wemar-damaladi, masmala dulemar-bukidar-ambikuedgi ambikumaladyobdo. Ar dulemar-bukidar-ambikumaladgi muchub-muchub na gorbukmalad. Weyob sogbukwa damalad:

‘Anmar gar ogochamalanad,
 gwen be dodossurmalad.

Anmar bukib-binsae namaksamalanad,
 gwen be bossurmalad.’

 Degisoggu, bemark we-masmala-
 binsaedsulidyob damalad.

³³ ”Diigi-dule-oged-Juan we-napnegse nonigu, dule-baiganyob mas-gunsuli, degi, gobsuli gudi-gusad. E-annik bemark sogsamalad: ‘Wedi nia egi naiye.’

³⁴ ”Ani Dule-Machi, andi nonigu, mas gunnon-ikid, gobnonikid, an-annik be sogmalad:

 ‘We-dule, gadi-masgunned-duleye,
 gadi-vino-gobed-duleye.

 Roma-dummadga-mani-gaedgi-arbamalad-
 e-aiye,

 degi, dulemar-galagwensuli-isdudimalad-e-
 aiye,

 be an-annik sogmalad.’ ”

³⁵ Geb degine, Jesús sogded: “Ar dule Bab-Dummad-e-ibmar-wisidi, ibmar-nuegan-imakedgi mag dakledaed.”

**4c. Jesús-ibmar-imalsad, degi,
 ibmar-odurdaksad**

(7:36-9:21)

*Jesús, Fariseo-Simón'ye-nugad-negse mas gun-
 napid*

³⁶ Ibagwengine, Fariseo-wargwen Jesús'gi wile-naigusad, e-negse mas gunnaegar. Jesús, Fariseo-negyaba dogsagua, mese-naba mas gunnega sigi-dapid.

³⁷ A-neggweburgine, ome-wargwen, ome-isgudiid-dule, itoargu, Jesús, Fariseo-neggi mas-gunsiiye, gwallu-wawagwad alabastro-akwagibute-sobaledgi senonikid. ³⁸ Ome Jesús-yarganba, e-mali-dikarba ise-boar signonikid. Agi, ome na e-ibyanisgi Jesús-e-mali owardikusad. Geb degi, e-sailagiagi odinnosbalid. Ome Jesús-mali suk imaksad, gwallu-wawad Jesús-maligi eosbalid.

³⁹ Fariseo-Jesús'nik-gochadi degi-daksagua, na e-gwagegi binsasigualid: “Ar Jesús, Bab-Dummad-gayaburba-barsogeddina, wisindo, we-ome, doa-dule, degine, we-ome-e-ebunaidi, igidaedbali. Ar we-ome isgudiid-duled.”

⁴⁰ Geb degi, Jesús sunmakdegu, sogded:

—Simón, ibmar-gwensak an bega sogbido.

Simón, abin-sogded:

—Odurdaked-saila, be soge.

⁴¹ Jesús sogded:

—Dulemar-walabo dule-gwensakgi mani gasmalad: Wargwen egi dulataled-ilar (500) mani gasad, baidi, dulatar (100) egi mani gasad. ⁴² Ar ebobela geg bennuke gusmalad. Degisoggu, mani-ibed amarga sogsagusad: ‘Akarsurye, mer bar an-bennukmaloye.’ Emide, be anga sogena: We-dule, ¿doa bur sab be insae?

⁴³ Simón, abin-imakdegu, sogded:

—An insagua, bur dumma-egi-mani-ganigusad, an insado.

Jesús, abin-sogded:

—Nampiragwad be sogsado.

⁴⁴ Jesús ome-siidsik aibilisgua, Simón'ga sogded:

—We-ome be dakena. An be-negse dognon-igu, gwen be anga an-nag enukega dii uksasulid. Ar we-omedi e-ibyanisgi an-nag enuksad, degine, e-sailagiagi anga an-nag odinnosbalid. ⁴⁵ Dog-nued-noniye be anga sogega, be an-wagar ussulid. Ar we-omedi an be-negse dogsad-akar an-nag usiguad.

⁴⁶ "Be an-nonogi anga gwallu-wawad gwen eossulid, ar we-omedi an-naggi gwallu-wawad eosad. ⁴⁷ Ar degisoggu, an bega sogsun, we-omedummad-isgudiid ega bela elilesad, ar ade, we-omede dummad-an-sabgusad. Ar dule unnila ichee ega isgued-elilesale, ichee sabgumogad."

⁴⁸ Geb degi, Jesús omega sogded:

—Be-gwagegi be isgudigusad nugussun.

⁴⁹ Dulemar-mesegi-eba-mas-gunbukmalad, na ulubgi binsadmalad, sogdemalad:

—¿Ar wede doa-dulesunna, isguedse-bakar, elied?

⁵⁰ Ar Jesús'di omega sogded:

—Be-angi-bensulidba isguedgi be abonolesun. Degisoggu, ulubgi gwage-bogidikidba be nasun.

8

Omegan-Jesús'ga-ibmar-imalsamalad

¹ A-ibagan-sorbali, Jesús bela neggwebur-dummagan-onodii, degi, neggwebur-burwigana-onodii gualid. Bab-Dummad-e-negdakmaid-gayaburba-nuedgi sunmakdii gualid. E-sapingan-e-ambe-gakabogwad (12) eba gudigusmarmogad.

² Degi, abala omegan niaburba-iscana-nikagusmalad nugusmalad, gwen-gwen-gegudiid nugusmalad. A-omegan, wemalad: María, Magdalena'ye ese gordamalad. We-omegine sogagugle (7) niaburba onolesad. ³ Degine, Chuza-e-omeJuana. We-Chuza'de Rey-Herodes'ga neg-dakeddummadid. Deginbali, Susana, degi, omeganbaigan-bukidar Jesús'ba gudigusmarmogad. A-omegan, na ibmar-nikamaladba Jesús'ga ibmarimakdii gusmalad.

Jesús, ibmar-gwag-diglegedgi burbar sunmaksad

(Mateo 13:1-23; Marcos 4:1-20)

⁴ Dulemar-bukidar neggwebur-baidbaidginmalad Jesús'se ambikunonimalad. Amarga, Jesús burbar sunmakded, sogded: ⁵ "Ibagwengine, dule-wargwen-ibmar-gwag-digedi ibmar-gwag dignaded. Ibmar-gwag-dignaigusgu, abala ibmar-gwag igargi babatisad. Igargi-babatismaladgi dulemar annasmalad. Geb degi, a-sorbali, sikwimar-gukudimalad a-ibmar-gwag manonimalad.

⁶ "Abala, ibmar-gwag, akwamar-birgi babatisad. Dinguargu, dinguded, ar ade, akwamar-birgi neg nisarsulid, dinnagwad.

⁷ "Abala, ibmar-gwag, iko-abargi babatisad. Ibmar-gwag dinguargu, ikomar eba dungudmogad. Ikomar ibmar-gwag-ichosad. Degisoggu, ibmar-gwag gwen sanmaksasulid.

⁸ "Ar ibmar-gwag napa-nuedgi-babatismaladdi, dungudgu, nue-sanmaksad, bela-bela sannikusad."

Ar weyob Jesús dulemarga sunmaksigu, bin-nasur sogded: “An-bemarga-ibmar-soged bemar mag nue-itobiele, nue-itomar.”

⁹ Geb degi, e-sapingan Jesús’s e gichialid:

—Ibmar burbar be anmarga sogsadi, ¿wede be, ibu obarsunna?

¹⁰ Jesús na e-sapinganga sogded:

—Ar bemargardi, Bab-Dummad-e-negdakmaid-igar-burbar-mamaid osanalegoye maid. Dulemar-baigangardi, ega burbar soglegoed: ‘Adi, dulemar ise-dakar imakmar-inigwele, mer mag dakmalaga, degi, ise-itogar-imakmar-inigwele, mer mag itomalagar.’

Isaías 6:9

¹¹ ”Ar emi burbar an bemarga sogsadi, wey-obdo: Ibmar-gwag, Bab-Dummad-gayaburbad.

¹² ”Ibmar-gwag-igargi-babatismaladi, we Bab-Dummad-gayaburba-sunmaked-e-wilubganad. Nia-saila sorba nonigu, dulemar-gwagegi Bab-Dummad-gayaburba-nagusad ei osulononikid, adi, mer Bab-Dummadba damalaga, mer isguedgi abonolemalagar.

¹³ ”Ar akwagi-babatismaladdi, Bab-Dummad-gayaburba itosmargu, nue-weligwar abingasmalad. Ar wemar unnila asginbi Bab-abingasmarsoggu, ibmar-gwag-digaled-maligan-askinnegwadyobdo. Degisoggu, ichee wis Bab-Dummadba nanasmalad, ibagan-bulegan ega nonigu, Bab-Dummadgi bangudmalad.

¹⁴ ”Ar iko-imbaba-babatismaladdi, we-dulemar Bab-Dummad-gayaburba abingasmalando. Ar undargusgu, we-napneggi-ibmar-nanaidse,

degi, manise, degi, we-napneggi-unnila-yeer-itodiguedse, binsaed-galedmalad. Amar ibmar-gwag-gwen-sanmaksasulidyob gunonikid.

¹⁵ "Ar napa-nuedgi-babatismaladdi, wemardi, Bab-Dummad-gayaburba-itosad nue abingasmalad. Gwage-nuedgi, gwage-napiragwadgi, gwen-galakussuli Bab-Dummad-gayaburbaba nanasmalad. Degisoggu, amar ibmar-gwag-nue-sanmaksamaladyob gunonikid."

Jesús sogsgusad, ibmar-dukualed sanar-onolegedseye

(Marcos 4:21-25)

¹⁶ Jesús sogdebar: "Dule gwallu ogasale, gwen ulu-yaba sisulid, degi, e-gabed-urba siega amba gwen imakdisurbalid. Dule gwallu ogasale, niba gwallu-siedgi osidaed, adi, dulemar dognonikir, gwallu-meegwad mag dakegar. ¹⁷ Debayobi ibmar bipisaale dukusulid. Be-ibmar-saed bela wisgulegedsegad. Amba be dukuar ibmar-saoen-inigwele, bela dulemar wisguedsegad, bela negache noedsegad.

¹⁸ "Degisoggu, nue be binsaergebed. Ar dule-ibmar-nikadga bur bule ega gatik ibmar uklegoed, ar degine, dule-ibmar-satele, amba ibmar-nikuo-itogedi e-annik sulegoed."

Jesús-e-nan, degi, Jesús-e-urbamar

(Mateo 12:46-50; Marcos 3:31-35)

¹⁹ Jesús dulemar-odurdaksigu, geb degi, e-nan, degine, Jesús-urbamar, Jesús'se nonimalad. Ar dulemar bukidarsoggu, geg Jesús'se warmak

guarmalad. ²⁰ Jesús-owisosmarsunnad, ega sognonimalad:

—Be-nan, degi, be-urbamar magaba gwismalad, be-dakbimalad.

²¹ Jesús, abin-imakdegu, sogded:

—Dule-Bab-Dummad-gayaburba-itomalad, degi, ebadamalad, a an-nanad, degine, amar an-urbamalad.

*Jesús, burwa, demar obogilesad
(Mateo 8:23-27; Marcos 4:35-41)*

²² Ibagwengi, Jesús na e-sapinganmala urgi nakwisgu, amarga sogded:

—Mata-dummad-obakar namargwelo.

Geb degi, nadmarsunnad. ²³ Urgi nadapmargu, Jesús gabided. Geb degi, egi mataba burwa-dummad noalid. Ur, dii-ena nagusad. Degidbali, ur doged gualid.

²⁴ Geb degi, e-sapingan Jesús'se nonimargu, Jesús-odaksamalad, ega sogdemalad:

—¡Odurdaked-saila, anmar-ur dogmai, anmar bela!

Jesús ataksagu, burwaga, degi, demarga binna-sur sogded: “Be bogidik sae.” Geb degi, burwa boo naded, neg swilidik sigisad. ²⁵ Jesús e-sapinganga sogded:

—¿Ar ibiga be Bab-Dummad-bengusmala?

E-sapingan dobe itodmalad, degine, geger dakdemarbalid. Na muchub-muchub sogdemalad:

“¿Wede, doa-dulesunna? Burwa, degi, demarse-bakar, eba ibsaed.”

Jesús, Gadara-yargi dule-niaburba-ichesur-nikad nudaksad

(Mateo 8:28-34; Marcos 5:1-20)

²⁶ Geb degi, Jesús na e-sapinganmala Gadara-dulemar-bukwadse modapmalad. A-negde, Galilea-mata-obakar naid.

²⁷ Jesús urgi-aidesgu, dule-wargwen dule-nia-dikasurgus-nikad, Gadara-neggweburgined, ese nonikid. A-dule mor-yoisur gudidaed, degine, neggi gabsurbalid, neg-uan-yaba gabdidaed.

²⁸ We-dule Jesús-dakargu, binnasur gormakded. Jesús-asabin yokorgi sindigar sigisad, sogded:

—Jesús, Bab-Dummad-Bur-Birigined-Machi, ¿ibiga be anse achadaniki? ¡Melle be mesagwar an-imako!

²⁹ Ar Jesús niaburbaga sogsad, “dulegi-maid be noe.” Dakargu, dikasurgusa dulegi niaburba maid. Ar esgoro-dubgi a-dule-mali, degi, e-argan edindamar-inigwele, degite, iidi esgoro-imakdaed. Degine, nega-dulesulidganba, nia, dule-sesdaed. ³⁰ Jesús, a-dulese egichiarsun:

—¿Igi be nuga?

Dule, abin-sogded:

—Ichesulidye an nuga.

Ar ade, niamar-bukidar egi maid. ³¹ Niamar Jesús’gi wilenai gusad, melle niamar-wilegoed-galuse e-barmidye.

³² Deun, sinmar-bukidar yargi mas mananai gusad. Niamar Jesús’gi wilenai gusad, sinmargi e-odoye. Jesús amarga sogded, nabirye, ase be dognamarye. ³³ Niamar, dulegi ainidgu, sinmarse ubodapid. Sinmar yar-weregedgi babatidgu, matase babatidapid. Agi bela gundoledapmalad.

³⁴ Ar sinmar-edarbemalad sin-gundilesad-daksamargu, duurmakdemalad, neg-igarba-bukmaladga, degine, neggweburgi, sinmar-gusad sogdapmalad. ³⁵ Degi, dulemar neggusad-dakega ainiarmalad. Jesús'se nonimargu, daknonimalad, dule-nia-nika-gudigusadi Jesús-naba nue mor-yoi sii, nue-nugus sii. Dulemar deyob dakarmargu, dobee itodmalad. ³⁶ Ar dulemar-dule-nugusad-daksamaladi, dulemar-nonimaladga sogdemalad, dule-nia-nika-gudigusadi igi nugusa.

³⁷ Geb degi, bela dulemar Gadara-yar-dikarbarmalad, bela dobee itodmargu, Jesús e-yargi-noega, egi wilenaigusmalad. Degi, Jesús urgi-nakwisgu, gannar nadsunnad.

³⁸ Dule-nia-nika-gusadi, Jesús-e-sedega, Jesús'gi wilenaigusad. Ar Jesús egi bangusokargua, ega sogded:

³⁹ “Be-negse be nae, be sogna, ibibayobi Bab-Dummad nue-wile be-daksa.”

Dule nadgua, bela neggweburgi sunmakdii gualid, igi Jesús ega ibmar-dummagan imaksa.

Jairo-bunolo durgusad, degi, ome Jesús-morduku-ebusgu, nugusad

(Mateo 9:18-26; Marcos 5:21-43)

⁴⁰ Jesús gannar Capernaúm-neggweburse nonigu, dulemar-bukidaradi weligwar Jesús-abingasmalad, ar ade, bela Jesús-edarbedimalad.

⁴¹ Geb degi, machered-wargwen, Jairo'ye-nugadi Jesús'se nonikid. Jesús-mali-naba sindigar yokorgi signonikid. E-negse naega, Jesús'gi wilenaigusad. Jairo'de, Judío'mar-onmakedneggi

dule-dummadga gudiid. ⁴² Dakargu, Jairo unnila bunolo-wargwenna nikad, birgambe-gakabo nikad (12). A-bunolode, burgwedani maid.

Jesús, Jairo-negse nadapgu, dulemar-bukidara, ali-ali Jesús'gi yolenanai gualid. ⁴³ Dulemar-bukidarad-abargi ome-gwensak birgambe-gakabogus (12) boni-nalur-nika-gudiidi, gudimogad. A-ome, bela mani-nikadi inadurgangi ollomaksad, ar degite, gwen nudaklessulid. ⁴⁴ A-ome, Jesús-yarganba nonikid, ei-morduku ebunonikid. Ome, Jesús-morduku ebusgu, boni-nalur-nika-gudiid yog-galegar naded, yog-nuguar gusad.

⁴⁵ Geb degi, Jesús sogded:

—¿Wede doa an-ebusa?

Bela sulidbiye ega sogmalad. Pedro, degi, e-walik-bukmalad, Jesús'ga sogdemalad:

—Odurdaked-saila, dulemar-bukidar ali-ali be-barnesnana-naded, degite, be sogde: 'Wede, ¿doa an-ebusye?'

⁴⁶ Ar Jesús, abin-imakdegu, sogded:

—Dule-an-ebusad mag an itoged. Ar angi an-gangued node an itosad.

⁴⁷ Degi, ome dakdegu, ibmar-gusadi gwen dukuar gussuli, ise-wawanmakar Jesús'se nonikid, e-mali-naba yokorgi sindigar signonikid. Bela-dulemar-bukwad-abargi sognonikid, ede, ibiga Jesús-morduku ebusye, degine, ede, Jesús-morduku-ebusgu, yog-nuguar nadye sognonikid.

⁴⁸ Jesús omega sogded:

—Omegwa, be nue an-bengussursoggu, be nu-gussun. Gwage-bogidikidgi be-negse be nasun.

⁴⁹ Amba Jesús omega sunmakgwichi, dulewargwen, Jairo-neggi-danikid, Jairo'ga sognon-ikid:

—Be-bunolo bato burgwisye, mer bar odurdaked-sailagi bega be-bunolo-nudakega bar wileye.

⁵⁰ Jesús deyob dule-soge itosgu, Jairo'ga sogded:

—Melle be dobgu. Unnila melle be benggu, be-bunolo nuguod.

⁵¹ Jesús, Jairo-negse dogdapgu, dulemar eba gwen doged imaksasulid, unnila, Pedro, Jacobo, Juan, degi, bunolo-e-bab, degine, bunolo-e-nan, amarbi eba dogsamalad. ⁵² Jesús modapgu, dakdapid bela bobukmala, degi, binnasur ise-wilegar bunologa bonanai. Jesús amarga sogded:

—Mer bomar, bunolo burgwar-maisuli, unnila gabmai.

⁵³ Bela-dulemar-bukmalad Jesús'gi dodoarmalad, ar ade, wismalad we-bunolo burgwar mai.

⁵⁴ Ar Jesús'di, bunolo-argangi-gasgua, binnasur sogded:

—Bunolo, be gwisgu.

⁵⁵ Geb degi, bunolo-e-burba gannar ese nonigu, yog-gwisguar imaksad. Geb degi, Jesús sogded, bunologa masgunned ukmarye. ⁵⁶ Bunolo-e-babgan deyob ibmar-gusadi geger dakarmalad. Jesús'di sogded, mer dule-baiganga sogmaloye.

9

Jesús-sapingan, Bab-Dummad-e-negdakmaidgi sunmakapid

(Mateo 10:5-15; Marcos 6:7-13)

¹ Jesús na e-sapingan-ambe-gakabogwad-danar-oambikusgu (12), bela amarga igar-uksad, Bab-Dummad-ganguedba dulemargi niamaroniegar, degine, dule-uellemalad-nudakegar. ² Geb degi, Jesús e-sapingan-barmisad, adi, Bab-Dummad-e-negdakmaidgi sunmakegar, degi, dulemar-uellemalad nudakbaligar. ³ Jesús e-sapinganga weyob sogsad:

“Mer igarba ibmar sedmalo, suar-gaapoled suli, sagu suli, masgunned suli, degine, mani surbar. Deginbali, unnila mor-yoigwabi be namaloed.

⁴ Ar doa-negse be dogdapoe, a-negginbi be megoed. Ar a-neggi-mai geb be baid-neggweburse namaloed.

⁵ ”Ar bia be-abingassurmalar, a-neggweburgi be nodmaloed, geb be-naggi-olli-nanaid be nue eli-eli samaloed, adi, dulemar mag be-dakmalaga bemar ega Bab-Dummad-igargi sunmakapmala. Degisoggu, emargindo, ar Bab-Dummad-igar yapa abingamalar.”

⁶ Jesús-sapingan-ambe-gakabo-guedi (12) bela neggweburmar-burwiganase Bab-Dummad-Gayaburba-Nuedgi sunmakdii guarmalad, degi, dulemar-gegumalad-nudakdii gusmarbalid.

Diigi-dule-oged-Juan-burgwisad
(Mateo 14:1-12; Marcos 6:14-29)

⁷ Dummadga Herodes-Antipas-maidi, Jesús-bela-ibmar-imakdiid-itoargu, geger nue-ito naded. Ar ade, abar sogmalad: “We-Jesús, Diigi-dule-oged-Juan-burgwisad gannar durgusye.” ⁸ Baigan sogmarbalid: “We-Jesús, epenne-Bab-Dummad-gayaburba-barsoged-Elías’ye-nugad, gannar

noniye.” Degine, baigandi sogmalad: “We-Jesús, epenne-Bab-Dummad-gayaburba-barsoged-wargwen-gudigusad gannar durgusyey.”

⁹ Herodes-Antipas’di sogded: “An diigi-duleoged-Juan-ibe dukar-egwachadde, degite, dulemar an egi-sunmake-itogedde, ¿wede doasunna?”

Degisoggu, Herodes-Antipas Jesús-dakbiguarsunnad.

Jesús dulemar-miliatar (5,000) masgi-oguchad (Mateo 14:13-21; Marcos 6:30-44; Juan 6:1-15)

¹⁰ Jesús-e-sapingan-bur-dummagan-e-ambe-gakabogued (12), gannar Jesús’senonimargu, belaimar-imbaksamalad Jesús’ga sognonimalad. Jesús amarbi bachikii, nega-dulesulidganbaneggwebur-Betsaida’ye-nugad-dikarba sesad.

¹¹ Dulemar wisguargu, Jesús Betsaidaneggwebursik nadye, dulemar ase nadegusmarmogad. Jesús’senonimargu, Jesús dulemarabingasad. Geb degi, amarga Bab-Dummad-enegdakmaidgisunmaksigisad, degine, dulemar-nudakleged-abemalad nudaksabalid.

¹² Ar neg-sedogusgu, e-sapingan-ambe-gakabogwad (12) Jesús’senonimalad, ega sognonimalad:

—Dulemar be barmid, adi, igarbanegmarbukwadse, degi, negmar-gwa-gwagwen igarbanbukwadgisunna obunnomaloed, degi, agimasgunned sunna amimarbaload. Ar wegindi, anmar nega-dulesulidgangi bukmalad.

¹³ Jesús e-sapingan-abin sogded:

—Bemar ega masgunned ukmar.

E-sapingan, abin-imakdemarmogad:

—Anmar unnila madu gwaatar, degi, ua ukabo nikkmalad. Ar degiir anmar we-dulemar-ichesulidga mas baknaergebed.

¹⁴ Ar ade, macherganbi miliatar (5,000) mergued. Geb degi, Jesús e-sapinganga sogded:

—Dandar-dandar, e-dulabogakambedulabogakambe, (50-50) be urbemar.

¹⁵ E-sapingan deyob imaksamalad, bela deyob dulemar-urbismalad.

¹⁶ Geb degi, Jesús madu-gwaataled susgu, ua-ukabogwad susbargu, niba atakdegu, Bab-Dummadga dog-nuedye sogsad. A-sorba, madu bisge-bisge imaksad, degidbali ega merguded. Geb e-sapinganga ukded, adi, amar dulemarga ukmarmogagar.

¹⁷ Degine, bela-dulemar-gudidimalad nueimmeles mas guchamalad. Mas-guchad-sorba, Jesús-sapingan madu-obichadi, degi, ua-obichadi, garba-gwaambe-gakabo-mergu (12) wesmalad.

Pedro Jesús'ga sogsad, be Bab-Dummad-Machisunnadye

(Mateo 16:13-20; Marcos 8:27-30)

¹⁸ Ibagwengi, Jesús, Bab-Dummadse bachiki gorsigusgu, deun e-sapingan eba bukwa-gusmogad. Amarse Jesús egichialid:

—¿Doaye dulemar an-annik sogmala?

¹⁹ E-sapingan, abin-sogdemalad:

—Gwenna-gwenna Diigi-dule-oged-Juan'ye benik sogmalad. Baigandi sogmalad, be Bab-Dummad-gayaburba-barsoged-Elías'ye.

Agi baigan sogmarbalid, be Bab-Dummad-gayaburba-barsoged-wargwen-epenne-gudigusad, gannar durgusadye.

²⁰ Jesús na e-sapinganga sogded:

—Bernardina, ¿doaye an-annik sogmarmosunna?

Geb degi, Pedro, Jesús-abin sogded:

—Be Cristo, Bab-Dummad-dule-wargwen-barmidagoye-sogsad-dule.

²¹ Geb degi, Jesús e-sapinganga sabsur sogded, melle dulemar-baiganga bipisaar sogoye ede Cristo'ye, Bab-Dummad-dule-wargwen-barmidagoye-sogsad-dule-sunnadye.

4d. Jesús, Dule-Wargwen-Barmiledagoye (Cristo) soglesadid

(9:22-50)

*Jesús e-burgoedgi sunmaksad
(Mateo 16:21-28; Marcos 8:31-9:1)*

²² Degi, Jesús sogdebar:

—Ani Dule-Machi, nue-wilegergebed. Judío'mar-girmar-dummagan, dule-irwa-Bab-Dummadse-gormalad-e-dummagan, degine, Garda-Narmaked-Dulemar, amar gwen an-abingaosurmalad, an-oburgwemaloed. Geb degine, ibapaagi gannar an durgubaloed.

²³ Degine, Jesús bela-dulemarga sogded:

“Ar dule-wargwen an-sapinga gubiele, na dukin san iegergebed. Bato burgwenadapidyobi, banebane nakrus-semaiyob anba nanaergebed.

24 "Ar dule-wargwen anba-naid-ular burgwe-bisulir, e-san-burba ei yogguodo. Ar anba-naid-ular burgwenonikirdi, adi, na-e-san-burba yogguosurdo. 25 Ar dule-wargwen napneg-naid bela egadga imaksar, degi-inigwele, edi na bergusar, e-san-burbadi yoggusale, ega, ¿ibi-nuedga napneg-naid-egadga-imaksad gus be insae? Suli. Ega ibmar-nuedga gussuli.

26 "Ar dule-gwensak an-nuggi bingegusale, degi, an-gayaburbagi bingegusbalile, ani Dule-Machi, a-dulegi an bingegumogoed.

An-gangued-yeerdaklegedgi an danikoedgi,
 degi, an-Bab-gangued-yeerddaklegedgi an
 danikoedgi,
 degine, baliwitur-yeerddaklegedgi an
 danikoedgi,
 a-dulegi an bingegumogoed.

27 "Ar napira an bemarga soged, gwenna-gwenna wegi-bemar-bukmalad burgosulid, amba dula-gudii, Bab-Dummad-e-negdakmaid bese noni be dakedsegad."

Jesús-e-san-gwagsad

(Mateo 17:1-13; Marcos 9:2-13)

28 Jesús ibabaabakgus-e-burgoedgi-sunmaksad-sorba (8), Jesús, Pedro, Juan, degi, Jacobo-sesagusad. Bab-Dummadse-golega yar-birse nakwided.

29 Jesús Bab-Dummadse gorsigusgu, e-sandakleged gwageded, e-mor bela dagudik, dakar-dakar dakle naded. 30 Geb agi Jesús-sapingan-warbaagwadi dakarmalad, dulemar-epenne-dula-gudigusmalad, Moisés, degi, Elías, Jesús'mala

sunmakgwichi. ³¹ Amar, gwallu-meegwad-abargi, Jesús-Jerusalén'gi-burgoedgi-sunmakgwichi, degi, Jesús-we-napneggi-bangudoedgi-sunmakgwichi, dakarmalad.

³² Pedro, degi, baigan-eba-gudidimalad, gabed egi nue-obin itomar-inigwele, nue ataksamargu, Jesús-gangued-yeerdakleged daksamalad, degi, dule-warbo Jesús'ba-gwichid daksamarbalid. ³³ Degi, amar-warbogwad Jesús'gi bangudsokarmargu, Pedro, Jesús'ga sogded:

—Odurdaked-saila, we, anmar wegi gudiid nueddo. Anmar wegi neg-matargana-gwapaa sobmalodo: Gwagwen bega, baid Moisés'gar, geb baid Elías'garmo.

Ar ade, Pedro itosulid, yogsaar gole-gole gwichid.

³⁴ Ar weyob Pedro sunmakgwichi, mogir emar-birgi nagunonikid. Mogir emargi dognonigu, dobe itodmalad. ³⁵ Degi, mogir-imbaba gayaburba gollalid, sogded: “We An-Machi-sabedi gued. We, be nue-itomar.”

³⁶ Degi-sunmaked-bergusgu, Jesús-sapingan dakarmalad, unnila Jesús'bi wargwen gwichi. A-ibagangi, Jesús-sapingan dulemar-baiganga ibmar-daksamalad gwen sogsasurmalad, bela daksadi, odokusmalad.

Jesús machigwa-niaburba-nikad-nudaksad
(Mateo 17:14-21; Marcos 9:14-29)

³⁷ A-oibosadgine, Jesús na e-sapingan-warbaagwadmala yar-birgi-gudiidgi aidear-margu, dulemar-bukidar ese nonimalad. ³⁸ Agi

dule-wargwen, dulemar-bukidarad-abargi
binnasur gote, sogded:

—Odurdaked-saila, an-machi anga wis be dake,
ar webi wargwen an wis nikad. ³⁹ Dakargu,
burba-isgana an-machigi nagunonikir, binnasur
gotedaed, degine, binnasur wawanmakdedaed.
Gayaba maku-maku guardaed, burba-isgana
sabsur-imakdaed, degine, bar indakbisur
guardaed. ⁴⁰ Be-sapingangi an wilesanad, adi,
ega burba-isgana onogegar. Be-sapingan gwen
ega burba-isgana onossurmalad.

⁴¹ Jesús, abin-imakdegu, sogded:

—Bemar, Bab-Dummadgi-bengumalad-
dulemar. Bemar, Bab-Dummad-igar-oakaloged-
dulemar. ¿Sanase bemar-abargi an gudiguosunna?
¿Sanase mag be itomaloe? Budar an bemar-daked
danikid.

”Be-machigwa anse be sedage.”

⁴² Machigwa Jesús’s e danikidgi, niaburba
machigwa-balimeted, degi, binnasur
owawanmakded. Geb degi, Jesús burba-isganase
sabsur-uluded. Geb machigwa-onudaksasunnad.
Geb a-sorba, e-babga machigwa-uksasunnad.

Jesús ilabogus e-burgoedgi sunmaksad
(Mateo 17:22-23; Marcos 9:30-32)

⁴³ Bela dulemar, Bab-Dummad-e-gangued geger
dakedbimalad.

Bela dulemar Jesús-ibmar-imakedi, geger-
dakbukmaladgine, Jesús e-sapinganga sogded:

⁴⁴ “We an-ibmar-sogoedi nue be itomalo, mer
be iemalo. Ani Dule-Machi, an-oburgwemalaga
dulemarse uklegoed.”

⁴⁵ Weyob Jesús ega ibmar-sogedi e-sapingan aku itosmalad. Ar ade, emarga odukuar sunmaklesad, adi, aku-itomalagar. E-sapingan na dobed-bali Jesús'se egichissurmalad, wede ibi ega nue-obarena.

¿Doa bur-dule-dummadi?

(Mateo 18:1-5; Marcos 9:33-37)

⁴⁶ Geb degi, Jesús-e-sapingan na muchub-muchub abin-abin imakarmalad, doa-bur-dummadga guoye. ⁴⁷ Ar Jesús, e-sapingan-gwagebinsanaid mag daksagu, machi-bipi-wargwensusad. Geb e-nagaba ogwichisad. ⁴⁸ Agine, e-sapinganga sogded:

“Ar dule, an-nuggine we-machi-bipi-abingaele, an-abinganaido. Degi, ar dule, an-abingaele, dule-an-barmialid abinganaido. Ar ade, bemar-imbagi doa-bur-bipigwadi, a, bur dule-dummadid.”

*Jesús sogsad, anmargi-yoledisurmalad,
anmarba naiye*

(Marcos 9:38-40)

⁴⁹ Juan, Jesús-abin imakdegu, sogded:

—Odurdaked-saila, anmar dule-wargwennuggi niamar-onodii daksado. A-dule, anmar-sordasursoggu, anmar ega sogsado, mer bar Jesús-nuggi niamar-onogoye.

⁵⁰ Jesús, abin-sogded:

—Mer a-dule-ibe igar-bisgo. Ar dule anmargi yoledisulile, a-dule, anmar-sordado.

5. JESÚS, JERUSALÉN'SE NADAPIGUSAD

(9:51-19:27)

Jesús, Jacobo'ga, degi, Juan'ga sabsur ibmar sogsad

⁵¹ Jesús nibnegse-naed-e-ibagan warmaknon-igu, Jesús, Jerusalén'se nue-nae sokarsunnad.

⁵² Jesús igarba nadapgu, e-iduale dulemar-barmisad. Amar nadgu, Samaria-neggwebur-bipigwadse dogdapmalad, adi, agi guagwar idu neg-amimalagar. ⁵³ Ar dulemar-aginmaladi Jesús-Jerusalén'se-nadapid magar daksamarsoggu, gwen-abingassurmalad.

⁵⁴ E-sapingan Jacobo, degi, Juan, deyob daksamargu, Jesús'ga sogdemalad:

—Dummad, igi epenne Elías nibneg-akar soo odesa, ¿deyob anmar nibneg-akar soo odedabi be abege? Adi, wemar bela-ogumakegar.

⁵⁵ Geb degi, Jesús amarsik atakdegu, amarga sabsur sogded:

—Ar bemar wissulid igid-burba be gumala. ⁵⁶ Ar ani Dule-Machi, nonigua, dulemar-san-burba-obelogege an nonisulid. An nonikid, dulemar-san-burba-abonogegar.

Geb degi, Jesús na e-sapinganmala neggwebur-baidse nadmarsunnad.

Jesús'ba nabigusmalanad
(Mateo 8:18-22)

⁵⁷ Jesús na e-sapinganmala nadgua, dulewargwen igarba ega sokalid:

—Dummad, ar bia be naoe, an beba naiguoed.

⁵⁸ Jesús a-dulega sogded:

—Ar usmardi na e-gubya nikad, sikwimar-gukudimaladi na e-uu nikamarmogad. Ar andi Dule-Machi, neg sated.

⁵⁹ Jesús, dule-baidga sogded:

—An-sapinga-guega, anba be dage.

Dule abin-sogded:

—Dummad, bina an-babse an nagwelo, an-bab-burgwedse geb beba an naoed.

⁶⁰ Jesús ega sogded:

—Ar dulemar-burbar-bato-burgwar-gudidimaladi, na e-burgwarmalad digoed. Ar bedi, nae, Bab-Dummad-e-negdakmaidgi dulemarga be sunmaknae.

⁶¹ Geb degi, dule-baid Jesús'ga sogdemogad:

—Dummad, an beba naoed, ar bina an-neg-yaginmaladga degimaloye an sognagwelo.

⁶² Jesús aga sogded:

—Ar dule neg-imuddibe, gwen yarganba bar-ataksurdaed. Ar degisulile, dule yarganba atakele, e-napa-imunaid ega biir-biir imulego-itole.

10

Jesús dulapaa-gakambe (70) e-sapingan-barmisad

¹ Deyob we-ibmar-gusad-sorba, Jesús e-sapingan-baigan e-dulapaa-gakambe (70), bela na e-naoed-neggweburmarse ebo-ebo e-iduar barmisad.

² Jesús amarga sogded: “Napira an bemarga soged, nainugi ibmar-gwag-weleged bukidarad, ar e-weemaladdina ichee gued. Degisoggu, nainugi ibdula-gwag-weleged-e-ibedse be wilesakwaa egismar, adi, e-nainuse ibdula-gwag-wemalad-barmidagegar.

3 "Be namar, sibad-wawaad-sapingwagwadyob, achu-burburmalad-abargi, an bemar barmidmar. 4 Mer mor-sagu sedmalo, mani-sagu surbar, degi, sapat surbar, degine, melle igarba dule-absomarbalo.

5 "Ar doa-negse be dogdapmalale, agi bina be soggweloed: 'We-neggi bemar gwage-bogidikidgi gudigusunye.'

6 "Ar a-negGINE dule-gwage-bogidikidgi-nanaed maile, be-ega-sogsadyob a-dulegi gwage-bogidikidi beoed. Ar degisulirdi, ega-be-sogsadyob gwen guosulid. 7 Bemar unnila neg-gwagwenginbi be gabmaloed. Degine, ibu bemarga gunnega, gobega ukarmardibe, be gunno, be gobo. Ar ade, dule-arbaedi bennuklegergebed. Mer neg-baid-baidgi gabdii gumalo.

8 "Ar biti-neggweburse be dogdapmardibe, agine, be-abingasmalale, ibi-masgunned bega ukarmalale, be gunnoed. 9 A-neggweburgi dule-gegumaladi be nudakoed, degine, dulemarga be sogoed: 'Bab-Dummad-e-negdakmaid bemarse warmaksasunye.'

10 "Ar biti-neggweburse be dogdapmardibe, agine be-abingassurmalale, be e-galimbaba noalidgi, be sogmaloed: 11 'Be-neggwebur-olli-anmar-sapatgi-nagusadse-bakar, anmar elimarsun. We oyoged, bemarginye, bemar yapa Bab-Dummad-igar-abingamaladye. Degi-inigwele, be wisgumalo, Bab-Dummad-e-negdakmaid bemarse warmaksad.'

12 "Ani, Jesús, an bemarga soged, Bab-Dummad-igar-nabogoed-ibagangi, neggwebur-

be-abingaosulid, Sodoma-neggweburba bur bule sabsur-odurdaklegoed.”

Jesús neggweburmar-sabsur-odurdaklegoedgi sunmaksad

(Mateo 11:20-24)

¹³ Jesús sogdebar: “¡Corazín-dorgan be duledar-wilesmar! ¡Betsaida-dorgan be duledar-wilesmar! Ar bemar sabsur-odurdaklenonikoed. Ar Tiro-neggweburgi, degi, Sidón-neggweburgi we-ibmar-dakledisurmalad imaklesana, a-neggweburmar bato dikasurgus sagumor-ai-aid yosmalanad, degine, burugi obsamarbalinad, adi, oyogegar, emarde, na e-isguedga bukib ulubgi nueitosmarye. ¹⁴ Degisoggu, an bemarga sogsun, Bab-Dummad-igar-nabogoed-ibagangi, bemar bur bule Tiro-dorganba, degi, Sidón-dorganba sabsur-odurdaklemaloed.

¹⁵ ”Emide, bemar Capernaúm-dorgan, ¿nibneggi, nued abingalegoye be binsamala? Suli. Aka be nega-uluba odurdakleged-negse be balimelled-maloed.”

¹⁶ Jesús, dulapaa-gakambe-barminaidga (70) sogdebar: “Ar dulemar be-itomalale, an-ega-ibmar-soged-itonaiyob gumalodo. Ar dulemar be-abingasurmalale, an-abingasurmalayob gumalodo. Ar dulemar an-abingasulile, dule-an-barmialid-abingasurmardo.”

Jesús-sapingan gannar Jesús'se nonikid

¹⁷ Jesús e-dulapaa-gakambe-barmisadi (70), gannar nonimargu, ise-weligwar-ito nonimalad, Jesús'ga sognonimalad:

–Dummad, niamarse-bakar, be-nuggine anmar-sogedba ibmar imaksamalah.

18 Jesús amarga sogded:

“Mer be na san-dummarba itomalo. Nia-saila-Satanás, mar-gaedyob nibneggi argwannali an daksad.”

19 Jesús e-sapinganga sogdebar: “Emide, be-marga gangued an uked, naibemar-birgi, degine, diormar-birgi annaegar. Degine, bela be-isdarad-Satanás-ganguedgi-nakwega bemarga gangued an uked. Amar gwen be-oakalogosurmalad. 20 Degi-inigwele, niaburbamar bemar-sogedba ibmar-imakedgi mer be weligwar itomar. Bur be bemar-nug-nibneggi-narmakar-naid-ular be wer-gumar.”

Jesús nue-weligwar itosad

(Mateo 11:25-27; 13:16-17)

21 Geb agi Jesús, Bab-Dummad-Burba-Isligwaledba nue-weligwar ito naded, sogded: “Baba, an be-nug odummosun. Bedi, nibneg-e-dummadid, napneg-e-dummadid, degine, bedi, dulemar-ibmar-wismalad-idu, dulemar-ibmar-magar-itomalad-idu, we-ibmarmar odukusad, aku-ito be imaksad. Dulemar-baisursunnagwadga bur be osanalosad, adi, amar magar itomalagar. Eye, Baba, ar ade, deyob be abesad.”

22 Jesús sogdebar: “Bela-ibmarmar an-Bab anga uksad. Dulemar wargwensaar Bab-Dummad-Machi-mag-daked satemalad, unnila Bab-Dummadbi mag daked, degi, Bab-Dummad-akudakmarbalid. Unnila E-Machibi mag Bab-daked, ar doaga E-Machi na e-Bab-osanalobie, agarbi na osanaloged.”

²³ Jesús na e-sapinganse aibilidgu, amargarbi sogded: “Dulemar bema-ibmar-dakedyob-dakmarmogadgi egi ise-nued binsalesad. ²⁴ Ar ani an bemarga sogmalad, bukidar Bab-Dummad-gayaburba-barsogmalad, degi, reymar, emi-bema-ibmar-daked, dakbigusmalanad, amar gwen daksasurmalad, degi, amar emi-bema-ibmar-itoged, itobigusmalanad, amar gwen itossurmalad.”

Samaria-dule-nuedgi Jesús sunmaksad

²⁵ Agine, Moisés-Igar-Mamaid-oduloged-wargwen, gwisgualid, Jesús-yardakega yamo sogded:

—Odurdaked-saila, ¿burba-geg-bergued an nikuegala, ibu an imakergebe?

²⁶ Jesús, abin-sogded:

—¿Bab-Dummad-Igar-Maidgi igi narmakar maisunna? ¿Igi be absodisunna?

²⁷ A-dule, abin-imakdegu, sogded:

—‘Bab-Dummad-be-Dummadbi,
bela-belad be-gwagegi be sabguoed,
bela-belad be-san-burbagi,
bela-belad be-ganguedgi,
bela-belad be-binsaedgi be sabguoed.’

Deuteronomio 6:5
” ‘Ar igi na be san-sabgue, deyobi dule-baid be sabgumogoed.’ ”

Levítico 19:18

²⁸ Jesús aga sogded:

—Nued be an-abin-imalsad. Ar be sogsadyob be imakdo, geb agi be degisadegu dula gudiguoed.

²⁹ Ar Moisés-Igar-Maid-oduloged-nue-wisid na dukin dule-nuedga-imakbisoggu, Jesús’ga sogded:

—¿Degite, doa-dule-baid an sabguergebsunna?

³⁰ Jesús, abin-imakdegu, sogded:

“Ibagwengi, dule-wargwen Jericó-neggweburse, Jerusalén-neggweburgi aidedani gusad. Igarba danigu, atursamalad-argangi gusad. Atursamalad sarsosmargu, bela ei ibmar susmalad, burgwedani mete nadmalad.

³¹ ”Dakargu, Judío-wargwen, dule-irwa-Bab-Dummadse-goled, a-igarba aidedani gusad. Dule-naibigus-mellemaid-daksagu, egi bakar nasad.

³² ”Amba deyob Judío-baid, dule-irwa-Bab-Dummadse-goled-e-bendaked-Levita-dule, dule-naibigus-maid-walikgusgu, daksamogu, egi bakar nasa gusmogad.

³³ ”Ar dule-wargwen, Samaria’gined, igarba nadapmogu, dule-naibigus-maid-daknonimogad. Ar we-dule, Judío’sur-inigwele, dule-naibigus-maid-dakdegu, nue-wile dakded. ³⁴ Samaria’gined dule-naibigus-maidse-warmakdapgu, e-nailikgusmaladgi ega ina imaksad, ibmar-gwallu, degi, vino, egi eosad. Geb degi, ega nue-morgogi edichabalid. Geb moli-uayasuid-birgi-onakwisa meged-negse senonikid. Agi nue-akwisad.

³⁵ ”A-banedgine, Samaria’gined nasokargu, mani-gwabo onosad. Neg-dakedga mani uksad, geb ega sogded: ‘Nue we-dule be anga ako. Degine, igi-mani-napi egi be misale, gannar an aibilisar, an be-bennuknonikoed.’ ”

³⁶ Moisés-Igar-Maid-oduloged-nue-wisidga Jesús sogded:

—Be itogua, we-dulemar-e-warbaagwad ¿doa bur dule-nailikgusad sabedgi bendas be itosunna?

³⁷ Moisés-Igar-Maid-oduloged-nue-wisid Jesús'ga sogded:

—Ar dule bur-nue dule-nailikgusad-wiledaksad, a-dule, bur dule-baid nue-sabgusdo.

Geb degi, Jesús ega sogded:

—Igi-Samaria'gined dule-baid-bendaksad, deyob be imaknamosundo.

Jesús, Marta'se, degi, María'se atakapid

³⁸ Jesús na e-sapinganmala igarba nadapgu, neggwebur-gwensakse dogdapid. A-neggweburgi ome-wargwen, Marta'ye-nugadi, e-neggi Jesús-abindaksad. ³⁹ We-omede urba-nikad, María'ye-nugad. María, Jesús-walik sigisad, Jesús-ibmar-odurdaked itosii gusad. ⁴⁰ Ar Marta'di ibmar-saedginbi binsanaisoggu, obir-obir gunaid. Marta, Jesús'ga sogded:

—Dummad, an-urba wargwen arbaega-an-imaknaid ¿be baisur dake? Ega be soge, wis an-bendakye.

⁴¹ Jesús, abin-imakdegu, ega sogded:

—Marta, Marta, ibmar-imakedba be surbinsa itonaid, obir-obir be itonaid. ⁴² Ar unnila ibmar-soggwenbi bur-nuedid. Ar María'di ibmar-soggwen-bur-nued susad, an-sunmaked-itoged. A-ibmar María'gi gwen egwallegosulid.

11

*Jesús, Babse-goledgi e-sapingan-odurdaksad
(Mateo 6:9-15; 7:7-11)*

¹ Ibagwengi Jesús neg-soggwengi Bab-Dummadse-gorsiid-bergusgu, e-sapin-wargwen ega sokalid:

–Dummad, Bab-Dummadse-goledgi be anmar-odurdake. Igi Diigi-dule-oged-Juan e-sapingan-odurdaksamoga.

² Jesús, ega sogded:

–Be Bab-Dummadse gollarmalar, weyob be sogmaloed:

‘Anmar-Bab, bedi nibneggi-maid, be-nug islidik obariledii gusun.

Be-neg-dakmaid anmarse be sedage.

Igi nibneggi be-sogedba ibmar-imaklege,
deyob we-napneggi be anmarga imakdamo.

³ Bane-bane anmarga mas ukmai be sae.

⁴ Anmar-begi-isgusadi anmarga be osulo,
igi dulemar anmargi nosale, anmargi-
nossulidyob anmar dakdae,
deyob be anmar-dakmoga.

Melle isguedse-wilubdaklegega be anmar-imak,
bur isguedgi-obinega be anmar-sae.’

⁵ Jesús e-sapinganga sogsabalid: “Binsa-sogmalo, bemar-wargwen ai-gwensak be nikasunnad, degi, nega-gabigwengi ese be nadsunnad, ega be weyob sogdapsunnad: ‘An-ai, madu-walapaa be anga wis udagwer. ⁶ Ar an-ai-gwensak dikasur-danikid, anse ataknonikid. Emide, ibmar-an-ega-uked, sated.’

⁷ ”Dule negyaba-maid be abin-imakarsunnad: ‘Mer be anse gole, an-yawagak bato atiar-sii, bato anmar gabmamai, an-mimmigan bato anbo gabmamaimogad. An bega madu-ukega geg bar an gwisgued.’

⁸ "Ani Jesús, an bemarga soged: Ar be-ai-inigwele, bega gwisgusulile, ar egi be alamak-naidba bega gwisgualiled, adi, be-ibmar-abeged bela bega ukegar.

⁹ "Degisoggu, an bemarga sogdo: Bab-Dummadse be ibmar egismar, ar Bab-Dummad bega ukoed. Bab-Dummadgi be ibmar amimar, be amimaloed. Bab-Dummadse gatik be gormar, bega Bab-Dummad yawagak egaoed.

¹⁰ "Ar bela dulemar-ibmar-egismaladi, ibmar abingamalad. Bab-Dummadgi-ibmar-amimaladi, ibmar amimalad. Degi, Bab-Dummadse gatik golele, ega yawagak egaleged.

¹¹ "Bemar abala babgan-gumaladi, be-mimmi bese madu egichialile, ¿ega be akwa ukoe? Bese ua egichialile, ¿ega be naibe ukoe? ¹² Bese gannir-akwa egichialile, ¿ega be dior ukoe? Suli. Ar e-ibmar-abeged ega be ukhaled. ¹³ Ar bemarde, dule-isganamar-inigwele, be-mimmiganga ibmar-nuegan-uked be wismalad. Ar be-Bab-Nibneggi-Maid-bursunna, dulemar-ese-egismaladga E-Burba-Isligwaled ukodo."

Jesús nia-saila-sogedba niamar-onodiye sogmalad

(Mateo 12:22-32; Marcos 3:20-30)

¹⁴ Ibagwengi Jesús dule-geg-sunmakedgi nia-ononaigusad. Nia dulegi nodgu, dule nabir-sunmak naded. Dulemar, degigusad geger dakdemalad.

¹⁵ Gwenna-gwenna sogdemalad: "Wedi nia-saila-Beelzebú-sogedba niamar-onodiid."

¹⁶ Baigandi, yamo Jesús-wilubdakega ega sokarmalad, ega Bab-Dummad-ganguedba

ibmar-wilubgan-dakledisulid imakye. Adi, nue wisgumalagar, Bab-Dummad-nuggi nue-ibmar imakdiye.

¹⁷ Ar Jesús'di, emar-binsanaid mag daksoggu, amarga sogded:

“Rey-gwensak-negsemaid-e-sordagan na dukin-dukin egi aibinnarmalale, we-yar bergudeled. Aginbali, dulemar-na-e-neg-yaginmalad na dukin-dukin egi aibinnarmalale, we-neg bergudeled. ¹⁸ Ar ambamodo, nia-saila-Satanás na dukin egi aibinnalir, ¿sunna na e-negdakmaid bergussulir be insae? Bergudele. Emide, bemar sogmalad, Beelzebú-nuggi an niamar-onodiye.

¹⁹ ”Ar ani, nia-saila-Beelzebú-nuggi an niamar-onodiile, ¿be-sapingandi doa-nuggi niamar-onodisunna? A-ulale, be-sapingan bemargi gwisgumaloed.

²⁰ ”Ar an Bab-Dummad-sogedba niamar-onodiile, we bemarga oyonaido, Bab-Dummad-e-negdakmaid bemarse warmaknoniye.”

²¹ Jesús sogdebar: “Ar dule-wargwen-dutusulid, guagwar na es-suid-gani e-neg akwediile, na bela e-ibmar-neggi-nikad dule geg ei atursaed.

²² Ar dule-baid eba-bur-dutusulid nonikirdi, egi nakwenonikile, bela gingimar-e-bendakoye-binsaedi ei susaled. Geb bela e-aimarga mimisaled. Ani Jesús, an deyobmodo, ar an-bur-dutusulid. Nia-sailagi an obinsoggu, sunna niamar an onosundo.

²³ ”Ar dule anba dasulile, angi gwisgudido. Ar dule anga dulemar-danar-urbedisulile, bur we-

dule, dulemar-ichodido, adi, mer anba nagumalagar.”

*Burba-isgana-nosad, gannarse nonidaed
(Mateo 12:43-45)*

²⁴ Jesús sogdebar: “Ar niaburba dulegi nodele, neg-dinnaganaba obunnoged-neg amididaed. Ar neg-obunnoged amisulile, sokardaed: ‘An-neg an mete-alidse gannar an dognaoye.’

²⁵ ”Ar e-negse na modapogu, dakdapoed, nue neg durwiar sii, degi, nue neg nudakar sibali.
²⁶ Geb degi, niaburba, deyob daksale, gannar naodo, e-sordamar-walagugle (7) eba-bur bulegandamalad sedagegar. Niaburbamar a-negse dognonimalogu, na e-negga imakdemaloed. Ar dule epenne-e-daedba aka bur bule isgudsunnodo.”

¿Doagi bur-nued binsalesa?

²⁷ Ar Jesús deyob sunmaksigu, dulemar-bukidar-bukmalad-abargi ome-wargwen binnasur-gote, Jesús’ga sogded:

—Ome-we-napnegse-be-senonikid, degine, e-nuugi-be-onusad, a-omegi bur-nued binsalesad.

²⁸ Jesús, abin-sogded:

—Dulemar Bab-Dummad-gayaburba-itomaladgi, degi, a-sogedba nanadimaladgi Bab-Dummad bur-nued binsasad.

Dule-isganamar ibmar-dakledisurmamad dakbidamalad

(Mateo 12:38-42; Marcos 8:11-13)

²⁹ Dulemar-bukidar ese duurmaknonimargu, Jesús sogded: “Emi-ibagi we-dule-isganamar,

unnila ibmar-wilubgan-dakledisurmalad-oyolegedbi amidimalad. Ar a-e-wilubgan ega oyolegosulid, ega bur Jonás-gusadyob oyolegoed.

³⁰ "Ar igi Jonás Nínive-dorgan-e-wilubganga-gusa, deyob, ani Dule-Machi, dulemar-emi-dula-gudidimaladga oyolemoged.

³¹ "Dad-nakwed-argan-nuedsik Rey-bundor-negdakmaidi, Bab-Dummad-igar-nabogoed-ibagangi, bemar-emi-dula-gudidimalad-abargi gwisgudagogu, sabsur-bemar-odurdakye sogdagoed. Ar ade, we-omegwa bela-bela dikasur dani gusad, dad-Salomón dule-binsaed-ibed-nikad itogegar. Ar emigindi, Salomón'ba bur bule dule-binsaed-nikad wegi bemar-abargi gudiid. Ar degite, bemardi, an-itobisurmalad.

³² "Machergan-Nínive'ginmalad, Bab-Dummad-igar-nabogoed-ibagangi, we-dulemar bemar-emi-dula-gudidimalad-abargi gwisgudagogu, sabsur-bemar-odurdakye sogdagoed. Ar ade, Jonás, Bab-Dummad-igargi sunmaksagu, Nínive-dorgan na e-isguedga bukib binsas gusmalad, na e-daed gwagsamalad. Ar emigindi, Jonás'ba bur bule dule-dummad wegi bemar-abargi gudiid. Ar degite, bemardi, be-isguedga na be bukib binsasurmalad, be-daed na be ogwasurmalad."

*Ihya gwallu-neg-mee-saedymb gued
(Mateo 5:15; 6:22-23)*

³³ Jesús sogdebar: "Ar dule gwallu ogasale, odukuenga ogasulid. Ulu-urba-sigega ogasurbalid, e-sied-birgi-siega ogaed. Adi, dulemar-ubomaid mag neg dakegar.

³⁴ "Gwallu-anmar-san-mee-saedi, we, anmar-ibyado. Ar be-ibya nuedile, bela be-san ibegwar naido. Ar be-ibya isganale, bela be-san negsichidgi gudimodo.

³⁵ "Degisoggu, nue be salakarmar. We-neg-meegwad-begi-naidi, melle negsichidga-gued be imakmar. ³⁶ Ar degisoggu, bela be-san ibegwalele, negsichid egi naisulile, bela ibegwar guodo. Ar igi gwallu bela ibegwar neg-imake, deyobmodo."

Jesús, Fariseo'margi, degi, Garda-Narmaked-Dulemargi sunmaksad

(Mateo 23:1-36; Marcos 12:38-40; Lucas 20:45-47)

³⁷ Jesús sunmaked-bergusgu, Fariseo-wargwen ese nonikid, e-negse mas gunnaega egi wilenonikid. Jesús a-Fariseo-negse dogdapgu, mas-gunnega mese-naba signonikid. ³⁸ Fariseo, Jesús-daksagu, masgunned-idu gwen argan enuksasuli, geger dakded.

³⁹ Ar Jesús'di ega sogded:

"Nabir, emi bemardi, Fariseo'mar, asginbi be dule-nuedga-imakmaladid. Bemar unnila asginbi nog-enuklegedyobid, degi, asginbi bate-enuklegedyobid. Ar be-ulubgindi, ibmar-atursamalad-dule gumalad, degi, galagwensulidamalad-dule gumalad.

⁴⁰ "¡Bemar nue-akusunna-itomalad! Ar Bab-Dummad ibmar-asgined imaksadde, ¿ar a amba ibmar-ulubgined imaksabarsursi? ⁴¹ Degisoggu, be-ibmar-nikad, wileganaga be ukmar, geb degi, bela bega ibmar swilidik guoed.

42 "Ar bemar-Fariseo'mar, ¡be duledar-wilesmar! Ar unnila bemar Bab-Dummadga we-ibmarmar ukdimalad:

Menta'ye-nugad,

ruda'ye-nugad,

degi, gagan-nuegan-nabir-gullemaalad.

We-ibmarmar ambegi-gwensak (10%) unnila Bab-Dummadga be ukdimalad.

"Ar bur dulega-igar-nudaked be imaksurmalad, degi, Bab-Dummad-sabgued gwen be imakdis-urmarbalid. Ar bemar we-ibmar-sogbogwad-imaked bur nabirid, degine, amba nabir Bab-Dummadga-ibmar-baisursunnamalad-ukleged be imakbalid.

43 "Ar bemar-Fariseo'mar, ¡be duledar-wilesmar! Ar bemar Judío'mar-onmakedneggi dummagang-gan-sigedginbi sigbidamalad, degi, ibmar-ukleged-neggi dulemar bela bese goledbimalar, bemar yeer-itodamalad.

44 "Ar bemar-Garda-Narmaked-Dulemar, degi, Fariseo'mar, ¡be duledar-wilesmar! ¡Be yogasaar-darba-sunmakmaladid! Be neg-uan-akudaklemamaidyobmalad. A-neg-uan-birgi dulemar nanadimalad wissurmalad."

45 Moisés-Igar-Maid-oduloged-wargwen, Jesús'ga sogded:

—Odurdaked-saila, weyob be ibmar sogele, an-margi nue be gwisgumogad.

46 Jesús, abin-sogded:

—Ar bemar Moisés-Igar-Maid-odulomarmogadi, ¡be duledar-wilesmarmo! Ar bemar dulemarga

beedse-dutusus igar mesmalad. Ar degite, bemark-igar-mesisadba dulemar-nanaegala, gwen be bendaksurmalad.

⁴⁷ "iAr bemark duledar-wilesmar! Ar be-dadgan Bab-Dummad-gayaburba-barsogmalad-oburgwismalad-e-neg-uan be sobdimalad.

⁴⁸ Degisoggu, bemark-sunnad nue wismar-modo, degine, be-dadgan-ibmar-imaksad, Bab-Dummad-gayaburba-barsogmalad-oburgwismalad, be nabir-dakmalad-dulemalad. Ar e-neg-uan ega be sobdimalad.

⁴⁹ "A-ulale, Bab-Dummad bela-bela binsaed-nued-nikadba sogsabalid: 'An amarga anga-gayaburba-barsogmalad, degine, an-sapingan-bur-dummagan, an barmidoed. An-dule-barmismalad gwen-gwen oburgwemaloed, degine, abar dulemarse-balegilledii gumaloed.'

⁵⁰ "Deyob bemark imakoed, adi, bela, gebesaila napneg-naguded-akar be-dadgan Bab-Dummad-gayaburba-barsogmalad-oburgwisgusmalad, bemarki ataklemaloed. ⁵¹ Abel-oburgwilesad-akar, Zacariás-oburgwilesadse, emi bemark-dulagudidimaladgi dulemar-oburgwilesmalad begi ataklemaloed. Deun, be-dadgan Bab-Dummadga-ibmar-ogumakar-ukleged-aila-siid, degi, Bab-Dummadse-goled-neg-sunnad-siid-abargi Zacariás-oburgwisgusmalad.

⁵² "Ar bemark, Moisés-Igar-Maid-odulomaladi, ibe duledar-wilesmar! Ar bemark Bab-Dummad-igar-wisgulegoed-yabe be susmalad, degi-inigwele, bemark Bab-Dummad-e-negdakmaid-e-dulamarga gwen-gussurmalad, degine, dulemar-

Bab-Dummad-negdakmaidse-dogbimaladga igar-dutusus bemar mesdimalad.”

⁵³ Ar weyob Jesús sogsagua, Garda-Narmaked-Dulemar, degi, Fariseo’mar nue-sae-itodmaladbali, Jesús-gatik-sunmakega imakdemalad. ⁵⁴ Dakega, abakalegi Jesús ibmar-wis-akar sokalile, adi, Jesús-ibmar-sogedgi egi sorba gwisgumalagar.

12

Jesús sogsad, Fariseo’mar-odurdakedgi nue-salakarmarye

¹ Degidgine dule-bukidar mili-miliba Jesús’sé nonimalad, barmesnanai guarmalad, degidgine, Jesús e-sapinganga-inse sokalid: “Fariseo’mar-madubur-inagi, nue salakarmar, ar amar yogasaar-darba-sunmakdamalad.

² ”Ar bipisaale ibmar-dukuar-imaklegedi magadse buud noosurdeeye gwen soglesulid, degi, ar emi amba ibmar-dukualed, wisgulego-surdeeye gwen soglesulid, wisgulegedsedaed.

³ Ar degisoggu, bela negsichidgi be-ibmar-sogsad, gwallu-meegwadse onolegoed. Ar na be-binnaa uayagi negyaba ise yawagak-edualedgi be sogsan-inigwele, be-ibmar-sogsad neg-uas-birgi binnasur soglegoed.”

*Bab-Dummad bur be dobgumar
(Mateo 10:26-33)*

⁴ Jesús sogdebar: “An-aimar, an bega sogmar: Dulemar-be-oburgwebimalad mer be dobgumar. Ar a-sorbardina, geg bar be oakalomalad. ⁵ An

be-odurdakmaloed, doa bur bemar dobguewil-ubmala. Bur Bab-Dummad be dobgumar, ar adi, be-oburgwisale, a-sorba sunna soo-saila-geg-berguedse be-metebalid. Eye, nabir an bega sogmar, bur Bab-Dummad be dobgumar.

⁶ "¿Ar ade sikwi-gwaatar esnon-gwabogi uklesursi? Ar degite, Bab-Dummad sikwi-gwagwensaale iemaisulid. ⁷ Ar Bab-Dummad bemar-sailagiase-bakar, bela-ebisar sediid. Degisoggu, mer be dobgumar, ar bemar bur bule sikwimarba ibmar-nueganad."

⁸ Jesús sogdebar: "An bega sogmar, ar doa-dule dulemar-asabin na sogdibe, an Cristo'ba naiye, ani Dule-Machi, Bab-Dummad-baliwiturmar-asabin, an sogmogodo, we an-sordaye. ⁹ Ar doa-dule dulemar-asabin an-osulosardi, Bab-Dummad-baliwiturmar-asabin an osulomogodo.

¹⁰ "Ar bela dulemar Dule-Machigi isganasunmaksadibe, Bab-Dummad sunna amarga isgued elioed. Ar dule Bab-Dummad-Burba-Isligwaledgi galagwensuli egi dodoar sunmaksardi, adi, e-isgusad Bab-Dummad ega gwen eliosulid.

¹¹ "Dulemar Judío'mar-onmakednegse be-senonimalar, igi dulemar-igar-nabiromaladsedibe, degi, dummagambaigansedibe bega igar-itomalaga, mer be bukib binsamalo, ibi an sogodibeye, degi, igi an sunmakodibeye. ¹² Ar be sunmak-sokalile, Bab-Dummad-Burba-Isligwaled bemarga sogoed, igi be sogoe."

Dule-mani-ibed, Bab-Dummadgi gwen binsasulid

¹³ Dulemar-bukidar-bukwad-abargi dule-wargwen Jesús'ga sokar:

—Odurdaked-saila, an-iaga be soqe, an-bab burgwisgu, anmarga-ibmar-obesad, anga udamoye.

¹⁴ Jesús'di, abin-sogded:

—Dule, ¿doa igar-naboged-dummadga an-nug-imaksa? Bemarga ibmar-mamarega, ¿doa ibmar-mimied-dummadga an-nug-imaksa?

¹⁵ Degi, Jesús dulega sogdebar:

—Nue salakar, ibmar-we-napneggedbina-yaisur-itogeddaedgi nue salakarmar, ar ibmar-ichesur-nikadgi dule san-dula-gudiguosulid.

¹⁶ Geb degi, Jesús emarga burbar sunmakde, sogded: “Dule-mani-ibed ibmar-yaisur-nikad, e-nainugi ibmar-digsagu, ega nue-sanmaksado.

¹⁷ Na wargwen dukin ulubgi binsadii, sogded: ‘¿Igi an saoe, ar bia an ibmar-gwag an sabogoe?’

¹⁸ ”Na sogdesun: ‘Weyob an saoe, ibmar-gwag-saboged-neg an earoed, bur-dummad an soboed, agi an bela ibmar-gwag, degi, an-ibmarmar an sabogoe. ¹⁹ Geb degi, an na ga dukin sogoed: Na ibmar-bukidar bega birga-ichesulidba an sabos, degisoggu, be obunno, be gobe, be mas gunne, be wergusun.’

²⁰ ”Ar Bab-Dummaddi a-dulega sogdedo: ‘Be dule-aku-ibmar-itoged-dule, emi-mutikidba besan-burba an sudanikir, be ibmar-urbisad, ¿degite, doagadga guosunna?’ ²¹ Ar dule deyob gunonidado, unnila na dukin egadga ibmar urbed, ar Bab-Dummadgindi gwen binsasulir.”

*Mer surbinsa be itomalo
(Mateo 6:25-34)*

²² Geb degi, Jesús na e-sapinganga sogded: “Degisoggu an bemarga sogmar, mer surbinsa be san-dula-gudiidgi be itomar, ibu an gunnodibeye, degine, be-sangi mer be binsabar, ibu an yoodibeye. ²³ Ar be-san-burba mas-gunnedba bur sun-sogeded, degi, be-mor-yoedba bur nueded.

²⁴ ”Emi be dakmalana, sikwisichidmar, gwen ibmar-gwag digdisurmalad, degi, ibmar-gwag gwen sabogega wedisurmarbalid, deginbali, ibmar-urbed-neg satemarbalid, degi, ibmar-gwag-urbed-neg amba satebalid. Degite, Bab-Dummad ega mas ukmaid. Ar bemarka sikwimarba bur bule ibnueded. Degisoggu, Bab-Dummad bemarga masgunned ukmogodo.

²⁵ ”¿Ar doa-dule na gatik egi binsaedbali sunna na e-san bisgigwen osugusar be insae? Suli, geg osugue. ²⁶ Degisoggu, melle be ibmar-baiganbina surbinsa itomala.

²⁷ ”Be dakmalana, sapur-dutumar ibibayobi dunguddae, gwen arbasurmalad, gwen na e-mor sobsurmarbalid. Ar an bemarga sogmardo, degite, Salomón, bela mor-yeerdaklemalad-yosan-inigwele, ar dutumaryob gwen mor yossurgusad, dutumar bur Salomón-morba yeerdakleged. ²⁸ Ar gagan-sapurbarmalad emi dulad, banedgi bato agaganmarde soo-yagi ogumaklesiid. Degite, Bab-Dummad yeerdakle ega mor yoed. Ar bemarka amba Bab-Dummadgi-benmar-inigwele, degite, Bab-Dummad bemarga mor uked.

²⁹ ”Degisoggu, mer be bukib binsamar, ibu an gunnodibeye, ibu an gobodibeye. Melle surbinsa

be itomar.

³⁰ "Ar dulemar-we-napneggi-Bab-Dummad-wissurmaladi, we-ibmarmar amidimalad. Ar be-Bab be-wisid, be we-ibmarmar abemala.

³¹ "Bab-Dummad-e-negdakmaid-inse bur be amimar, geb bela bega we-ibmarmar uklemai guoed."

*Dulemar, nibneggi ibmar-nuegan-nikuoed
(Mateo 6:19-21)*

³² Jesús sogdebar: "Mer be dobguumar, ar be-mar an-sibad-wawaad-ichegwadyobid. Ar be-Bab nabir na e-binsaedbali bemarga na e-negdakmaid ukoed.

³³ "Ibmar-nikamalad na be ukmarsun, degine, wileganaga mani be ukmar. Mani-sagu-gegnungued be sobmar, ibmar-nuegan geg-nibneggi-berguedgi be urbemar. Nibneggi atursamalad sated, degine, geg ibmarmar udumesed.

³⁴ "Ar be-ibmar-nuegan nibneggi sabolesiile, nibnegginbi be binsadii guoed. Be-ibmar-nuegan napneggi-sabolesiirdi, napnegginbi be binsadii guoed."

*Dule-nakulediid
(Mateo 24:43-25:13; Marcos 13:33-37; Lucas 12:39-46)*

³⁵ Jesús sogdebar: "Bemar guagwar gudii samar, igi-dule-arbamalad guagwar molidub-nai e-sasirba gudidamala, degine, be gwallu guagwar ogaar simar, we-a sogledo, be guakwaa gudigumarye. ³⁶ Igi dulemar, na e-dummad-ome-nikued-ibase-nader, guagwar edarbedii damala, adi, e-dummad gannar danikile, ese gornonikile, yawagak ega yog egaar imakmalagar.

37 "E-dummad nonikile, e-idu e-maimar guagwar sii daknonikile, we-maimargi nued-binsaodo. Ar napira an bemarga soged, e-dummad na dukin molidub e-sasirba edinnoed, agine, mese-nagaba e-maimar-osioed, na e ega mas-daknai guoed.

38 "Ar e-dummad neg-gabgwengi nonikodibe, bolegwadbardibe, daknonikir nue-nakulebukwa, we-maimargi nued binsalegodo."

39 Jesús sogdebar: "We-igar nue be itomalo, ar dule-neg-ibed wisile, igi-wachigi atursaed danikoe, idu guagwar sigisaled, ei-ibmar atursaega imaksasuliled. 40 Degisoggu, bemar guagwar gudii samar. Ani-Dule-machi, ukiagwale, bemar an-abindakdisulidgi an nonikoed."

Mai-nued, degi, mai-isgana
(Mateo 24:45-51)

41 Geb degi, Pedro, Jesús'ga sogded:

—Dummad, ¿we-burbar-anmarga-be-ibmar-sogsad, anmargarbi be sognai? ¿Dule-baiganga be sognaimoga?

42 Degi, Dummad-Jesús abin-sogded: "¿Ar doa degite mai-nued, nue binsaed nikaa, geg galakuedga guosunna? Mai-deyobidi, na e-dummad na e-neg-dakega nugsaoedo, adi, wachi-sekalaa mai-baiganga masgunned dakegar. 43 E-dummad gannar nonikile, daknonikile, nue deyob arbanai, we-maigi nued binsaodo."

44 Geb degi, Jesús sogded: "Napira an bemarga soged, mai-e-dummad bela na e-ibmar-nikadi we-maiga ukoed, bela ega ibmar dakegar."

⁴⁵ Jesús sogdebar: “Ar we-mai, na e-gwagegi sokardibe: ‘An-dummad amba yoggumaiye.’ Geb agi, mai-machergan, degi, mai-omegan-sarsoalid, degi, yaisur mas-guted, yaisur-gobded, degi, mumguded, ⁴⁶ geb a-ibagi a-wachigi e-dummad-danikoed-edarbesisulidgi e-dummad nonikoed. Geb deyob-gudidaknonikile, e-dummad sabsur-odurdaknonikodo. Igi dulemar-Bab-Dummad-wissurmalad sabsur-odurdaklege deyob odurdaklemogodo.

⁴⁷ ”Ar we-mai, igi-e-dummad-ibmar-abedaed wisinad, degi-inigwele, guagwar gudigussulid, degine, e-dummad-sogedba ibmar imaksasulid. Degisoggu, sabsur odurdaklesunnodo, ichesur bibyolesunnodo. ⁴⁸ Ar dule-wargwendi ibmar-odurdakleged-imaksan-inigwele, wissulidba deyob imaksasoggu, unnila ichee wis bibyologodo. Ar ade, dule-wargwenga ibmar-ichesur imakega ega uklesale, ase ibmar-ichesur egislemogoed. Ar ichesur ega ibmar-akwed ega uklesale, ase bur bule ese egislemogoed.”

*Jesús-ular, muchub-muchub urwenai-gumaloed
(Mateo 10:34-36)*

⁴⁹ Jesús sogdebar: “We-*napnegse* soo-ogaega an nonikid. ¡Bato we-soo gamaina yeerban! ⁵⁰ Nue an dummad-wilegergebéd. An nue-wile-itogoedsega an nue-wile itodii guoed.

⁵¹ ”Ar we-*napnegse* an nonikidi, ¿*napneg* bogidik-saega an noni be insae? Suli. Aga an nonisuli. An nonikidi, dulemar na muchub-muchub urwed onogegar.

⁵² ”Ar emi-onodoedgi,

gwenadgan-ataledi, e-warbaagwadi, e-
gwenadgan-warbogwadse urwenanai
gumaloed.

Gwenadgan-warbogwadi, e-gwenadgan-
warbaagwadse urwenanai gumarmogoed.

⁵³ Bab, na machigi yolenai guoed,
machi, na babgi gwisgunai gumogoed.

Nana, na sisgwagi yolenai guoed,
sisgwa, na nangi gwisgunai gumogoed.

Sak-ome, na balagi yolenai guoed,
degi, bala, na sak-omegi gwisgunai gumo-
goed.”

Jesús-ibagan-naid dulemar aku daksamalad
(*Mateo 16:1-4; Marcos 8:11-13*)

⁵⁴ Jesús dulemar-bukidaradga sogdebar: “Ar bemar dad-argwanedsik mogir-ainaksii be dakmalale, bemar sogmalad: ‘Dii-wied daniye.’ Ar deyob gunonidaed. ⁵⁵ Ar dad-nakwed-arganuedsik burwa gormairdi, bemar sogmalad: ‘Negued daniye.’ Ar deyob gunonidaed.

⁵⁶ ”;Bemar yogasaar-darba-sunmakmalad! Ar bemar napneg, degi, nibneg-igargan-gumaloed mag dakmaladde, degite, ¿ibiga we-ibagangi-ibmar-gunaidi aku be dakmarsunna? Bemar mag dakewilubmardo.”

Dule na-ebo urwediid ebo igar-naboged
(*Mateo 5:21-26*)

⁵⁷ Jesús sogdebar: “¿Ar ibiga bemar-sunnad geg be dakmala, wede bule igar-napiragwaddibe?

58 Ar be, dule-isdar-be-dakdiid-ebo dule-igar-nabogedse nadapile, igarbali, bebo-igar-nabogega be imake, adi, melle dule-igar-nabogedse be-sedegar, degi, adi, melle suar-ibedga be ukegar, degi, suar-ibed melle esgaryagi be-metegar. 59 Napira an bega soged, be esgaryagi-mellesiile, be nosurguodo. Bela begi-mani-galesad be bennukedse, geb be noed.”

13

Be-igudiidga na be bukib binsamar

1 Deun a-ibagangi dulemar Jesús'ga sognonimalad, igi Pilato Galilea-dorgan-oburgwismala, degi, igi a-abe ibmar-durgan-Bab-Dummadga-ogumakar-ukleged-abe-ebo oburus gusmala.

2 Jesús amar-abin-imakdegu, sogded: “Bemar insagua, wemar-Galilea-dor weyob burgwismar-soggu, Galilea-dorgan-baiganba, ¿bur bule isganamar be insae? 3 An bega sogmar, sulí, degisulí. Ar bemar na be-isguedga be bukib binsasurmalale, be-daed be gwagsurmalale, bemar burgwemarmogodo.

4”Siloé'gi e-ambe-gakabaabakgi (18) neg malusad, deun amar burgwis gusmalad, ¿be insagua, amar Jerusalén'gi-bukmaladba bur bule dule-isganamar be insae? 5 Sulí, degisulí. Ar bemar na be-isguedga be bukib binsasurmalale, be-daed be gwagsurmalale, bemar burgwemarmogodo.”

Higuera-sapigi Jesús sunmaksad

6 Weyob Jesús burbar sogdegusbalid: “Ibagwengine, dule-wargwen na e-nainugi

higuera-sapi digsagusad. Higuera-sapi-san-maked omosgu, e-san-aminonigu, sate daknonikid.

⁷ ”Dule-sapigi-nakulegedga e-nainu-ibed sogded: ‘Emide birgapaagus we-higuera-sapise an nanadanikid, e-san-gwanegar. We-sapi geg sanmaksoggu, be omukusun. ¿Ar ibiga binsa napa-gani guosunna?’

⁸ ”Sapigi-nakuleged sogded: ‘Dummad, mer be omukugwer, amba we-birgagi wis napi be ogwise, bina ebilis napa an imugwelo, sapi-osanmaked-ina an urbegwelo. ⁹ Ar sanmaker, sanmakoed. Ar degisulirdi, geb be we-sapi omukusunodo.’ ”

Jesús, ome-yargan-durenanaed-nudaksad

¹⁰ Ibagwengi obunnoged-ibagi deun Jesús Judío'mar-onmakedneggi dulemar-odurdaksiidgine, ¹¹ ome-wargwen birgambe-gakabaabakgus (18) boni-yargan-durenanaed-nikad sii gusmogad. Burba-isgana deyob durenanae imaksad.

¹² Jesús a-ome-dakargu, a-omese gocha, ega sogded:

—Omegwa, we-boni-nika-gudiidgi be ollorgusun.

¹³ Jesús a-omegi e-argan-mesisgu, ome-yargan yog innikii naded, geb degi, ome Bab-Dummad-nug ogannodsunnad.

¹⁴ Ar Jesús obunnoged-ibagi ome-nudaksadba Judío'mar-onmakedneggi-dummadga-gudiid sae-itoded. A-ular, dulemarga sogded:

—Ar iba, ibanergwa (6) arbaega naisursi, a-ibagi be nugegar dagmardo. Mer obunnoged-ibagi nugega be dagmala.

15 Geb degi, Dummad-Jesús, abin-sogded:

—¡Be yogasaar-darba-sunmakedid! Ar bemar belagwapa obunnoged-ibagi be-moli-bebe-nikad, degi, moli-uayasuid-sedega, diigi-ogobnaega, ¿e-gabedgi be esikdisurmarsi? 16 We-omede, Judíoduled, Abraham-wagwad. Nia-saila-Satanás’de birgambe-gakabaabakgus (18) we-bonigi edinnar sediid. ¿Ar ande we-ome obunnoged-ibagi geg nudakde?

17 Ar Jesús weyob sogsagu, Jesús-isdarmalad bela bingé itodmalad. Ar dulemar-baigandi bela Jesús-ibmar-dakledisulid-nuegan-imaksadba weligwar itodmalad.

Mostaza-e-gwaggi Jesús sunmaksad

(Mateo 13:31-32; Marcos 4:30-32)

18 Jesús sogdebar: “Bab-Dummad-e-negdakmaid, we, ¿igi an sogmalargebe, ibi-ebo an wilubdakmalargebsunna? 19 Ar weyobsundo, mostaza-e-gwag dule-wargwen e-nainugi digsayobdo. Dungudgu, sapiga gusdo, geb degi, sikwimar-niba-gukudimalad a-sapi-anagangi e-uumar na urbismalad.”

Madubur-inagi Jesús sunmaksad

(Mateo 13:33)

20 Degi, Jesús gannar sogdebar: “Bab-Dummad-e-negdakmaid, ¿ibu-ebo an wilubdakosunna? 21 Ar weyobsundo, madubur-inayobdo, ome-wargwen ilapaa-madubur-wilubsaedgi, madubur-ina obatisad, geb degi, madubur-ina binna-binna madubur omusad.”

Yawagak-garagwad

(Mateo 7:13-14, 21-23)

²² Jesús Jerusalén'se nadapgu, neggwebur-dummaganba, degi, neggwebur-burwiganba dulemar-odurdakdii gusad. ²³ Degi, dulewargwen ega sokalid:

—Dummad, ¿unnila ichee dulemar abonolemaloe?

Jesús, abin-sogded:

²⁴ —Gatik yawagak-garagwadgi doged be imakmar. Ar nabir an bemarga sogmalad, ar bukidar a-yawagakgi dogbigudamaloed, degi-inigwele, ar degite, geg doge gumaloed.

²⁵ "Ar e-neg-ibedi bato yawagak-edugega gwisgusar, yawagak-edisad-sorba, be magaba-gwichi gollalir, ega be sokalir: 'Dummad, yawagak be anga egae.' We-dule, be-abin-imakdoed, bemarga sogdoed: 'An bemar-wissuli be bia danimala.'

²⁶ "Geb bemar ega sogdamaloed: 'Anmar beba mas-guchamalad, anmar beba gobsamarbalid, anmar-ambikued-neg-imbagi be anmar-odurdakdii gusad.'

²⁷ "Ar we-dule, be-abin-imakdamarbaloe: 'An bega sogmar, an be-wissurmala, be bia danimala. Bela bemar angi bangumar, bemar ibmar-isgana-imakmalad-dulemalad.'

²⁸ "Ar bemar dakarmalale, Abraham, Isaac, Jacob, degi, bela Bab-Dummad-gayaburbarbarsogmalad, Bab-Dummad-e-negdakmaidgi gudii, ar bemardi agi gudisuli, geb agi be bodmaloed, degi, nue-dummad-wilesiidba nugar-gorsii be gudmaloed.

²⁹ "Ar dulemar dad-nakwedsikid, dad-argwanedsikid, dad-nakwed-argan-nuedsikid, dad-nakwed-argan-sapiledsikid, danimaloed,

Bab-Dummad-e-negdakmaidgi mas-gunnega mese-naba signonimaloed. ³⁰ Emigi, ar dummagan-bukidar dule-sorbarmaladga guoed, degine, dule-sorbarmalad, dummaganga gumogoed.”

*Jesús, Jerusalén'ga bosad
(Mateo 23:37-39)*

³¹ A-ibagi, Fariseo'mar abar Jesús'se nonimalad, ega sognonimalad:

—Wegi be noe, be nae, ar Rey-Herodes be-oburgwebied.

³² Jesús, abin-sogded:

—Be namar, we-dule-usyobdaedga be sognamar: ‘Be dake, an niamar-onodiid, degine, emi-ibagi an dulemar-nudakdiid, degine, banedse an dulemar-nudakbaloed, geb an-arbaed an achur obelogoed.’ ³³ Ar degi-inigwele, emi, banedse, degi, achur, an naergebed. Ar ade, Bab-Dummad-gayaburba-barsoged, Jerusalén-neggweburgi bannaba-burgwed geg gued, Jerusalén'gi burgwergebed.

³⁴ ”Jerusalén-dor, Jerusalén-dor, Bab-Dummad-gayaburba-barsogmalad be oburgwedimalad, bemarse-barmilearmalad bemar akwagi makdimalad. Igi gannir na e-sakan-urba-e-mimmigan-urbedae, debayobi, ilabigwa an bela-be-mimmigan danar urbehi-gusana, degite, bemar yapa-gusmalad. ³⁵ A-ulale, be-neg, nega-dulesulidganyob gunonisunnoed. Ar an bemarga sogsun, emigindi bar be an-dakosurmalad, ar geb bemar sogedse:

‘We, Bab-Dummad-nuggi-dule-danikid,

Bab-Dummad egi nued-binsasun.' ”

Salmo 118:26

14

Jesús dule-abagan-mued-nudaksad

¹ Ibagwengine, obunnoged-ibagi, Jesús, Fariseo'mar-e-dummad-wargwen-negse mas-gunnega nade gusad. Agi Fariseo'mar Jesús-argabukwa gusmalad. ² Degi, Jesús-asabin dule-abagan-mued-nikad siigusmogad. ³ Geb degi, Jesús, Moisés-Igar-Mamaid-odulomaladga, degi, Fariseo'marga, sunmakalid, sogded:

—¿Ar wede obunnoged-ibagi dule-nudaked igar-mai?

⁴ Ar amar gwen Jesús-abin-imaksasurmalad. Jesús, dule-bonigwaled-ebusgua, nudaksad. Geb degine, negse dule-nugusad barmisad.

⁵ Geb degi, Jesús Fariseo'marga sogded:

—¿Doa bemar wegi, be-moli-uayasuid-gwensakdibe, be-moli-bebe-nikaddibe, obunnoged-ibagi bei dia-yaagi argwachale, be onosurmalar be insae? Suli, be onosmalale.

⁶ Ar Jesús-weyob-ibmar-sogsad geg abin-imakgusmalad.

Ome-nikued-ibase ese gorlesmalad

⁷ Jesús dulemar-mas-gunnega-ese-gorlesmalad-daksagu, dummagagan-gan-sigedse bur signaddamala, Jesús burbar sunmakded, sogded:

⁸ “Dule-wargwen, ome-nikued-ibase-dagega bese gochadibe, mer dummagagan-siged-gangi be sigo, ar abakalegi dule-baid-beba-bur-nug-nikadse, gorlesmogale.

9 "Ar dule-bese-gochadi be-dakarsunnad, degine, dule-baid-beba-bur-dummad dakarbarsunnad, geb bega sokarsunnad: 'Wegangi-be-siid, we-dulega be ukye.' Degidbali, be nue-binge itodasunnodo. Gan-napi-solaba-siidse signae be dakledasunnodo.

10 "Ar bese ibase-dagega gorlesale, bur gan-napi-solaba-siidgi be sigo, ar adi, dule-ibase-dagega-bese-gochad be-dakalile, bega sogegar: 'An-ai, dummagan-siged-gangi bur be sigdage.' Geb agindi, dulemar-beba-mesegi-siid-abargi bur be-nug dummaa guoed.

11 "Ar ade, dule-wargwen na-nug dummarba-saele, a-dule bur-nug-bipii guoed. Ar dule, na-nug-bipi-saerdi, bur e-nug odummolegoed."

12 Dule-mas-gunnega-ese-gochadga Jesús sogded:

"Masgi dulemar be ogunbiele,
mer be-aimarse be golo,
mer be-urbamarse,
mer be-iamarse,
mer be-gwenadganse,
degine, mer be-neg-dikarba-mani-ibed-
mamaidse be gorbalo.

"Ar deyob be imakele, amar bese muchub gota-mogod ese mas gundamogagar. Ar degidbali ese be gochadba, be-abinsae dakledamogod.

13 "Ar be masgulleged-iba onoalir, bur dulemar-wileganase be golo, dulemar-argansurmaladse, dulemar-muya-muya-nanamaladse, degi, dulemar-ibyasurmaladse, be golo. 14 Geb agi begi nued binsalegoed. Ar ade, we-dulemardi masgi

be-ogunnega geg muchub bese goled. Dulemar-gwage-nuegan-gannar-durgumaloed-ibagine, geb Bab-Dummaddi bega ibmar-nued ukoed.”

Masgunned-ibase-nonimaladgi Jesús sunmak-sad

(Mateo 22:1-14)

¹⁵ Dule-wargwen-mesegi-Jesús’ba-siidi Jesús-ibmar-sogsad-itosgu, ega sogded:

—Dule, Bab-Dummad-e-negdakmaidgi masgunnoedgi, nued binsalesdo.

¹⁶ Jesús ega sogded:

—Ibagwengine, dule-wargwen masgunned-iba-dummad onosad. Geb bukidar dulemarbina gochad, ese mas gundamalagar. ¹⁷ Masgulleged-wachi mosgu, na e-mai-barmisad dulemar-gollesmaladga sogegar: ‘Dagmar, bato bela mas guagwar sii.’

¹⁸ ”Ar bela wargwen-wargwen sogdemalad, ar emarde geg dagmarye. Gebesailadi sogded: ‘Nainu an na baksad, an a-daknaergebed, degisoggu, an bega sogsun an bese wis naosurye.’

¹⁹ Baid sogdemogad: ‘Moli-bebe-nikad-warambe (10) an baksad, an daknaergebed, degisoggu, an bese naosurmogad.’ ²⁰ Baid sogdebalid: ‘Emiskwaa an ome-nikusad, degisoggu, an bese naosulid.’

²¹ ”Mai, e-dummadse gannar nonigu, bela e-dummadga sognonikid, igi dulemar ega sogsamala. Dule-iba-onosiid e-mai-ega-sogsad-itosgu, nue sae-itoded, e-maiga sogded: ‘Gwae be dulemar-bukidar-ambikumaladse be nae, neggwebur-igarba dulemar-wilegana be sedago,

dulemar-argansurmalad, dulemar-muya-muyan-anamalad, degi, dulemar ibyasurmalad, amar be sedago.’

²² ”Geb degi, a-sorba mai sognonikid: ‘Dummad, be-anga-ibmar-sogsadba an imaksad, degite, amba neg engussulid.’

²³ ”Geb degi, dummad na e-maiga sogded: ‘Be nae, igar-dummaganba-dulemar-gudiid sedago, igar-burwiganba-dulemar-gudiid sedago, adi, an-neg enguegar. ²⁴ Ar an bega sogmar, iduar-dulemarse-an-gochad, a-dulemardi an-mas gunnosurmalad.’ ”

*Jesús-sapinga-guegala, igar dutusur maid
(Mateo 10:37-38)*

²⁵ Ibagwengine, dulemar-bukidar Jesús’ba duurmaknadap gusmalad. Jesús amarsik atakdegu, amarga sogded: ²⁶ “Ar dule-wargwen anse danikile, ar e-bab, e-nan, e-ome, e-mimmigan, e-iamar, e-urbamar, e-bunmar, degi, e-san-burbase-bakale, anba-bur-bule sabele, geg an-sapinga gued. ²⁷ Igi-dule burgwenadapile, na e-nakrus semaidae, deyobi dule-anba-naid guakwaa burgwega nanasulile, a-dule geg an-sapinga gued.”

²⁸ Jesús sogdebar: “Ar bemarkar-wargwen na neg-matusur-warakwagwad sobbiele, ¿idu sigsursi, itogega, igi-mani abelegoe, degine, mani unnitiba nimbardibe a-neg oguegar? ²⁹ Ar be deyob imak-sulile, degir abakalegi neg-e-saila-mesisar maniakudedba oguarsulile, degiir, bela dulemar begi

dododago-itole. ³⁰ Sogdamalo-itole: ‘We-dule neg-matusur-warakwagwad sobdendo. Be dakena, gwen ogussurgusdo.’

³¹ ”¿Deginbali, ar doa-rey, baid-rey ese urwe-danikir, gebesaila sigsursi, dakegar, sunna miliambe-sordamar-na-nikad (10,000) mili-dulagwen (1,000) baid-rey-sordamar-sedanikidgi obinodibeye? ³² Ar rey na galakuo itogele, baid amba dikasur-danikidgi sunna ese dulemar-barmided, rey-baidse egisega igi saele ebo igar-nabogodibeye, mer ebo urwemalagar.

³³ ”Ar amba deyobmodo, bemar an-sapinganga-gued-iduar, nue bela na be ibmar ise-binsaar be saergebed, bela na be-ibmar-nikmalad bela iesulile, geg an-sapinga be gumardo.

³⁴ ”Balu, ibnuedid, ar balu sayee naderdi, ¿igi be bar balu-balu gannar saosunna? Bar saosuli. ³⁵ Balu, napaga, degi, napa-nudakedga bar gussuliled, neg-magaba miledsunnardo. An bemarka-ibmar-soged mag be nue itobieie, nue itomar.”

15

Sibad-wawaad-yoggusadgi Jesús sunmaksad (Mateo 18:10-14)

¹ Bela Roma-dummadga-mani-gaedgi-arbamalad, degi, dulemar-galagwensuli-isgudimaladye-nik-sogmalad Jesús-itogegala ese nonimalad. ² Fariseo’mar, degi, Garda-Narmaked-Dulemar uurmakarmalad, sogdemalad:

—We-duledi, dule-isgudimalad-abingaetid, degine, eba-mas-gunbalid-dulebalid.

³ Geb degi, Jesús burbar emarga sunmakde, sogded: ⁴ “Sogmalo, bemar-gwensak siband-wawaad dulatar-nikasunnad (100), bei wargwen yoggussunnad, siband-wawaad-wargwen-yoggusad-aminaega, ¿nega-dulesulidganba siband-wawaad dulabake-gakambe-gakabakebakad (99) obessulir be insae? Eye. Be obesale. ⁵ Be amisale, be-gukingi weligwar-ito be mesisaled.

⁶ ”Ar na negse be nonikile, be-aimarse, degi, be-neg-dikarba-mamaidse be-negse-dagega be gochaled, ega be sogdeled: ‘Anba be wergumarmo, an-siband-wawaad-ani-yoggusad, an amisad.’

⁷ ”Degisoggu, an bega sogmar, ar dule-isgudiid-wargwen na e-isguedga bukib binsasar, gwagnonikir, nibneggi bur bule we-werguedba wergumaloed. We-dulabake-gakambe-gakabakebak-nuegandi (99), na e-isguedga barbukib-binsaed abesulid.”

Mani-yoggusadgi Jesús sunmaksad

⁸ Jesús sogdebar: “Ar ome-wargwen, mani-gwaambe-nikad (10), ei gwagwen yoggusar, ¿gwallu ogassulir be insae? ¿Neg durwinagusar, mani-amiedse imaksasulir be insae? Eye. Mani-amiedse imaksale.

⁹ ”Ar mani amisale, na e-aimarse gologu, e-neg-dikarba-mamaidse gorbalogu, amarga sogdagodo: ‘Weligwar be anba itomarmo, ani-mani-yoggusad an amisad.’

¹⁰ ”An bemarga sogmardo: Deyobmodo, dule-wargwen na e-isgudiidga bukib binsasadba nugunonikir, Bab-Dummad-baliwiturmar, ber weligwar itodamalad.”

Machi-wargwen e-babgi-bangusadgi Jesús sunmaksad

¹¹ Jesús sogdebar: “Ibagwengine, dulewargwen masmala warbo nikagusad. ¹² Machi-bipigwad e-babga sokalid: ‘Baba, angadga-ibmar-yoedse-guoeni anga be udage.’ Degine, e-bab ibmar mimidsunnad.

¹³ ”A-ibagan-ichee-nasad-sorbali, machi-bipigwad bela na ibmar onmaksagu, dikasur yar-baidse nadsunnad. Agine, ibmar-nikadi bela obelosad, galagwensuli gaamakdii gualid. ¹⁴ Na mani-nikadi bela obelosgu, a-yargi ukud-dummad nagunonikid. Degisoggu, nue wilearsunnad.

¹⁵ ”Degi, machigwa a-yargi dule-wargwense arbaed-aminade gusad. Dule na e-nainuse ega sin-akwega machigwa-barmissunnad. ¹⁶ Dule machigwaga masgunned uksursoggu, na belabela ukudmaada-itogedbali, sin-mas-gunnedi gunbiguali gussunnad.

¹⁷ ”Degi, machigwa mag neg-itoargu sogded: ‘Ibibayobi an-bab-neggi an-babga-arbamaladdi masgunned bukidar-nika an insado. Andi wegi ukudba burgwedanikid. ¹⁸ Gannar an an-babse naergebodo, an ega sogdapoed: Baba, Bab-Dummadgi an dummad-nosad, degine, begi an dummad-nosbalid. ¹⁹ Degisoggu, bar be-machiga an guedsulid. Bega arbaed-wargwenga be an-imbaksun.’ ²⁰ Machigwa gwichibin imaksad, na e-babse arsunad.

”Machigwa amba dikasur daniki, bato e-bab daksabinned, na wile e-machi-dakdedbali, e-

machi-abin abarmakded, ise-angaagwar e-machi-gadapid, degi, ei wagar udsunnad.

²¹ "E-machi na e-babga sogded: 'Baba, Bab-Dummadgi an dummad-nosad, degi, begi an dummad-nosbalid. Degisoggu, bar an be-machiga guedsulid.'

²² "Ar e-babdi e-maimarga sogded: 'Bur mola-nued an-machiga be sedamar. Ega mor yomar, degi, argan-yoed ega googi yomarballo, degine, sapat ega yomarballo. ²³ Moli-bebe-nikad-e-

mimmi-wardummad sedamar, oburgwemar. A, anmar gunnoed, anmar iba-onomarsun.

²⁴ Ar wede an-machi burgwisanad, emigindi gannar durgunonikid, yoggusanad, emigindi amilenonikid.' Bela-dulemar, weligwar-ito nadmarsunnad.

²⁵ "Ar e-machi-dummaddi deun sapurba gudiid. Nonigua, neg-walikgusgu, garmar-gole itoalid, degine, dodonanai dakarbalid. ²⁶ Machi-dummad ega-arbaed-wargwense gochagu, ese egichialid: '¿Igi-neg-gunai?' ²⁷ Ega-arbaed sogded: 'Be-urba gannar nonikid, bonisuli nonikid. A-ulale, Be-bab moli-bebe-nikad-e-mimmi-wardummad oburgwisad.'

²⁸ "Geb degi, machigwa sae-itoded, yapa negyaba dogegualid. Degisoggu, e-bab magaba noarsunnad, negyaba-dogega egi wilenaigusad.

²⁹ Ar machigwadi e-bab-abin-imakdegu, sogded: 'Emide birgabargus an bega arbadiid, uayasuli an bega gudisulid. Degite, gwen be angardi an-aimar-abargi iba-onogega sibat-bipisaar be ukdisulid. ³⁰ Ar we-be-machidi bela omegan-gambasamaladgi bei ibmar bela obelosad.

Emide nonigu, agardi moli-bebe-nikad-e-mimmi-wardummad be oburgwisad.'

³¹ "Bab, machi-abin sogded: 'Machi, be anba gudiguad, bela-an-ibmar begadid. ³² Ar emigindi, anmar werguega, iba-onoged nonikid. Ar we-be-urba burgwisayob gusad. Emigindi, gannar-durgusayob gunonikid. Yoggusanad, emigindi, gannar amilesad. Degisoggu, anmar werguergebed.' "

16

Sunnasur-arbaed-dulegi Jesús sunmaksad

¹ Jesús e-sapinganga sogdebalid: "Dulewargwen mani-ibed, ega na e-ibmar-akwed nika gusad. Ibagwengine, mani-ibedga soglealid: 'Dule-bega-ibmar-akwed be-ibmargi, degi, be-manigi dododiye.'

² "Geb degi, mani-ibed ega-ibmar-akwedse gochasun, ega sogded: '¿Wede igi be gudisunna, an-manigi dododii an be-itodo? Anga-be-ibmar-dakdiid bela anga be nue sogdasun. Ar bar be anga ibmar-dakega guosulid.'

³ "Geb degi, dule-ibmar-akwediid na dugin sokalid: '¿Wede ibi an bar saosunna? Ar an-dummadde an-ega-ibmar-dakdiid angi suesokalid. Sapurgi an arbaye soger, geg an gued. Wileganayob mani an egisye soger, an bingebalid. ⁴ An wisi igi an saoe, adi, angi arbaed sulesale, dulemar e-neggi an-abingamalagar.'

⁵ "Degine, dule-ibmar-akwed dulemar-e-dummadgi-mani-ganimaladse gochagu, gebesailadga sogded: '¿Igi-mani an-dummadgi

be ganiki?' ⁶ Abin-sogded: 'Ibmar-gwallu bari-dulatar (100).' Geb degi, dule-ibmar-akwed ega sogdemogad: 'Mani-ganikid-garda be sue. Be sige, mani-ganikid-gardagi be narmake: Ibmar-gwallu bari-dulabo-gakambe (50) an ganiye.'

⁷ "Geb a-sorba baidga sogdebalid: 'Bedina, ¿igi-mani be ganimoga?' Mani-ganikid, abin-sogded: 'Madubur-gwagwaled-wilubsaleged-dulatar (100).' Geb degi, dule-ibmar-akwed ega sogded: 'Mani-ganikid-garda be sue. Madubur-wilubsaleged-dulabake (80) an ganiye be narmake.'

⁸ "Geb degi, mani-ibed ega-ibmar-daked-nug odummosad, ar ade, we-ibmar-daked-iskana, nue-binsaed-nikaa ibmar imaksad. Ar ade, dulemar-Bab-Dummad-akudakmalad nue-binsaed-nikaa bur dulemar-gwallu-meegwadginanadimaladba baigan-ebo igar imaked."

⁹ Jesús sogded: "Andi an bega sogsun: We-napneggi be mani-nikadgi, aimar-nuegan nikued be sae. Adi, be we-mani bega bergudele, yoedse geg-neg-berguedgi be-abingamalagar.

¹⁰ "Ar ibmar-ichegwadgi be galakussulile, amba ibmar-ichesur bega uklesale, be galakuosurbardo. Ar ibmar-ichegwadgi be galakusale, amba ibmar-ichesulidgi be galakubalodo. ¹¹ Ar we-napneggi ibmar-nikaguedse be galakusale, ¿ar doa begi bensuli bar guosunna we-ibmar-napiragwad nikuedgi? Bab-Dummad begi bengumogodo. ¹² Ar ibmar-dulemar-baidgad be nued akwissulile, ¿ar doa ibmar bega ukosunna begadga guegar? Bab-Dummad bega ukosuli.

13 "Mai-wargwensaar dummad-warbo geg nikued, ar ade, wargwen-sabguoed, baidi isdar dakoed. Wargwenga nue-alamaknai guoed, baidi mesagwar dakoed. Geg be Bab-Dummad-maiga gued, degi, geg be maniga mailenai gubalid, unnila wargwen bur bule be sabguoed."

14 We-ibmar bela Jesús-sogsadi, Fariseo'mar ito-bukwa gusmarmogad, ar ade, amar unnila maninikuedginbi binsadii damalad. Amar Jesús'gi dodobukwa gusmalad, binsa be gordiye.

15 Geb degi, Jesús amarga sogdesun:

—Ar bemarki dulemar-asabin na dukin na san ogannodimalad. Ar Bab-Dummaddi bemarkwage wisid. Ar dulemarga ibmar-nuediddi, Bab-Dummad-asabindi, ibmar-isganad.

Moisés-Igar-Maid, degi, Bab-Dummad-e-negdakmaid

16 Jesús sogdebar: "Moisés-Igar-Mesisadi, degi, Bab-Dummad-gayaburba-barsogmalad-sunmaksadi, Diigi-dule-oged-Juan-nonikidse egi sunmakledii gusad. Juan-nonikid-akale, Bab-Dummad-e-negdakmaid-gayaburba-nuedgi bemarga sunmaklenaid, degine, dulemar-bela-ase-dogbimalad dogbi gunanaid.

17 "Ar bur-baisursunna we-napneg, degi, nibneg-naid, surgued. Moisés-Igar-Narmakar-Naid-e-bichugwad-bur-bipigwaddi gwen bipisaale ogwalegosurguoed."

*Ome-metedgi-sunmaklenaid
(Mateo 5:31-32; 19:1-12; Marcos 10:1-12)*

18 Jesús sogdebar: “Ar dule-wargwen ome-metele, ome-baid-nikusale, we-machered, ome-dikarba negsichigi yolediido. Ar doa-dule, ome-melleded-nikusale, we-dule, ome-dikarba negsichigi yoledimodo.”

Jesús dule-mani-ibedgi, degi, Lázaro'gi sunmak-sad

19 Jesús sunmakdegu, sogded: “Dule-wargwen mani-ibed mai gusdo. A-dule, mor-gwalugiid, degi, mola-sibu-nuedbi yodaed, degine, bane-bane bur mas-nueganbi gundii daed. 20 Agi dule-wileged-wargwen, mani-egisdidaed gudigusmogad, Lázaro'ye-nugad. A-dulede, mani-ibed-yawagakgi yaa-sunnabi meremaidaed. 21 We-dule-wileged, mani-ibed-masgunned-meseurba mas-durgan-batemaiggi immelegoeyob binsadii daed. Ar achumarse-bakale, e-yaa emanonidaed.

22 ”Ibagwengine, dule-wileged burgwisgu, bali-witurmar Abraham-maidse sesad. Dule-mani-ibed burgwismogu, neg-uanse digleapid.

23 ”Dule-mani-ibed odurdakleged-neggi nue-wilesii atakargu, Abraham dikasur-sii dakalid. Lázaro a-walik simogad. 24 Agi dule-mani-ibed binnasur gotegu, sogded: ‘Dad-Abraham, wile be wis an-dake, Lázaro be anga barmidage, adi, e-goo-dukugi dii wis eogogu, an-gwabindukugi nasikoed, ar andi wegi nue soo-sailagi wilesiid.’

25 ”Ar Abraham'di abin-imakde, ega sogded: ‘Machi, be insae, be dula gudigusgu, ibmar-nuegan be nikusad, ar Lázaro'di wiledii gusad. Ar emigindi, Lázaro wegi wergusisunnad, bedi wegi wilesisundo. 26 Aginbali, neg-gullu-dummad

anmar-abargi naid. Degisoggu, dulemar-obakbied bese geg obaked, degine, bemar anmarse geg obakmogad.’

²⁷ ”Geb degi, dule-mani-ibed Abraham’ga sogdesun: ‘Degirdina, dad-Abraham, an bese ise-wilegar egisdo. An-bab-negse Lázaro be barmide. ²⁸ Ar ade, urbamar-walatar an nikad, adi, amar-owisogegar, mer adi, we-odurdakleged-negse dagegar.’ ²⁹ Abraham ega sogded: ‘Moisés-Igar-Mesisad, degi, Bab-Dummad-gayaburba-barsogmalad-sogsamalad narmakar nikmalad, ar a-sogedba damalargebed.’

³⁰ ”Geb dule-mani-ibed abin-sogded: ‘Dad-Abraham, webi unnisuli. Ar dule-wargwen-burgwisad gannar-durgusale, an-urbamarga sunmaknaele, adi, na e-isgumaladga bukib binsasmalaled, e-daed gwagsamalaled.’

³¹ ”Ar Abraham’di ega sogded: ‘Ar Moisés-Igar-Maidba, degi, Bab-Dummad-gayaburba-barsogmalad-garda-narmakar-maidba dasurmalad. Ar dule-burgwisad amba ega sunmaknaerbela itossurmalaled.’ ”

17

*Isguedgi-aimar-oichoged, igar-buledid
(Mateo 18:6-9; Marcos 9:42-48)*

¹ Jesús na e-sapinganga sogded: “Gwage-ichoged-igargandi danikosurdeeye gwen soglesulid. Ar dule gwage-ichogedga-gueddi, nue-wilegoed. ² Ar dule we-mimmigan-anbanadimalad Bab-Dummadgi-isguega imakele,

sabsur-odurdaklegoed. Akwamuu-dummad e-dukargi-nai demar-wilase melledoed, we-dule nue-dummad wilegoed, burgoed.

³ "Degisoggu, be nue salakarmar. Ar be-gwenad begi nosale, ega be soqe, nue be angi nos-itoleye. Ar be-gwenad nabir be-itosale, ar na gwagegi bukib binsasale, e-daed gwagsale, begi-nossuliyob be dakoed. ⁴ Ar be-gwenad ibagwen ilagugle (7) begi nosale, degi, ilagugle (7) bese gannar-gannar nonikile, bega sognonikile: 'An-isgusadga an bukib binsaye, bar an deyob guosurye,' begi nossuliyob be dakoed."

Jesús bensulid-igargi sunmaksad

⁵ Geb degi, Jesús-e-sapingan-bur-dummagan, Jesús'ga sogdemar:

—Dummad, gatik begi bensuli be anmar-imake.

⁶ Geb Dummad-Jesús sogded:

—Ar bemar mostaza-e-gwagyob wis bipii be angi bensurmalale, sunna we-Sicómoro-sapiga be sogsamaled: 'Wegi be gwichid be unqe, demarse be diglenae.' We-sapi bemar-sogedba imaksaled.

Mai nued-arbaergebed

⁷ Jesús sogdebar: "Ar bemar be-mai-wargwen bega napa-imuega be nikadibe, igi, moli akwegardibe, sapurba-arbadii danikid-sorba, ¿ega be sogdimala?: 'Be doge, mas-gunnega mesese be sigdage.' ⁸ ¿Ar ega be sogdamarsursi? 'Guakwaa be gudisae, masgunned be anga due, anga be mas dake. An-mas-gucha-sorba, an-gobsad-sorba, geb be mas gunmogoed, geb be gobmogoed.'

⁹ "Ar degine, be-mai bega be-sogsadba ibmar-imaksadba, ¿dog-nuedye ega be sogdasi?

Sulirgebed. ¹⁰ Ar amba bemar deyobmodo, ar bela bemarga Bab-Dummad-ibmar-sogsadba be ibmar imaksamalale, be sogmalodo: ‘Anmar mai-nued arbasurmaladye, ibmar-imakoye-anmarga-soglesadbi an imaksamaladdeeye.’ ”

Jesús warambe (10) naibe-buna-yaa-maleged-nikmalad nudaksad

¹¹ Jesús Jerusalén’sé nadapgu, Samaria, degi, Galilea, a-abargi nadap gusad. ¹² Jesús neggwebur-bipise dognadapgu, machergan-warambe (10) naibe-buna-yaa-maleged-nikmalad egi noarmalad, dikasur egi ambikunonimalad. ¹³ Amar binnasur goted, sogdemalad:

—¡Odurdaked-saila-Jesús, wile be anmar-dake!

¹⁴ Jesús amar-dakdegu, amarga sogded:

—Be namar, dule-irwa-Bab-Dummadse-gormaladga na be-san oyonamar, adi, amar bemarga sogmalagar bemar nugusmarye.

Ar degi, dule-warambegwad (10) amba igarba dule-irwa-Bab-Dummadse-gormaladse nadapmargu, nugudmalad.

¹⁵ E-ambe-gued-wargwen, nugus-itoargu, binnasur Bab-Dummad-nug ogannodani Jesús’sé gannar nonikid. ¹⁶ Dule-nugusad yokorgi-sindigar e-wagar-napase-ebulegedse dulluu Jesús-mali-naba signonikid, geb Jesús’ga sogdebalid:

—Dog-nued, be an-nudaksagu.

Dakargu, we-dulede, Samaria’ginedid. ¹⁷ Jesús sogded:

—¿Ar warambe (10) nugusmarsursi? Emide, ¿bia walabakebakaddi (9) nade? ¹⁸ ¿Na nugusmaladular, Bab-Dummad-nug-ogannomalagar gwen bilissurmala? ¿Unnila we-dule-ainebalidbi, Judío'sulid, Bab-Dummad-nug odummononide?

¹⁹ A-dulega Jesús sogdesun:

—Be gwisgu, nae. Nue-an-bensulidba be nugusun.

*Bab-Dummad-e-negdakmaid-danikoedgi
sunmaklenaid*

(Mateo 24:36-41; Marcos 13:21-23)

²⁰ Fariseo'mar Jesús'se egichialid:

—¿Sana Bab-Dummad wegi negdakmai guoe?

Jesús, abin-imakdegu, sogded:

—Bab-Dummad-e-negdakmaid bemarse danikile, bemar owisogar gwen nonikosulid.

²¹ Degine, sogosurmarbalid: 'Be dakena, wegi gudii,' igi: 'Weba gudii.' Ar ade, Bab-Dummad-e-negdakmaid bemar-abargi gudiiid.

²² Jesús na e-sapinganga sogded:

"Iba-nonikoed, ani Dule-Machi, an-iba-danikoedgi bemar gudii gubigudamaloenad. A-iba bemar gwen dakosurmalad. ²³ Degine, bemarga sogdamaloed: 'Be dakena, wegi Cristo gudii.' Baigan bemarga sogdamarbaload: 'Weba Cristo gudii.' Mer be daknamalo, degine, mer eba be nagumarbalo.

²⁴ "Ar igi mar-ibyed gadele, bela nibneg mee imakdedaed, deyobi ani Dule-Machi, an-danikoed-ibagi bela an-dakmaloed. ²⁵ Ar gebe bina, ani Dule-Machi, nue wilegwelergebed, wegi dula-gudidimaladse mesagwar gugwelergebed.

²⁶ "Ar igi Noé-maigu gusa, deyob, ani Dule-Machi, an-gannar-danikoed-ibangangi gumogoed.

²⁷ "Noé-maigu, dulemar mas-gunnanai gusmalad, gobnanai, ome-nikunanai, na ga ome-uknanai gusmalad. Geb Noé ur-dummad-sobsad-yaba-dogsagu, dii muluded, geb degi, bela dulemar burgwisad.

²⁸ "Amba deyob Lot-maigu, gusbalid, mas-gunnanai, gobnanai, ibmar-baknanai, ibmar-uknanai, ibmar-dignanai, neg-sobnanai gusmalad.

²⁹ "Ar Lot, Sodoma-neggweburgi-noded-ibagi, nibneggi soo, degi, soo-olliled-azufre batisad. Geb degi, bela dulemar burgwisad. ³⁰ Deyob Dule-Machi-danikoed-ibagi neg gumogoed.

³¹ "Ar a-ibagi, dule-wargwen neg-uas-birgi si-ile, e-ibmar-nuegan negyaba-bukwadbina aide-alir, mer sunaed imakoed, bur yog wakinnar imakoed. Ar dule-wargwen sapurba gudiile, amba mer e-negse gannar dagmogoed, bur yog wakinnar imakoed. ³² Be ebinsamalo, Lot-ome sorba-ataksagua, burgwisgusad.

³³ "Ar dule-wargwen anba-naid-ular burgwe-bisulir, e-san-burba ei yogguodo. Ar anba-naid-ular burgwenonikirdi, adi, na e-san-burba yogguosurdo."

³⁴ Jesús sogdebar: "An bemarga sogmalad, amutikidgi na-ebo-dikarba gabmamaid, wargwen nibnegse seledoed, baidi obelegoed. ³⁵ Omegan-warbo na ibmar-gwag-nagnanai, wargwen nibnegse seledoed, baidi obelegoed. ³⁶ Warbo sapurba na gudimalad, wargwen nibnegse seledoed, baidi obelegoed."

³⁷ E-sapingan Jesús'ga sogdemar:

—Dummad, ¿bia deyoob guoe?

Jesús, abin-sogded:

—Ar bia san-burgwaled mai, agi mulamar danar-ambikunonidamalad. Debayobi dulemar mag dakmogoed, an gannar we-napnegse danikir.

18

Igar-naboged-iskanagi Jesús sunmaksad

¹ Degi, Jesús na e-sapingan-odurdakega burbar sunmakded, amarga sogded: “Bab-Dummadsegoled nue-abeleged, melle be galakumalo.” ² Jesús burbar sogdesun: “Ibagwengi, neggweburgi dule-igar-naboged maigusad. A-dulede, Bab-Dummad-gwen-dobsulid, degi, dulemargi gwen binsaed-nikaa dasurbalid.

³ ”A-neggweburgi mukwa-wargwen ei-sui-burgwisad gudigusmogad. A-mukwade, dule-igar-nabogedgi gannar-gannar alamaknaidaed, ega sognonidaed: ‘Dule-isdar-an-dakdiid-ebo anga igar-nabiroye.’ ⁴ Gebe, dule-igar-naboged yapa mukwaga igar-naboge guargusad.

”A-undaradgine, dule-igar-naboged na ulubgi sokalid: ‘Bab-Dummad an dobsur-inigwele, degine, dulemargi-gwen-binsaed-nikaa an dasurbar-inigwele, ⁵ ar we-mukwa angi alamaknaigusoggu, ega igar an nabogoye. Ar degiile, abakalegi anse-nanagwichidba budar an dakalirye.’ ”

⁶ Geb degi, Dummad-Jesús sogdebar: “Nue be itomalana, dule-igar-naboged-iskanadaed-ibmar-sogsadi igi-sogsagusa. ⁷ Ar bemar insagu, Bab-Dummad na e-dulemar-susadi ese mutikidba,

degine, ibginedba gordimaladga igar-napiragwad ¿imakosur be insae? Imakoe. ¿Bab-Dummad abgayala abinsaosur be insae? Eye. ⁸ An bega sogmar, Bab-Dummad abga e-sordamarga igar-napiragwad imakoed.

”Ar ani Dule-Machi, we-napnegse gannar danikir, ¿dulemar we-napneggi Bab-Dummadgibensurmalad-nika daknoniko be insae?”

Fariseo’gi, degi, dule-manigaedgi sunmaklesad

⁹ Ar dulemar, na dukin nuedye, baigandi isganaye, sogdimaladga, Jesús we-igar-burbarmaidgi-sunmaklegedgi sogded: ¹⁰ “Ibagwengine, machergan-warbo Bab-Dummadse-goled-negse nadmalad. Gwensak Fariseo, baidina Roma-dummadga-manigaedgi-arbaed-dule.

¹¹ ”Fariseo gwichi Bab-Dummadse gorgwichid, na dukin weyob soggwichid: ‘Bab-Dummad, dog-nuedye an bega soged, an dulemar-baidyob dasulid, an atursilisulid, igar-innikigwadbi aimarga an imaked, ome-dikarba an yoledisulid, degine, we-dule-Roma-dummadga-manigaedgi-arbaeddaedyob an dasulid. ¹² Bab-Dummadse-golega itoged-irgwengi, ilabo an mas-gunsuli gudidaed, bela an mani-onoged-irba ambegigwensak (10%) an ukdaed.’

¹³ ”Ar dule-Roma-dummadga-manigaedgi-arbaeddi Bab-Dummadse gorgwisgu, bannabaa gwichi, nonose-bakar, gwen onakbisur gwichid, na e-binasgar sarsogwichid, na soggwichid: ‘Bab-Dummad wile be an-dake, an dule-isgudiid-duled.’

¹⁴ ”Ani Jesús, an bega sogmar, ar we-dule Fariseo’ba bur gwage nugus-naddo.

”Ar ade, dule-wargwen na nug dummarbaa saele, a-dule, bur nug bipii guoed. Ar dule na nug bipii saerdi, adi, a-dule, bur nug odummolegoed.”

*Jesús mimmigangi nued binsasad
(Mateo 19:13-15; Marcos 10:13-16)*

¹⁵ Degin, Jesús’s mimmigan-sedanigusmalad, Jesús ega ebugegar. Adi, Bab-Dummad nued mimmigangi binsaegar. Jesús-sapingan deyob dakarmargu, dulemar-mimmigan-senonimaladse uluarmalad.

¹⁶ Ar Jesús e-sapinganse-gochagu, ega sogded:

—Mer ese urwemar. Akarsuli, itoba mimmigan anse dagoed, mer be igar-gamar. Ar Bab-Dummad-e-negdakmaid we-mimmiganyobdamaladgadid. ¹⁷ Napira an bemarga sogmalad, ar dule-wargwen Bab-Dummad-e-negdakmaid mimmiganyob abingasulile, geg Bab-Dummad-e-negdakmaidse doged.

*Dule-mani-ibed Jesús’s nonikid
(Mateo 19:16-30; Marcos 10:17-31)*

¹⁸ Dule-wargwen nue-nug-nikagwad Jesús’s nonikid, ese egisonikid:

—Odurdaked-saila-nued, burba-geg-bergued an abingaega, ¿ibi an imakergebe?

¹⁹ Jesús, abin-sogded:

—¿Ibige dule-nuedye be anga soge? Dule-nued sulid, unnila Bab-Dummadbi wargwennaa dule-nued gued. ²⁰ Bab-Dummad-Igar-Mesisad be wisid:

‘Melle be be-abirginsulid-ebo galagwensuli nanao.

Melle be dule-oburgo.

Melle be ibmar-atursao.

Melle be gakansaar aimargi sunmako.
Be-bab-nug-odummodii, degi, be-nan-nug-
odummodii be nanamalo.’

Éxodo 20:12-16; Deuteronomio 5:16-20

²¹ Dule, abin-sogded:

—Gusgu an sapingwagwad-akar bela we-
Igarmar-Mamaidba an nanadiid.

²² Jesús, weyob dule-ega-soge itosgu, ega
sogded:

—Ibmar-gwensak amba be napi. Bela ibmar-be-
nikadi manigi be uknae, geb agi, mani wileganaga
be mimioed. Geb degiir nibneggi ibmar-nued be
nikuoed. Geb a-sorba, an-sapinga-guega anba be
dagoed.

²³ Dule, weyob Jesús-ega-soge itosgu, nue-bukib
binsaded. Ar ade, dulede nue-mani-ibedid.

²⁴ Jesús, dule-nue-bukib-binsa-ito daksagu,
sogded:

—Ibiyobi dule-mani-ibganga Bab-Dummad-
e-negdakmaidse-doged-igar dutusuli. Ar ade,
dogdar maniginbi binsamalad. ²⁵ Ar ade, bur
moli-yargan-mureged iko-ibyagi bursursunna
dogsaled. Ar dule-mani-ibeddi bur-beedse Bab-
Dummad-e-negdakmaidse doged.

²⁶ Ar dulemar weyob Jesús-ibmar-soge-itosmalad,
sogdemalad:

—Ar degite, ¿doa nabir abonolegosunna?

²⁷ Jesús, dulemar-abin sogded:

—Ar dulemargardi, ibmar-geg-guedi, Bab-
Dummadgardi, bela ibmar guedbiid.

²⁸ Geb degi, Pedro, Jesús’ga sogded:

—¿Anmardina? Emide, wegi anmar ibmar-nikamalad bela an na obesmalad, adi, anmar beba naegar.

²⁹ Geb degi, Jesús, abin-sogded:

—Napira an bemarga soged, ar dule Bab-Dummad-e-negdakmaid-ular,
na e-ome-obesale,
e-mimmigan-obesale,
e-babgan-obesale,
degine, e-neg obes-nadele,

³⁰ bur bule, we-napneggi ibmar-obesadba ibmar abingaoed.

Degine, yoedse amba deyob burba-gebergued nikubaloed.

*Jesús, ilapaagus gannar e-burgoedgi sunmaksad
(Mateo 20:17-19; Marcos 10:32-34)*

³¹ Jesús na e-sapingan-warambe-gakabogwad (12) bachikii sesgua, ega sogded: “Anmar Jerusalén’sen nadapid. Bab-Dummad-gayaburba-barsogmalad bela angi Dule-Machigi narmaksadba igargan anga guedsegad.

³² ”Ani Dule-Machi, Bab-Dummad-wissurmaladse uklegoed, amar angi dodomaloed, isdar angi sunmakmaloed, degi, angi wii-agmarbaloed. ³³ Geb sabsur an-bibyosmalad-sorba, an-oburgwemaloed. Geb ibapaagwadgi gannar an durguoed.”

³⁴ Ar Jesús-e-sapingan-ambe-gakabogwad (12) Jesús-ega-ibmar-sogedi magasaila-itossurmalad. Aku-itosmalad, ibiga ega deyob soge.

*Jesús, Jericó’gi dule-aku-ataked-nudaksad
(Mateo 20:29-34; Marcos 10:46-52)*

³⁵ Ibagwengine, Jesús Jericó-neggwebur-modanigua, deunni dule-ibyasulidi, igar-naba sii, mani egichii gusad. ³⁶ Dule-aku-ataked dulemar-bukidar duurmaknadap itoargu, amarse egichided:

—¿Igi neg-gunai?

³⁷ Ega sogdemalad:

—Jesús-Nazaret'gined nadapye.

³⁸ Geb degi, dule-aku-ataked binnasur goted, sogded:

—Jesús, Rey-David-wagwa, ¡wile be an-dake!

³⁹ Dulemar-Jesús-iduar-nadapmalad dule-aku-atakedse uludmalad, adi, mer binnasur golegar. Ar dule-aku-ataked aka bur bule binnasur gorsigisad:

—Rey-David-wagwa, ¡wile be an-dake!

⁴⁰ Geb degi, Jesús gwisgusgua, dule-aku-ataked ese sedagega imaksad. Dule-aku-ataked ese non-igu, Jesús ese egichialid, ⁴¹ ega sogded:

—¿Ibu bega imakbi be an-abege?

Dule-aku-ataked, Jesús-abin-sogded:

—Dummad, magar-atak be an-imake.

⁴² Jesús ega sogded:

—Magar-atak be gusun. Be an-bengussursoggu, be nugusun.

⁴³ Geb degi, dule magar-atake gussunnad. Dule-nugusad Jesús'ba nadapgu, Bab-Dummad-nug-ogannonadap gusad. Bela-dulemar dule-nugusad-daksamargu, Bab-Dummad-nug ogannodmarsunnad.

19

Zaqueo e-neggi Jesús-abingasad

¹ Jericó-neggweburse Jesús modapgu, a-neggweburgi nadap gusad. ² Agi dakleargu, machered-wargwen, Zaqueo'ye-nugad, mai-gusad. Zaqueo dakleargu, dulemar-Roma-dummadga-manigaedgi-arbamalad-e-dummadid, degine, dule-mani-ibedbalid. ³ Adulede, Jesús-dakbigualid, wede Jesús doasunye. Ar Jesús'ba-dulemar-nadapmalad bukidarsoggu, Zaqueo geg Jesús-dake-gualid, ar ade, Zaqueo dulematukwagwad. ⁴ Zaqueo, Jesús-dakegala aimaridu gwae abarmakde gusad, adi, sapi-Sicómoro'gi nakwegar, ar ade, Jesús a-igargi nasoed.

⁵ Jesús a-sapi-gwichid mosgua, niba atakded, geb Zaqueo'ga sogded:

—Zaqueo, gwae be dage, aidedage. Ar ade, emi-ibagi an be-neggi obunnogergebed.

⁶ Geb degi, Zaqueo gwae-gwae aidesad. Zaqueo weligwar na e-neggi Jesús-abingasad. ⁷ Dulemar daksamargu, Jesús, Zaqueo-negse dogsa, bela sunmakedbi-guarmalad, sogdemalad: “Jesús dule-isgudiid-negse dogsaye.”

⁸ Geb degi, Zaqueo gwisgusgu, Jesús'ga sogded:

—Dummad, emide, wegi an-ibmar an-nanikadi, negabar dule-wileganaga an ukoed. Ar dule-gwensak-ibe an ibmar-atursasale, an ega ilabake bur-melu ukoed.

⁹ Jesús, abin-sogded:

—Emi-iba, we-neg-yaginmaladga isguedgi-abonoleged nonisun. Ar ade, we-dule, Abraham-e-wagwamogad. ¹⁰ Ar ade, ani Dule-Machi,

dulemar-yoggusmalad-amiega nonikid, degi, dulemar-isguedgi-gudiid-abonogega nonikid.

*Mani-igargi Jesús sunmaksad
(Mateo 25:14-30)*

¹¹ Jesús Jerusalén-neggwebur-walik gudisoggu, dulemar Bab-Dummad-e-negdakmaid bato emarse oyolesokarye bimalanad. A-ular, Jesús dulemar-e-itosimaladga ¹² burbar sunmakedgi sogded:

“Dule-wargwen, nue-nug-nikadi, dikasuli yar-baidse reyga-nugsalegega nade gusad. A-dulede, gannar-danibaloye sogsa naded.

¹³ ”A-dulede, nasokargu, ega-arbamalad-warambegwadse (10) gochad. Amarga mani-ichesur-uksagu, sogded: ‘An gannar dagedse, we-manigine be anga e-gaka onomalo.’

¹⁴ ”Ar e-neggweburginmalad dule-reyga-guoeed isdar-dakmarsoggu, naded-sorba dulemar-barmisad, dummaganga sogegar: ‘We-dule anmar-reyga-guega anmar abesurye.’

¹⁵ ”Degi-inigwele, we-dulede reyga nugsalesad. Geb gannar e-yarse nonigua, e-maiganga-manu-uksadse gochad, adi, amarse egisege mani igi imaksamarye.

¹⁶ ”Mai-gebesailad nonigu, reyga sognonikid: ‘Dummad, be-mani. An bega e-gaka ambe (10) an onosbalid.’

¹⁷ ”Dummad ega sogdesun: ‘Nued, be, mai-nued. Ar ibmar-ichegwadgi be nued arbassoggu, neggwebur-gwaambedgi (10) dummadga be guo.’

18 "Mai-baid reyse nonimogu, ega sognonikid: 'Dummad, be-mani. An bega e-gaka gwaatar onosbalid.'

19 "Dummad we-maiga amba deyob sogdebalid: 'Neggwebur-gwaataledgi dummadga be gumogo.'

20 "Mai-baid nonibargu, reyga sognonikid: 'Dummad, wegi an bega be-mani sedani, muswegi an bega nue-sabosad. 21 Ar an be-dobgusad, ar bede dule-yaisurdaed-duled. Ar be ibmar-urbissulidi be sudaed, ibmar-be-digasulid be weedaed.'

22 "Geb degi, rey a-maiga sogdesun: 'Be mai- isgana, na be-ibmar-sogsadba an bega sogsun. Ar be wisinad an dule-yaisurdaed-duled, an-ibmar-urbissulid an sudaed, an-ibmar-digasulid an weedaed. 23 ¿Ar ibiga degite, mani-urbileged-neggi be mani urbiapsuli? Adi, gannar an non-ikogu, e-gaka-nosad an sunonikoenad.'

24 "Ar rey dulemar-bukmaladga sogdesun: 'We-dule-mani-ukdanikid e-annik be sumar, dule-mani-ambe-onosadga (10) be ukmar.'

25 "Dulemar, rey-abin sogdemalad: 'Dummad, ar we-dule mani-ambe (10) bato nikad.'

26 "E-dummad, amar-abin sogded: 'Ar dulemar-bela-ibmar-nikmalad aga bur napi uklegoed. Ar dule-ibmar-suliddi, amba ar ibu wis nika, ei bur sulegoed.'

27 " 'Deginbali, isdar-an-dakmalad, egi-dummadga-gubisur an-abesmaladi, anse be sedamar, an-asabin amar-e-dukur be egwanmalo.' "

6. JESÚS, JERUSALÉN'GI GUDIGUSAD

(19:28-21:38)

Jesús, Jerusalén'gi reyyob dogsad

(*Mateo 21:1-11; Marcos 11:1-11; Juan 12:12-19*)

²⁸Jesús weyob ibmar-sogsad-sorba, Jerusalén'se e-sapingan-idumai gusad. ²⁹Jesús, Betfagé-neggweburse, degine, Betania-neggweburse modanigu, Olivos-yar-innikgusgu, Jesús e-sapingan-warbo barmisad. ³⁰Amarga sogsad:

—Anmar-asabin neggwebur-bipigwad-siidse be namar. A-neggweburgi bemar dogdapmalar, moli-bipi-uayasuid, dule-egi-yoo-gwen-siged, be-idu atinnar-nai bemar dakdapoed. Be esik-malo, geb degi, be anse sedamalo. ³¹Ar dule-wargwen bemarse egichialile: '¿Ibiga bemar moli-bipi-uayasuid esiknai?' Ega bemar weyob sog-maloed: 'Ar Dummad we-molibina soged.'

³²Jesús-e-sapingan-warbogwad nadmargu, igi-Jesús-ega-ibmar-sogsa deyob dakdapmalad. ³³Jesús-sapingan moli-bipi-uayasuid esiknanaigu, e-ibmala ega sokarmalad:

—¿Ibiga moli-bipi-uayasuid bemar esiknai?

³⁴Abin sogdemalad:

—Ar Dummad moli-bipi-uayasuidbina soged.

³⁵Jesús-sapingan moli-bipi-uayasuid Jesús'se senonimarsunnad. Geb degi, moli-bipi-birgi na e-mormar ogichamalad. Geb a-birgi, Jesús-onakwismalad. ³⁶Jesús, Jerusalén'se nadapgu, e-iduar igargi dulemar mor ogitemalad. ³⁷Olivos-yar-aidemaid-walikgusgu, bela bukidar dulemar-Jesús'ba-nanaimalad, weligwar itodmalad,

bela ibmar-dakledisulid-daksamaladba,
 binnasur Bab-Dummad-nug ogannodmalad,
³⁸ sogdemalad:

“We, rey Bab-Dummad-nuggi danikid,
 bela ega ibnuedga gusun.

Nibneggi bogidikid gusun,
 degi, nibneggine Bab-Dummad-nug odum-
 momarsun.”

Salmo 118:26

³⁹ Abala Fariseo'mar dulemar-bukidarad-
 abargi gudimarmogadi Jesús'ga sokarmalad:

—Odurdaked-saila, beba-nanaimaladse be
 urwe, mer deyob sogmarye.

⁴⁰ Jesús, weyob amar-abin sogded:

—An bega sogmar, ar wemar bogiledele, an-nug-
 odummomalaga akwamar oimakarmalaled.

⁴¹ Jesús Jerusalén-neggwebur-mosgu, Jerusalén-
 neggwebur-dakdegu, ega boded, ⁴² sogded: “¡Bitigi
 emi-ibagi be wisgusana gadin! Igi bogidiki be am-
 bikusmalale. Ar emigindi, begi odukuar nagusad,
 adi, mer be magar itomalagar.

⁴³ ”Ar ibagan begi danikoed, be-isdarmalad
 be-ebilis napa gwisnonikoed, be-ebilis
 ambikunonikogu, geb degi, bela begi
 gwichigudamaloed. ⁴⁴ Degi, geb napagi be-
 omukumaloed, be-dulamar-oburgwemaloed,
 degine, akwamar be-birgi-bubukwad bar be-birgi
 ambikuosurmalad. Bab-Dummad be-abonogega
 bese-atakleapid-iba aku be daksad-ular, deyob be
 guoed.”

Jesús, Bab-Dummadse-goled-neggi ibmar-ukbukmalad-onosad
(Mateo 21:12-17; Marcos 11:15-19; Juan 2:13-22)

⁴⁵ Jesús, Bab-Dummadse-goled-negse dogdapgu, dulemar-agi-ibmar-baknanaid, degi, ibmar-ukbukmalad sabsur onisad. ⁴⁶ Jesús amarga sogded:

—Bab-Dummad-Gardagi narmakar naid:
‘Bab-Dummad soged: An-nega, anse-goled-negad.’

Isaías 56:7

”Ar emigindi, bemardi atursamalad-negga imak-samalah.”

⁴⁷ Jesús bane-bane Bab-Dummadse-goled-neggi Bab-Dummad-igargi dulemar-odurdakdii gusad. Ar dule-irwa-Bab-Dummadse-gormalad-e-dummagandi, Garda-Narmaked-Dulemardi, degi, dule-dummagan-neggweburgi-negsemamaiddi, Jesús-oburgwebigusmalad. ⁴⁸ Ar amar geg Jesús-oakalogusmalad, ar ade, bela dulemar Jesús-nue-itobukwadamalad.

20

Jesús doa-nuggi ibmar-imake
(Mateo 21:23-27; Marcos 11:27-33)

¹ Ibagwengine, Jesús Bab-Dummadse-goled-neggi dulemar-odurdaksigu, degine, Bab-Dummad-Gayaburba-Nuedgi-sunmaksigu, dule-irwa-Bab-Dummadse-gormalad-e-dummagan, Garda-Narmaked-Dulemar, degine, Judío’mar-girmar-dummagan Jesús’sé nonimalad. ² Amar Jesús’ga sognonimalad:

—Be anmarga soqe: ¿Doa-nuggine wede be we-ibmar imakdii? We deyob be ibmar imakega, ¿ar doa bega gangued uksasunna?

³ Jesús, abin-sogded:

—An bemarse ibmar-soggwen an egismogodo. Bemar anga sogmalana: ⁴ Bab-Dummad-diigi-ogleged-igar imakega, ¿doa Diigi-dule-oged-Juan-barmiar be insae? ¿Bab-Dummad barmiali, igi, dulemar barmiali? Anga be sogmalana.

⁵ Degi, Judío-dummagan muchub-muchub na sogdemalad: “Bab-Dummad barmiarye anmar sogmalale, anmarga sogdagoed: ‘Degite, ¿ibiga bemar Diigi-dule-oged-Juan-bengusmarsunna?’

⁶ Dulemar barmiarye anmar sogbalile, dulemar bela akwagi anmar-makmaload. Ar ade, bela nue sogmalad, ‘Diigi-dule-oged-Juan, Bab-Dummad-gayaburba-barsoged-sunnadye.’ ”

⁷ Degisoggu, Judío-dummagan, Jesús-abin sogdemarsun:

—Anmar wissurmala, doa Diigi-dule-oged-Juan-barmiali.

⁸ Degi, Jesús, abin-imakdemosun:

—An bemarga sogosurmarmodo, wede doanuggi we-ibmar an imakdiiye.

*Dule-arbamalad-isganagi Jesús sunmaksad
(Mateo 21:33-46; Marcos 12:1-12)*

⁹ Geb degi, Jesús dulemarga burbar-sunmaklegedgi sunmakdesun, sogded: “Ibagwengi, dule-wargwen nainugi uva diggado. Nainu-ibed dulemar-arbamaladga na e-nainu urmaksado. Geb degi, nainu-ibeddi undar na yoggunaded.

10 "Uva-weed-ibagan-mosgu, nainu-ibed na e-mai nainugi-arbamaladse barmialid. Adi, uva-na-egadid abala suegar. Ar nainugi-arbamaladdi nainu-ibed-e-mai ese nonigu, sabsur sarsosmalad. Geb degi, unnila arganagwabi gannar barmismalad.

11 "Geb degi, nainu-ibed e-mai-baid-barmiarbalid. Ar we-mai sabsur sarsosmarbalid, degi, sabsur-wiosmarbalid. Geb degi, unnila arganagwabi barmismalad. 12 Degi, nainu-ibed irbaagi gannar na e-mai-baid barmiarbalid. Ar dulemar-nainugi-arbamalad we-mai nue-naibi imaksamarbargu, nainu-dikarba metemalad.

13 "Geb degi, nainu-ibed sokarsunnad: '¿Emide, igi an saosunna? An-machi na nue-sabedi an barmidodo. Ar an-machi-dakdamalogu, adi, egi-binsaed-nikaadamaladba gwen oakalogosurmar-sua.'

14 "Ar nainugi-arbamalad, nainu-ibed-machi dani dakarmargu, na ega sogdemalad: 'We-dule-danikidi e-bab-burgwisar, nainu bela egadbi guoed. Degisoggu, anmar we-machi-oburgwemarsun, adi, nainu anmargadga guegar.' 15 Machigwa-gasmargu, nainu-dikarba metemalad, geb degi, oburgwismarsunnad."

Jesús dulemar-e-itobukmaladga sogded: "¿Degite, nainu-ibed, igi dulemar-nainugi-arbamalad-imaknoniko be insae? 16 Nonikogu, dulemar-nainugi-arbamalad-oburgwenonikoed. Geb degi, dule-baiganga na e-nainu urmaknonikoed."

Ar weyob Jesús ibmar soqe itosmargu, sogdemalad:

—Bab-Dummad mer deyob anmar-imakena gadin.

¹⁷ Jesús, nuu Judío-dummagan-dakdegu, amarga sogded:

—Bab-Dummad-Gardagi narmakar naid:
‘Akwa dule-neg-sobmaladse-oballesadi, neg-sobleged-e-akwasailaga gunonikid.’

Salmo 118:22

”¿Wede ibi obarsunna? ¹⁸ Ar we-akwa-nuedgi dule argwachale, we-dule, ese bibisgoed. Ar we-akwa dulegi argwachardi, we-dule ese ubigwar guoed.”

¹⁹ Dule-irwa-Bab-Dummadse-gormalad-e-dummagan, degine, Garda-Narmaked-Dulemar, magar-itosmalad, Jesús we-ibmar-burbar-sogsadi yamo emarga sognaid. Degisoggu, Jesús-gabi guarmalanad. Degi-inigwele, dummagan dulemar-dobedba Jesús-gassurmalad.

*Roma-dummadga-mani-galeged-igargi
sunmaklesad*

(Mateo 22:15-22; Marcos 12:13-17)

²⁰ Judío-dummagan yamo-Jesús-argaega dulemar-barmisad. Amar yamo dule-nuedyob na imakarmalad, adi, Jesús ibmar-noar-sunmakedgi gamalagar. Jesús ibmar-noar-sogele, dummad-negdakmaidga-ukmalaga gamaloed. Adi, Jesús’ga igar-itogegar.

²¹ Yamo-Jesús-argamaladi Jesús’s e gichiarmalad, ega sogdemalad:

—Odurdaked-saila, anmar be-wisdo, be innikig-wadba ibmar soged, degi, innikigwadba be ibmar odurdakbalid. Degine, bedi dulemar emarbi be

daked, ar ade, Bab-Dummad-Igar-Maidgi napirag-wadba be dulemar-odurdakdiid. ²² Emide, anmar bese egisdo, Roma-dummad-César'ye-nugad-bennuked, ¿wede igar-nuedi? ¿Anmar bennukoe, igi, bennukosuli? ¿Igi be sogmosunna?

²³ Ar Jesús'di wemar-yamo-e-yardakdanikid mag daksoggu, amarga sogded:

—¿Ar ibiga bemar yamo an-wilubdakdanimala?

²⁴ Mani be anga oyogena.

Jesús'se mani oyosmargu, Jesús sogded:

—¿Ar wede we-manigi doa-wagar-wilub sisunna, degine, doa-nug narmakar-naibarsunna?

Jesús-abin sogdemalad:

—Roma-Dummad-César-wagar-wilub sii, degine, a-nug narmakar naibali.

²⁵ Geb degi, Jesús, abin-imakdemosunnad:

—Ar ibmar, César'gadir, César'ba be ibsamardo. Ar ibmar Bab-Dummadgadirdi, Bab-Dummadba be ibsamardo.

²⁶ Ar we-dulemar Jesús-sunmakedgi dulemar-asabin geg Jesús-yardakgusmalad. Ar bur bule geger dakdemalad igi Jesús e-abin imaksad. Degisoggu, gwen bar-akar ega sogsasurmalad.

Saduceo'mar gannar-durgued-igar Jesús'se egichisad

(Mateo 22:23-33; Marcos 12:18-27)

²⁷ Geb degi, Saduceo'mar Jesús'se nonimarmogad. Amarde sogmalad, “Dule burgwisale, gannar geg bar durguye.” Agala, Saduceo'mar Jesús'se we-igar egichiarmalad, ²⁸ ega sogdemalad:

“Odurdaked-saila, Moisés anmarga Bab-Dummad-Gardagi narmakar obesad:

‘Ia mimmi-nikussuli ome-idu burgwisale, e-urba
a-ome-nikuoye,
adi, e-iaga anagan-urbegar.’

Deuteronomio 25:5

²⁹ ”Dakargu, machimala gwenadgan-walagugle-gumaladi (7) weyob gusdo. Ia-dummad ome-nikusgu, anagan-urbissuli burgwisad. ³⁰ A-sorbalid, a-ome-nikunonimogu, amba e-iayob mimmi-nikussuli burgwismogad. ³¹ Geb degi, a-sorbalid, amba a-ome-nikunonimogad. Deyob bela e-walagugled (7) a-ome-nikusmaladbiid, anagan-gwen-obessuli bela burgwismalad. ³² Geb a-sorba ome burgwisomosunnad.

³³ ”Ar dule-gannar-durguoed-iba nonikile, a-omede, ¿doa-omega guosunna, ar bela na e-gugle-nikusmaladbiid (7)?”

³⁴ Geb degi, Jesús, Saduceo’mar-abin-imakdegu, sogded:

“Dulemar we-napneggi, na ome nikumalad, degi, sui-na-nikudamalad. ³⁵ Ar dulemar-nabir-Bab-Dummad-negse-dogmaloeddi, degi, gannar-durgumaloeddi, gannar ome-nikunai, degi, sui-nikunai guosurmamalad. ³⁶ Ar ade, we-dulemar bar burgosurmamalad. Amar baliwiturmaryob gunonimaloed, Bab-mimmiganga gumaloed.

³⁷ ”Ar burgwismalad-gannar-durguoye-soglegedi, Moisés anmarga oyosmogad. Deun sapi-bula-gummakmai-daksadgi narmaksagu, Bab-Dummadgi sogsagusad, Bab-Dummadi Abraham-e-Bab-Dummadye, Isaac-e-Bab-Dummadye, degine, Jacob-e-Bab-Dummadye.

Degisoggu, Moisés anmarga oyodo, duleburgwismalad gannar durguoye. ³⁸ Ar ade, Bab-Dummad, dulemar-burgwarmalad-e-Bab-Dummadsulid. Bab-Dummad, dulemar-dulgudidimalad-e-Bab-Dummadid. Ar Abraham, Isaac, degi, Jacob burgwismar-inigwele, Bab-Dummadgardí amba we-dulemar dula gudidimalad.”

³⁹ Abala Garda-Narmaked-Dulemar Jesús’ga sogdemalad:

—Odurdaked-saila, nue imas be sogsado.

⁴⁰ A-sorbali, dulemar gwen bar Jesús’sé ibmar-egisbi ito nadsurmalad.

¿Wede Cristo doa-wagwasunna?

(Mateo 22:41-46; Marcos 12:35-37)

⁴¹ Geb degi, Jesús Judío-dummaganga sogded: “¿Degite, ibiga sogmarsunna, we-Cristo, Rey-David-wagwaye? ⁴² Ar David-sunnad soged, Namakleged-Gardagi:

‘Bab-Dummad an-Dummadga sogsad: An-argan-nuedsik be sige,

⁴³ be-isdarmalad an bela ogalakuedse be sige.’

Salmo 110:1

⁴⁴ “Ar David, Cristo’ga soged, be an-Dummadye. Degite, ¿Igi-e-wagwaga Cristo’de gubarsunnoe?”

Jesús, Garda-Narmaked-Dulemargi sunmaksad

(Mateo 23:1-36; Marcos 12:38-40; Lucas 11:37-54)

⁴⁵ Bela dulemar Jesús-itobukwadgi, Jesús na e-sapinganga sogded: ⁴⁶ “Garda-Narmaked-Dulemargi nue salakarmar, mer amaryob

be damalo. Ar amardi mor oyaarmakdiir na yeer itodamalad, degine, dulemar bela ese ibmar-ukleged-neggi goledbimalale, yeer itodamarbalid. Amardi Judío'mar-onmakedneggi dule-dummagan-gan-sigedginbi sigbidamalad, degine, ibagi mas-gullealir, dummagan-gan-sigedginbi sigbidamarbalid.

⁴⁷ "We-Garda-Narmaked-Dulemar yamo-yardakar ammormar-ei-sui-burgwismalad-ibe neg atursadamalad, degine, dulemar yeer e-dakegala yamo suitii Bab-Dummadse-gorgwisdamalad. Ar we-Garda-Narmaked-Dulemar deyob damaladba bur bule dule-baiganba sabsur-odurdaklemaloed."

21

Mukwa-wileged, Bab-Dummadga-mani-uksad (Marcos 12:41-44)

¹ Jesús Bab-Dummadse-goled-neggi sigua, daksigusad, dule-mani-ibgan mani-urbed-ulu-yagi Bab-Dummadga mani urbanonidamalad.

² Degi, mukwa-wileged-wargwen, ei-sui-burgwisad, mani-esnon-gwabo egwachamogad, daksabalid. ³ Jesús sogded:

—Napira an bemarga soged, we-mukwa-wileged, ei-sui-burgwisad, we bur bule dulemar-baiganba mani uksad. ⁴ Ar baigan Bab-Dummadga-mani-uksaddi, gwabgusad uksamalad. We-mukwadi e-wilesaa-gudiidgine, belagwapa e-mani-bukwad uknonikid.

Bab-Dummadse-goled-neg-ayaroedgi Jesús sunmaksad

(Mateo 24:1-2; Marcos 13:1-2)

⁵ Bab-Dummadse-goled-neg-sobaledgi dulemar sunmakbukmalad, e-akwamar yeerdakleye, degine, dulemar a-neg-yeerdaklegega-ibmaruksamalad yeerdaklebarye. Agi, Jesús sogded:

⁶ —Ar bemar weyob we-negdakedi, ibagan non-ikoed, bipisaale akwa-gwagwensaar birgi-birgi bar sigosulid, bela ayaroed.

Napaneg-bergued-iduar-neg-guoedgi Jesús sunmaksad

(Mateo 24:3-28; Marcos 13:3-23)

⁷ Jesús-sapingan, Jesús'se egichiarmalad:

—Odurdaked-saila, ¿sana degite, Bab-Dummadse-goled-neg ayarosunna? We-ibaganmosar, ¿igi-neg-gudagosunna?

⁸ Geb degi, Jesús sogded: “Nue salakarmar, mer dulemarse yardaklemalo. Ar bukidar yamo anyob imaknonimaloed, sognonimaloed: ‘Ani an Cristo, Bab-Dummad-dule-wargwenbarmidagoye-sogsad-duleye.’ Degine, sognonimarbaloed: ‘Neg nue-dukumossunye.’ Degi-inigwele, mer eba be nagumalo.

⁹ ”Bila-onogedginbi neg-naguar be itodamaloed, degi, neg-urwedgibi naguar be itodamarbaloed. Deyob neg-gualile, mer be dobgumalo. Ar we-ibmarmar-inse guergebed, degi-inigwele, neg bato emiskwaa berguodeeye soglesulid.”

¹⁰ Geb degi, Jesús amarga sogdebar: “Dulemar-yar-baid-baidgi-bukmalad na bila ononanai gudamaloed, degi, reymar na muchub-muchub

egi yolenanai gudamarbaloed. ¹¹ Degine, negabandur-dummagan nagumai gudagoed. Yar-baid-baidgi ukud-dummad, degi, uellemalad-bukidar-ainimai gudabaloed. Dobed-dummad nagumai, degine, nibneggi ibmarmar-wilubgandakledisulid-dummagan oyolemai gudagoed.

¹² "Ar bela we-ibagan-bulegan-iduale, dulemar bemar-baregindamaloed, bemar-gamaloed, degine, Judío'mar-onmakednegse bemarksedmaloed, esgaryagi bemarkmetemaloed. Ar bemark, an-sapinganga gumalad-ulale, reymarasabin, degi, dummagan-negdakmamaid-asabin bemarksedmaloed.

¹³ "Ar deyob ibmarmar-guoedi, adi, bemark angi sunmakegalad. ¹⁴ Degisoggu, mer bai-itomalo, mer be binsamalo, an na san bendakegala, ¿igi an sogodibeye? ¹⁵ Ar ani an bega binsaednued ukoed igi be sogoe. Bela dulemar-begigwisgudimalad begi obinosurmalad, ar ade, geg be-abinsae gumaloed.

¹⁶ "Ar be-babganse-bakar, be-ukmaloed, be-iamar, be-urbamar, be-gwenadgan, be-aimar, dummaganga be-ukmaloed, degine, gwen-gwen bemark oburgwilemaloed. ¹⁷ Be an-sapinganga-gumalad-ulale, bela-dulemar isdar be-dakmaloed. ¹⁸ Ar degi-inigwele, be sailagiawargwensaar bei gwen yogguosulid. ¹⁹ Ar bemark galakusulile, be abonolemaloed.

²⁰ "Ar bemark dakalir, sorda-bila-onomalad Jerusalén-ebiris bukwa, be wismardo, we-Jerusalén-neggwebur-bibisged-ibagan warmaknoniki. ²¹ Degisoggu, a-ibagi, Judea'gi be

gudiile, yalaganba be wakinno. Bemar-Jerusalén-neggwebur-abargi-gudiile, be nomalo, degine, bemar-sapurba-gudimalale, mer bar neggweburse dagmalo.

²² "Ar a-ibagangine, Bab-Dummadi dulemar-esogedba-nanadisurmalad sabsur-odurdakoed. Ar igi Bab-Dummad-Gardagi-narmakar-nai, deyobi guoed. ²³ Degine, a-ibagangine, ammormar-gurgin-nikagudimalad, degi, mimmigan-gwarusedimalad, nue-wilemaloed. Ar ade, a-ibangani we-napneggi ibagan-nunmak-itoleged naiguoed. Degine, Bab-Dummad we-dulemargi nue-odurdaked-dummad nasikoed.

²⁴ "Degine, dulemar es-suidgi-ewarar burgwemaloed. Deginbali, galesmalad bela neggwebur-bamaladse seledmaloed. Degine, dule-Judío'surmalad, Jerusalén-neggwebur nue-wiononimaloed. We-dulemar, Jerusalén'gi-gudigumaloed-e-ibagan-berguoedse, deyob-gudii gumaloed."

*Jesús gannar-e-danikoedgi sunmaksad
(Mateo 24:29-44; Marcos 13:24-37)*

²⁵ Jesús sogdebar: "Geb degine, dad-ibelergi wilubgan dakledagoed, niigi, degine, niisgwamargi wilubgan dakledagoed. Degine, napneggi dulemar-yar-baid-baidgi-bukmalad demar-uurmakedba, degi, demar-arwedba, surbinsa itodamaloed. ²⁶ Dulemar-bukidar dobedba, degine, ibmar-dummagan we-napneggi-akar-gudagoedba negoedmaloed. Ar ade, nibneggi ibmar-dummagan gala-nikananaid bela giglimakoed.

²⁷ "Geb degine, ani Dule-Machi, mogir-imbaba an-gangedba, degi, bela-bela an-ganged-yeerdaklegedba-dani an-dakdamaloed. ²⁸ Ar ibmar-wegiimalad deyob guar be dakele, gandik be samalo, degi, na be guakwaa gudigumalo. Ar ade, be-san-burba-abonoleged-ibagan warmaksad."

²⁹ Degi, Jesús na e-sapinganga burbar sogdebalid: "Nue be higuera-sapi, degi, sapi-baigan, be dakmar. ³⁰ Wegi anmar-yargi sapimar bato ganar aramaksale, bemar nue wisid, yor omodaniki. ³¹ Amba deyobmodo, we-ibmarmar an-bemarga-sogsamaladi, deyob guar bemar dakalir, bemar wisdo, Bab-Dummad-e-negdakmaid bato warmakdaniki.

³² "Napira an bemarga soked, we-dulemar-dula-gudimalad-burgwed-idu, we-ibmarmar bela guedsegad. ³³ Nibnega, degi, napnega bela berguoed, ar an-gayaburbadi berguosulid, degisadeguod.

³⁴ "Bemargi na be-dukin salakarmarmo. Mer mas-gunnedginbi be binsadii gumalo. Degine, mumguedginbi, degi, we-napneggi-ibmar-naidginbi mer binsadii be gumalo. Ar degiile, abakalegi, bemar we-ibagan-edarbedisulid ukiarmakale bemargi danikile.

³⁵ "Ar igi ibmar-durgan ibmar-galedgedgi ukiar galedae, deyobi, we-ibagan bela-dulemar-we-napneggi-bukmaladgi ukiar nonikoed. ³⁶ Degisoggu, nue neg-itoagwar be gudii gumar. Gatik Bab-Dummadse gordii gumar. Adi, bemar unnitiba we-ibmar-gudagoedgi be

wakinmalagar, degine, a-ibangangi, Dule-Machi-asabin gwage-swilidik gwichigumogagar.”

³⁷ Jesús, Bab-Dummadse-goled-neggi bane-bane neg-ibgi dulemar-odurdakdii gualid, degine, neg-mutikdi, Olivos'ye-yar-nugadse naddaed.

³⁸ Degine, bela dulemar neg-wakdar Bab-Dummadse-goled-negse, Jesús'se e-odurdaked-itogega nonidamalad.

7. JESÚS-WILEGOED-IBAGAN

22

(22:1-24:12)

7a. Jesús nakrusgi-bioklesokalid-iba

(22:1-62)

Jesús-oburgwemalaga e-isdarmalad igar-amiarmalad

(Mateo 26:1-5, 14-16; Marcos 14:1-2, 10-11; Juan 11:45-53; 13:21-30)

¹ Dakleargu, Madu-Inasuli-Gulleged-Iba warmakdanikid. A-iba, Oburgwilegoenad-Ibaya bilebalid. ² A-ibagan-warmakdanikidgine, dule-irwa-Bab-Dummadse-gormalad-e-dummagan, degi, Garda-Narmaked-Dulemar, igar-amiarmalad, igi-saele Jesús-oburgwemalodibeye. Degi-inigwele, wemar dulemar-dobmarbalid.

³ Degi, nia-saila-Satanás Judas'gi dognonikid. We-Judas'de, Jesús-sapingan-e-ambe-gakabogwad-wargwenad-gued, Iscariote'ye nugbalid. ⁴ Degi, Judas dule-irwa-Bab-Dummadse-gormalad-e-dummaganse, degi, suar-ibmala-e-dummaganse nadegusad. Amarse-modapgu, ega sogdapid, ede Jesús emarga ukoye.

⁵ Judío-dummagan weligwar itosmalad. Judas'gamani-ukega Judas-ebo igar-nabosmarsunnad. ⁶ Geb Judas sogsad, nueganbiye. Degisoggu, Judas, sana Jesús-darba-ukodibeye, binsadii gualid.

Jesús e-sapinganbo napi-sedo-mas-guchad
(Mateo 26:17-29; Marcos 14:12-26; 1 Corintios 11:17-34)

⁷ Madu-Inasulid-Gulleged-Ibagan mosgu, Oburgwilegoenad-Iba-insaega, sibat-wawaad-gunnega sibat-wawaad-oburgwergebed. ⁸ Agine, Jesús, Pedro, Juan-ebo, barmisad. Amarga sogsad: —Anmar-idu be namar. Iba-onogegala ibmar guagwar be imaknamar, adi, agi anmar mas gunmalagar.

⁹ E-sapingan-warbogwad Jesús'ga sogdemalad: —Degite, ¿bia anmar be-idu neg-guagwar imakbi be abege?

¹⁰ Jesús, abin-sogded: —An bega sogmalo, neggweburse be dogdapmalale, dule-wargwen be abingudamaloed. Geb a-dule gwidugi dii-semai be dakdamaloed. A-dule-sorba be namalo. Ar bia dogdapoe, a-neggi bemar dogdapmogoed. ¹¹ A-neg-ibedga be sogmalo: 'Odurdaked-saila sogye: ¿Bia Oburgwilegoenad-Ibagi an-sapinganmala an mas-gunnoed-neg siiye?' ¹² Geb neg-ibed neg-dummad guagwar bato nuesaale niba-aila-birgi bemarga oyogoed. Agi bemar guar anmar-idu mas simaloed.

¹³ Jesús-sapingan-warbogwad nadmarsunnad. Ar igi Jesús emarga sogsa, deyob dakdapmalad. A-neggi ibagi mas-gunmalagala, bela-ibmar guagwar urbismalad.

¹⁴ Degine, masgunned-wachi-mosgu, Jesús mese-naba na e-sapingan-bur-dummagan-warambe-gakabogwadmala (12) signonikid. ¹⁵ Jesús na e-sapinganga sogded:

—Ibiyobi an bemarbo, an-burgwed-iduar Oburgwilegoenad-Ibagi-mas-gulleged an edarbedii gusa. ¹⁶ Ar napira an bemarga soged, we-mas bar an gunnosulid. Bab-Dummad-e-negdakmaidgi geb an gundapbaloed.

¹⁷ Degine, Jesús nog-susgua, dog-nuedye Bab-Dummadga sogsad, a-sorba, sogded:

—We be gobmar, na be mimimar. ¹⁸ Ar an bemarga soged, emigindi, vino'di we-sorba bar an gobosulid, Bab-Dummad-e-negdakmaid-nonikidse geb an gobdapbaloed.

¹⁹ Geb degi, Jesús madu susbalid, dog-nuedye Bab-Dummadga sogsabalid. Geb madu bisge-bisge-imaksagu, e-sapinganga uke-uke imaksad. A-sorba sogded:

—We-madu an-sanad, bemar-ular uklegoedid. Weyob be imakmaloed, adi, angi be binsamalagar. Geb we-madu guchamarsunnad.

²⁰ Mas-guchamalad-sorba, Jesús noggi-vino-siid susbalid. Jesús nog susgua, sogded:

—We-vino, an-ablisad. An-ablis, Bab-Dummad-Israel-Dulemarbo-Igar-Bini-Mesnaid-wilubganad. We-an-ablis, bemar-ular milegoed.

²¹ Ar emigindi, dule-darba-an-ukoeddi we-mesegi an-abargi simogad. ²² Napira an bemarga soged, ani Dule-Machi, ar igi Bab-Dummad bato epenne angi sogsagusa, ar deyob an guoed, an burgoed. Ar dule-darba-an-ukoeddina, nue-wilegoed.

²³ Geb degi, e-sapingan muchub-muchub sogdemalad, wede doa darba Jesús-ukodibeye.

¿Doa bur dule-dummad?

²⁴ Jesús-sapingan na muchub-muchub gaarmalad, ar doa bur emarba dummad guodibeye. ²⁵ Jesús e-sapinganga sogded: “Reymar-neggwebur-semamaidi, dulemargi bur-dule-dummad na san-imakdaed. Degisoggu, bela ega ibmar imakbi abedamarsunnad. Dule-neggwebur-semaid, nued ibmar-imakmaiye na dugin sogdamalad. ²⁶ Ar bemardi deyob guewilubsulid. Bemar-abargi dummadgagudiid dule-bipigwadyob san-imakewilupid. Be dulemar-iduedile, dulemar-maiga be guergebed. ²⁷ Ar ¿doa bur dule-dummad-sunna? ¿Dule mese-naba-sigedi? ¿Dulemar mese-naba-simaladga mas-dakedi? ¿Dule-mese-naba-siid bur-dule-dummadursi? Deyobdo.

”Ar an bemar-dummad-inigwele, bemar-abargi bemar-maiyob an gudiid.

²⁸ ”An-wilubdakleged-abargi, bemar anba gudigudamalad. ²⁹ Degisoggu, igi-Bab-Dummad, ega-negseega, an-nug-imaksa, deyobi ani, an bemar-nug-imakmogad, adi, bemar negsemogagar. ³⁰ Adi, bemar an-negdakmaidgi an-mese-naba mas gunmogagar, degi, gobmogagar, degine, ologan-nuedgi-sii Israel-dorgan-sogambe-gakabogwadga (12) igar-nabosii gumogagar.”

Jesús, Pedro-e-osulogoedgi sunmaksad

(Mateo 26:30-35; Marcos 14:27-31; Juan 13:36-38)

³¹ Dummad-Jesús sogdebalid:

—Simón, Simón, be dake, nia-saila-Satanás trigo-madubur-omukulegedyob-bemar-imakega bemar-egichis gudiid, adi, isguedgi bemar-egwanegar. ³² Ar andi, Bab-Dummadse bega gochad, adi, ulubgi be angi-bensulid mer galakuegar. Unnila ichesaale be angi bangudoed, gannar be anse aibilisale, be-gwenadgan be ogannogo, adi, gatik anba nagumalagar.

³³ Pedro, Jesús-abin sogded:

—Dummad, an beba naegale an guagwar gudiid. An beba esgaryase-melleye sogele, beba an burgweye sogele, an guakwagwad.

³⁴ Jesús, abin-sogded:

—Pedro, an bega soged, gannir-namaked-iduar ilapaa be an-osulogoed.

Jesús sogsad, ibmarmar sedmaloye

³⁵ Jesús e-sapinganga sogded:

—Deunni, sagu suli, mani-seed-sagu suli, degi, sapat suli an be-barmisgu, ¿bemarga ibmar akusmala?

Jesús-abin, sogdemalad:

—Suli. Unniguar anmar ibmar-nikagusmala.

³⁶ Jesús sogdebalid:

—Emisgindi, an bega sogmardo: Dule sagu-nikale, sedo. Mani-urbed-sagu-nikale, sedbalo. Ar dule es-suid sulile, na e-suba uko, adi, amanigi es-suid bakegar. ³⁷ An bemarga sogmalad, ar angi Bab-Dummad-Gardagi-narmakar-naid-sogedba guergebed. Weyob sognaid: ‘Dulemar-isgumaladyob imaklesmogad.’

Isaías 53:12

”Ar deyob angi-narmakar-naidyob guergebed.”

³⁸ Geb degi, e-sapingan sogded:

—Dummad, anmar es-suid-warbo nikmala.

Jesús, abin-sogded:

—Mer bar we-ibmargi sunmakmar.

*Jesús, Getsemaní gi Bab-Dummadse gochad
(Mateo 26:36-46; Marcos 14:32-42)*

³⁹ Jesús neggweburgi-nodgua, Olivos-yarse nadegusad, ar ade, gusgu a-yarse naddaed. E-sapingan eba nade gusmarmogad. ⁴⁰ Emar-nadapidse warmaksamargu, Jesús e-sapinganga sogded:

—Bemar isguedgi-wilubdaklegedgi mer galakumalaga, Bab-Dummadse gormar.

⁴¹ Jesús na e-sapingangi bannabasaar naded. Agi yokorgi sindigar sigisgu, Bab-Dummadse goted. ⁴² Sogded: “Baba, an-idu, ina-gagbid-gobedyob beedse igar-buled-naidgi wilebisur be an-abegele, melle be an-wiogodo. Degi-inigwele, an-sogedbarsuli, unnila be-sogedba be imakoed.”

⁴³ Geb agine, baliwitur-wargwen Jesús-ogannogega nibneg-akar aidenonikid, ese magarononikid.

⁴⁴ Ar Jesús bela-bela nue-surbinsa-itogusgu, bur bule Bab-Dummadse gorsigisad. E-wimakedi abeyob napase dedemaknai gusad.

⁴⁵ Jesús Bab-Dummadse-gorsiid-gwisgusgu, e-sapingan-bukwadse nonikid, daknonikid, bukib-binsamaladba gabmamai. ⁴⁶ Jesús amarga sogded:

—¿Ar ibiga bemar gabmamai? Gwisgumala, Bab-Dummadse gormala, adi, isguedse be wilubdaklearmalar melle galakuegar.

Dule-isdarmalad Jesús-gasmalad
(Mateo 26:47-56; Marcos 14:43-52; Juan 18:1-11)

⁴⁷ Jesús amba e-sapinganga sunmakgwichi, dulemar-bukidar ese duurmaknonikid. E-ambe-gakabogwad-wargwenad-Judas, emar-idudanikid. A-dule Jesús'se warmaknonigu, ega nuedye-sogega ei-wagar unonikid. ⁴⁸ Degi, Jesús ega sogded:

—Judas, ¿wagar-uar, Dule-Machi darba be uke?

⁴⁹ Jesús'ba-gudimalad dakdegu, igi igargan gudagoe, Jesús'ga sogdemalad:

—Dummad, ¿anmar es-suidgi dulemar-eware?

⁵⁰ Jesús amba yoo abin-imake, e-sapin-wargwen dule-irwa-Bab-Dummadse-goled-bur-dummad-e-mai naibi-imaksad, e-uaya-nuedsikid ei siksad.

⁵¹ Geb degi, Jesús ega sogded:

—¡Gusa! Mer bar ese achae.

Geb Jesús dule-uaya-ebusa imaksad, dule-onudaksad. ⁵² Degi, Jesús dule-irwa-Bab-Dummadse-gormalad-e-dummadga, suar-ibmala-Bab-Dummadse-goled-negdakmalad-e-dummaganga, degi, Judío-girmar-dummagan-ese-nonimaladga sogded:

—¿Ibiga bemar dule-ibmar-atursaed-gaeyobi an-bina es-suiganyalaba, suarmarylaba be dan-imala? ⁵³ Bane-bane an bemar-abargi Bab-Dummadse-goled-neggi gudigusgu, gwen be an-gassurmalad. Ar emigindi, bemar-an-gamalaga, ibagan nonikid, degi, nia-sogedba ibmar-imaked-iba nonibalid.

*Pedro, Jesús-osulosad
(Mateo 26:69-75; Marcos 14:66-72; Juan 18:15-18, 25-27)*

⁵⁴ Dulemar Jesús-gasmargu, dule-irwa-Bab-Dummadse-goled-bur-dummad-negse sesmalad. Agine, Pedro bannabasaar Jesús'ba nadap gusad. ⁵⁵ Degi, suar-ibmala neg-imba-abargi soo-ogasmalad, a-dikarba sigismalad. Geb Pedro amar-abargi signonimogad. ⁵⁶ Bunagwa-arbaedi, soo-naba Pedro-sii dakargu, nuu dakded, sogded:

—We-dule Jesús'ba gudigusmoga.

⁵⁷ Pedro osulosad, sogded:

—Bunagwa, we-dule aku an dake.

⁵⁸ Degi, doga-nadsuli, dule-baid Pedro-dakarmogad, ega sogdemogad:

—Be-dule amba Jesús-sordamogad.

Pedro, abin-sogded:

—An a-sordasuli.

⁵⁹ A-wachi-irgwen-nasad-sorba dule-baid sokarmogad:

—Nabiri, we-dule Jesús'ba gudigusmoga. Be dake, Galilea-dolad.

⁶⁰ Geb degi, Pedro sogded:

—An wissuli ibugi be anga sunmakgwichi.

Pedro amba sunmakgwichidgi gannir namakalid. ⁶¹ Geb degi, Dummad-Jesús, Pedro-dakdegu, Pedro, ebinsaas-naded, igi Jesús ega ibmar sogsa: “Gannir-namaked-iduar ilapaa be an-osulogoye.” ⁶² Degi, Pedro magaba nodgu, ise-boar naded.

7b. Jesús-wilesad, degi, e-burgwisad
(22:63-23:56)

Dulemar Jesús'gi dodosmalad
(*Mateo 26:67-68; Marcos 14:65*)

⁶³ Dulemar-Jesús-mer-wakinnega-edarbebukmalad Jesús'gi dodoarmalad, degi, Jesús-sarsoarmarbalid.

⁶⁴ Ei-ibya edichamargu, wagargi bibyosdamalad, geb ese egichiardamalad:

—Degite, soge, ¿doa be-bibyosa?

Jesús'di gwen dulemar-abin-imakdasulid.

⁶⁵ Degine, dulemar Jesús-nug-ichoegala, bukidar egi sunnasur sunmakdemarbalid.

Jesús igar-nabiromalad-dummagan-asabin sesad
(*Mateo 26:57-68; Marcos 14:53-65; Juan 18:19-24*)

⁶⁶ Neg-oibosgu, Judío'mar-girmar-dummagan-neggwebur-sedimalad, dule-irwa-Bab-Dummadse-gormalad-e-dummagan, degi, Garda-Narmaked-Dulemar ambikunonimalad. Geb degi, igar-nabiromalad-negse Jesús-senonimalad.

⁶⁷ Geb agi ese egichiarmalad:

—Anmarga be soge: '¿Be Cristo?'

Jesús, amar-abin sogded:

—Ar an bemarga sogdele, an Cristo'ye, be an-itossurmalaled. ⁶⁸ Deginbali, an bemarse ibmar egichidele, bemark an-abin imaksasurmalaled, degine, be an-onossurmarbaliled. ⁶⁹ Ar emigindi, ani Dule-Machi, dummadga-guega, Bab-Dummad-Bela-Gangued-Nikad-e-argan-nuedsik sigidapoed.

⁷⁰ Bela ega sogdemalad:

—Degisoggu, ¿be Bab-Dummad-Machisunde?

Jesús, abin-sogded:

—Ar bemark-sunnagwad bato sognanaid.

⁷¹ Geb na sogdemalad:

—¿Ar ibiga dule-baid anmarga Jesús'gi bar ibmar-sogbi an abemarsunna? Ar anmar-sunnad na-dukin-sogsad itosmalad, ede, Bab-Dummad-Machiye.

23

Pilato, Jesús'ga igar-itosad

(Mateo 27:11-26; Marcos 15:1-15; Lucas 23:13-25; Juan 18:28-19:16)

¹ Geb degi, bela-dulemar-igar-itobukmalad ainidmargu, Pilato'se Jesús-sesmalad, adi, ega igar-itogegar.

² Geb degi, Judío-dummagan weyob Jesús'gi sog-nai guarmalad:

—Anmar we-dule dulemar-binsaed-gadii itosad, sogdii, mer Roma-Dummad-César'ga mani ukoye. We-Jesús na dakin sogdiid, ede reyye, ede Cristo'ye.

³ Geb degi, Pilato Jesús'se egichialid, ega sogded:

—¿Ar be Judío'mar-e-Rey?

Jesús, abin-imakdegu, sogded:

—Ar bede soged. Napirado.

⁴ Degine, Pilato, dule-irwa-Bab-Dummadse-gormalad-e-dummaganga, degi, dulemar-bukmaladga sogded:

—An dakgua, we-dule gwen ibmar-oakalossur an daked.

⁵ Ar dulemar bur bule sogdemalad:

—We-Jesús dulemar-oimakdiid. Bela Judea-yalaganba dulemar-odurdakdiid. Galilea-akar onoalid, emide, wesegus naid.

⁶ Geb degi, Pilato itoargu, dulemar soge, we-dule Galilea-akar noarye, egisdesunnad:

—¿We-dulede, Galilea'ginedi?

⁷ Pilato itoargu, Herodes-negdakmaidgi Jesús daniki, Herodes'se barmissunnad. Ar ade, deun Herodes Jerusalén-negweburse gudimogad.

Herodes, Jesús'ga igar-itosad

⁸ Herodes, Jesús-dakargu, weligwar itosad. Ar ade, dikasurgus Jesús-dakbigudiid. Degi, Herodes'de, dulemar Jesús'gi-bukidar-sunmaked itodiid. Degisoggu, Herodes binsadsunnad, Jesús e-wagab ibmar-dakledisulid ega imakoergebye.

⁹ Herodes, Jesús'se bukidar ibmar-egisnai gualid. Ar Jesús'di gwen abin-imaksasulid.

¹⁰ Degine, dule-irwa-Bab-Dummadse-gormalad-e-dummagan, degi, Garda-Narmaked-Dulemar Herodes'ga gannar-gannar Jesús'gi sunmaknanai guarmalad.

¹¹ Geb degidbali, Herodes, e-suar-ibganmala, ibgwensur Jesús-dakded, egi dododed. Reymaryob ega mor-nued yosmarsunnad. Geb degi, Herodes, gannar Pilato'se Jesús-barmisad.

¹² A-ibagine, Pilato, Herodes-ebo gannar ai-nuedga gunonikid. Ar ade, iduardi ebo urwedi-malanad.

Pilato Jesús'ga igar-mesisad, oburgweye

(Mateo 27:15-26; Marcos 15:6-15; Juan 18:39-19:16)

¹³ Geb degi, Pilato, dule-irwa-Bab-Dummadse-gormalad-e-dummaganse, negsemamaidse, degi, bela-dulemarse, gochad. ¹⁴ Geb amarga sogded:

—We-dule-be-anga-senonimalad, egi be anga sognonimalad, we-dule, neg-gagadiiye. Ar bemar-wagab an ese ibmar egichisad. Degite, we-dule neg-ichodiiye bemar sogedi, gwen an deyob daksulid. ¹⁵ Ar Herodes'bela gwen-neg-oakalossuli daksamogad. A-ulale, gannar anse we-dule barmialid. Degisoggu, Jesús gwen-neg-oakalossursoggu, oburgwilegewilubsulid. ¹⁶ Unnila an nue-sabsur-odurdakoed. A-sorba, an we-dule onogoed.

¹⁷ Ar ibagi, gusgu Pilato'de igar-maidba dule-wargwen-esgaryagi-mellesiid onodaed.

¹⁸ Ar dulemar-bukidar-bukwaddi bela dule-wargwennayob oimakdemalad, sogdemalad:

—¡We-Jesús be oburgwe! ¡Barrabás be anmarga onoge!

¹⁹ We-Barrabás'de Jerusalén'gi, Roma-dulemargi gwisgusad-ular, degi, dule-oburgwisbalid-ular, esgaryagi metegusmalad.

²⁰ Pilato Jesús-onobiedba idu-sogsadyobi gannar dulemarga sogdebalid. ²¹ Ar dulemardi oimakdemarbalid:

—¡Nakrusgi bioke! ¡Nakrusgi bioke!

²² Geb Pilato gannar ilapaagi dulemarga sogdebalid:

—Ar degite, we-dulede, ¿ibu-ibmar-isgana-imaksa be dakmarsunna? Ar gwen ibmar-isgana imaksasur an daked. Degisoggu, oburgwilegewilubsulid. Unnila an nue-sabsur-odurdakoed. A-sorba, an we-dule onogoed.

²³ Ar dulemardi binnasuli oimakdemalad, nakrusgi Jesús-biokye, sogdemalad.

Ar degite, dule-irwa-Bab-Dummadse-gormalad-e-dummagan, degi, dulemar-oimakbukwad-sogedba bur imaklesad.

²⁴ Geb degi, Pilato dulemar-egisbukwadba imaksasunnad, Jesús'ga nakrusgi-oburgwed-igar mesissunnad.

²⁵ Pilato, dulemarga, Barrabás-Roma-dulemargi-gwisgusadi, emar-oburgwisad-ular-esgaryagimellesiid, onossunnad. Geb Pilato suar-ibmalaga Jesús-uksasunnad, adi, dulemar, e-itolegedba Jesús-imakmalagar.

Nakrusgi Jesús-bioklesad

(Mateo 27:32-44; Marcos 15:21-32; Juan 19:17-27)

²⁶ Roma-suar-ibgan Jesús-sesmargu, dulewargwen Jerusalén'se-dani abinguarmalad. We-dulede, Cirene'ginedid, Simón'ye nugad. Gandikidgi a-dule-gasmalad, agine, e-gukingi nakrus-mesismalad, adi, Jesús-sorba nakrus-semai guegar.

²⁷ Dulemar-bukidar Jesús-sorba duurmaknadap gusmalad. Omegandi, Jesús'ga bonadapi, degi, bukib-binsaedba ega oimaknadapi gusmalad.

²⁸ Jesús omegansik aibiridgua, amarga sogded:
 “Omegan-Jerusalén'ginmalad, mer anga be bomar. Na dukin be bomar, be-mimmiganga be bomar. ²⁹ Ibagan nonikoed, dulemar sogdamaloed:
 ‘Omegan-geg-mimmi-nikumaladgi ise-nued binsalesye.
 Omegan-gusgu-muu-neggi-geg-gurgin-nikumaladgi ise-nued binsalesye.

Degi, omegan-mimmigan-onussurmaladgi
ise-nued binsalesye,' sogdamaloed.

'Ar we-omegandi na-e-mimmiganba
gwen wilegosulid.'

³⁰ Geb degi, dulemar sabsur-wilenaibba
yarmarga sogdemaloed:

'iBe anmargi batedage!'

Yar-mulluganga sogdemaloed:

'iBe anmar-omursunna!'

Oseas 10:8

³¹ "Anbela an gwen-neg-oakalossulid-inigwele,
weyob an-imaknanaid. Dule-neg-oakalosar-
bulesunna, bur bule wiomalodo."

³² Suar-ibgan dule-isganamar-warbo
oburgwemalaga Jesús'ba semai gusmarbalid.

³³ Nonogarye-neg-nugadse mosmargu, agi
nakrusgi Jesús-bioksamalad. Dulemar-isgana-
warbogwad nakrusgi bioklesmarmogad.
Wargwen, Jesús-argan-nuedsik ogwichismalad.
Baiddi, Jesús-argan-sapiledsik ogwichismalad.

³⁴ Degi, Jesús sogded:

"Bab-Dummad, we-dulemar isgussuliyob be
dako, ar wissurmalad ibu imaknanai."

Degi, suar-ibgan Jesús-morgi dodoarmalad,
wilubdaknai-guarmalad, igid-mor emargadga
guodibeye. A-sorba, Jesús-mor mimismarsunnad.

³⁵ Degine, dulemar-bukidar neg-gunaid
dakbukwa gusmalad. Ar neggwebur-
dakmamaidi, Jesús'gi dodonai gusmalad,
sogdedamalad:

—Ar ede, dule-baigandi nabir bendaksad. Ar we
Cristo'le, Bab-Dummad-susadile, na dukin ben-
dakdo.

³⁶ Amba suar-ibgan Jesús'gi dodonanai gusmar-mogad. Geb gobega, vino-gagbid ega senonimalad, ³⁷ ega sogdemalad:

—Ar be Judío'mar-e-Reyle, na be dukin bendakdo.

³⁸ Jesús-nakrus-birgi, Griego-gayaba, Latín-gayaba, degi, Hebreo-gayaba, weyob narmakar-nai gusad:

WE-JESÚS

JUDÍO'MAR-E-REYD.

³⁹ Dule-isgana-wargwen, Jesús-dikarba-nakrusgi-biokar-naimogad, Jesús'gi isdar-sunmaknai gusmogad, ega sogded:

—Ar be Bab-Dummad-dule-yoedse-barmidagoye-sogsad-dulesursi. Degite, na be dukin bendake. Be anmar-bendakmoga.

⁴⁰ Agine, nakrusgi-biokar-naid-baid, Jesús'gi isdar-sunmaknaid-abin-imakded, ese uluded, ega sogded:

—Ar Jesús-sunnaa be burgwe-sognaimogad. Degite, ¿be Bab-Dummad-dobsurde? ⁴¹ Ar anmardi nabiridba wilenaid. Ar anmardi, ibmar-isgana-imaksadba odurdaklenaid. Ar we-duledi, gwen ibmar-isgana imaksasulid.

⁴² Geb degi, Jesús'ga sogded:

—Be Reyga-negdakmaidgi-danikir, be an-insao.

⁴³ Geb degi, Jesús, abin-sogded:

—Napira an bega soped, emi-ibagi Neg-Nued-naidgi be anba gudiguoed.

Jesús nakrusgi-nai burgwisad

(Mateo 27:45-56; Marcos 15:33-41; Juan 19:28-37; Hebreos 9:1-28)

⁴⁴ Degine, yorukugusgua, bela napneggi negsichid nagusad, wachi-irbaase naigusad.

⁴⁵ Degine, dad-ibeler gwen bar gassulid. Jerusalén'gi Bab-Dummadse-goled-neggi, Neg-Islidikid-irwa-mor-naid, negabar achirmakde gusad.

⁴⁶ Geb degi, Jesús binnasur goted, sogded:

“Baba, be-argangi an-san-burba an uksun.”

Deyob-sogsad-sorba, Jesús burgwided.

⁴⁷ Roma-sorda-dulatar-sediid (100), weyob-ibmar-gusad daksagu, Bab-Dummad-nug ogannoded, sogded:

“Ar we-dule, dule-nueddaed-napiragwadid, gwen-ibmar-oakalossulid.”

⁴⁸ Bela dulemar-bukidar, Jesús nakrusgi-burgwenaid-dakbukmalad, bela we-ibmargan-gusad daksamargu, bela-bela na bukib binsadmalad, na dukin-dukin binasgargi sarsonianai negse nadmalad.

⁴⁹ Ar bela Jesús-mag-dakmaladi, degi, omegan-Galilea-akar-eba-bipirmakdimaladi, bannaba we-ibmar-gunaid-dakbukwa gusmalad.

Jesús-diglesad

(*Mateo 27:57-61; Marcos 15:42-47; Juan 19:38-42*)

⁵⁰ Deun, Judío-igar-nabiromalad-wargwen, José'ye-nugad mai-gusmogad. A-dulede, Arimatea-neggweburginedid, Judea-yalad-dolad. José dakleargu, dule-nuedid, dule-igar-napiragwadbadaed-duled. ⁵¹ We-dulede, Bab-Dummad-e-negdakmaid nue edarbedimogad-duled. José'di, Jesús-oburgweye sogsamaladba

gwen naigussulid, degine, emar-ibmar-
imaksamaladba gwen akassurbalid.

⁵² We-dulede, Pilato'se nadebusad, Jesús-mui
egisdapid. ⁵³ José, Jesús-nakrusgi-burgwar-naid
odesgu, atued-sibugi nue-obipirmaksad. Geb
degi, José akwa-gwisar neg-uanga-siid-yaba, yoo-
dule-egi-diglegedgi Jesús-mesisad.

⁵⁴ Deun, a-ibagi, Ibmar-Guagwar-Sied-Ibad,
bato obunnoged-iba warmakdanikid.

⁵⁵ Omegan-Galilea-akar-Jesús'ba-
danigusmalad, José-Arimatea-sorba nadebusmalad.
Neg-uan-siid daksamalad, degi, Jesús-diglesad
bia mesilesad daksamarbalid. ⁵⁶ Omegan
negse-nonimargu, ina-biseb-wawaad, degine,
gwallu-wawagwad-nuegan guagwar urbismalad,
adi, Jesús-muigi eonamalagar. Geb degine,
omegan Moisés-Igar-Maidba obunnoged-ibagi
obunnosmarsunnad.

24

7c. Jesús gannar-durgusad

(24:1-12)

(Mateo 28:1-10; Marcos 16:1-8; Juan 20:1-10)

¹ Itoged-iba-gebe-nagudedgine, wakudaryalaba
omegan neg-uanse nadmalad. Gwallu-
wawagwad-guagwar-imaksamalad sesmalad.

² Omegan neg-uanse-mosmargu, bato akwa-
dummad-neg-uan-yawagakgi-siid ainirar-sii
dakdapmalad.

³ Neg-uan-yaba dogdemargu, Bab-Jesús-e-mui
sate dakarmalad.

⁴ Jesús-mui-satedbali, omegan aku itobukmalad,
wede igi gusa. Agine, machergan-warbo,

mola-sibu-ise-dakar-dakargaed-yoimalad ese gwisgunonimalad. ⁵ Ar omegan nue dobe itomaladbali, napase e-bebe-ebulegedse dulluu imaksamalad. Machergan-warbogwad omeganga sogded:

“¿Ar ibiga bemar dule-burgwarmalad-abargi dule-dula-gudiid be amimala? ⁶ Wegi bar maisuli, gannar durgusa. Ar Jesús amba Galilea’gi-gudigu, igi bemarga sunmaksa, a be insamala. ⁷ Deun, Jesús bemarga sogsagusmalad: ‘Ani Dule-Machi, dulemar-isgudimaladse an uklegergebye, nakrusgi an bioklegergebye, degi, ibapaagi an gannar durguergebye.’ ”

⁸ Geb omegan Jesús-ibmar-sogsad ebinsadmalad.

⁹ Omegan-neg-uanse-gudimalad nonimargu, bela ibmar-gusad Jesús-sapingan-ambegakagwensakadga (11), degi, bela dule-baiganga, sogsamalad. ¹⁰ Omegan Jesús-e-sapingan-burdummaganga ibmar-sognonimaladi, wemalad: María-Magdalena, Juana, María Jacobo-e-nan, degi, omegan-baigan-eba-gudimalad. ¹¹ Ar Jesús-sapingandi omegan-ega-ibmar-soged itossurmalad, binsa ee gordii daksamalad, egi bengusmalad.

¹² Ar Pedro’di neg-uanse abarmakde gusad. Neg-uan-mosgu, yaba atakdegu, atuedbi bukwa daksad. Ar Pedro weyob-ibmar-gusad geger daksad, gannar negse aligusad.

7d. Jesús durgusad-sorba ibmar-imaksad

(24:13-53)

*Jesús eba-naimalad-warbose Emaús-igarba mag-
arosad*

(Marcos 16:12-13)

¹³ Deginé, amba a-ibagi dulemar-Jesús'bananaimalad-warbo Emaús-neggweburse nadap gusmalad. A-neggwebur Jerusalén'gi wachi-irbonanalegedgi egi siid.

¹⁴ Amar-ebogwadi bela ibmarmar-gusadgi sunmaknadap gusmalad. ¹⁵ Degi-muchub-muchub-sunmaknadapmaladgine, Jesús-sunnad ese war-maknonikid, eba nade gusmogad. ¹⁶ Ar wemar-warbogwad aku Jesús-dake gusmalad. Ar ade, Jesús-dakega emar-ibya bargalesad.

¹⁷ Jesús amarga sogded:

—¿Ibigi be sunmaknadapmala? ¿Ibige be bukib itomarwali?

¹⁸ Gwensak, Cleofas'ye-nugadi, abin sogded:

—¿Ar bebi wegi Jerusalén'gi bela emi-ibmar-gusad wissurde?

¹⁹ Geb Jesús, abin-sogded:

—¿Ibu-ibmala?

Geb abin-imakdemalad:

—Jesús-Nazaret'ginedgi bela-ibmarmar-gusad ¿be wissursi? We-Jesús Bab-Dummad-gayaburba-barsoged, gandikidba nued Bab-Dummad-asabin, degi, dulemar-asabin ibmar saed. Degi, gandikidba-sunmaked-dulebalid.

²⁰ Deginé, dule-irwa-Bab-Dummadse-gormalad-e-dummagan, degi, anmar-neggwebur-dakmamaid Roma-dummadga Jesús-uksamalad, adi, oburgwemalagar. Geb nakrusgi Jesús-bioksamalad.

21 "Ar anmardi we-Jesús'gi, Israel-dulemar-abonogoedye binsadii gusad. Emide, ibapaagus deyob neggusad-akalad.

22 "Ar omegan-anmar-abargi-bipirmakdimarmogadi, geger-ito anmar-imaksad. Ar a-omegande wakudaryalaba neg-uanse nadegusmalad, 23 degi-inigwele, Jesús-mui neg-uangi amissurmarlad. Degisoggu, gannar anmarse nonimargu, anmarga sognonimalad, emarde ibya apurusmarye, baliwiturmar-daksamarye. A-baliwiturmar ega sogsamarye, Jesús dula gudiye.

24 "Degine, a-sorba, abala anmar-sordamar neg-uanse nadegusmarmogad. Ar igi-omegan-sogsamala, deyob dakdapmalad. Gwen-Jesús dak-sasurmarmogad."

25 Geb degi, Jesús amar-warbogwadga sogded:
—Bemar akusunna itomalad. Bemar Bab-gayaburba-barsogmalad-sogsamalad-bengumalad-dulemarbalid. 26 Ar Cristo'de nibnegse dummadga-megnaed-iduar bela-bela weyob wilegergebed.

27 Geb Jesús we-dulemarga Bab-Gardanarmakar-maidba egi-sunmaklenaid bela sogsad. Moisés-sogsad-narmakar-naidgi onoded, degi, bela Bab-Dummad-gayaburba-barsogsamalad egi-sogsamaladse ega ibmar sogsad.

28 Neggwebur-nadapmaladse warmak-samargu, Jesús'di yamo nadegusaeyob imaksad. 29 Ar emar-warbogwad Jesús'gi ise-alamaknai gusmalad, ega sogdemalad:

—Anmarba be beeye, bato neg sedogusyey, bato neg mutikgudaniye.

Degisoggu, Jesús, emarba bessunnad. ³⁰ Degi, mas-gunnega mese-naba sigdemargu, Jesús madu-susa imaksad. Geb Bab-Dummadga dog-nuedye-sogsagu, madu bisge-bisge imaksad, geb emarga uksad. ³¹ Geb degi, e-warbogwad Jesús-mag-dakdemalad. Degi-sii emar-idu binnided, gwen bar daksasurmalad.

³² Geb degi, ebogwad na muchub-muchub sokarmalad:

“Anmarga igarba Bab-Dummad-Gardagi sunmakdanigu, anmar-gwagede, ¿nue-weligwar itodani-gussursi?”

³³ Wemar-warbogwad a-gines, a-wachigi, gannar Jerusalén'se aligusmalad. Jerusalén'se nonimargu, Jesús-sapingan-ambe-gakagwensakad (11), degi, dulemar-baigan-eba-bukmarmogad danar-bukwa daknonimalad, ³⁴ sogbukmalad:

—Ar Dummad-Jesús nue-gannar durgusyey, Simón'se Jesús magarosyey.

³⁵ Geb emar-ebogwadi, e-sordagan-bukmaladga sogsamarmogad, igi-igarba gusmala, degine, igi-emarde Jesús madu-bisge-bisge-imaksagu, magar daksamala.

Jesús, e-sapinganse magarosad

(Mateo 28:16-20; Marcos 16:14-18; Juan 20:19-23)

³⁶ Jesús-sapingan amba we-ibmar-gusadgi sunmakbukmala, Jesús emar-abargi gwisgunonikid. Amarga sogded:

—¡Na, degite! Ulubgi bogidik be gudii gumarsun.

³⁷ Abin bela-bela gwakidmalad, nue-dobe itod-malad, emarde sergan-dakye bimalad. ³⁸ Ar Jesús'di amarga sogded:

—¿Ar ibiga be nue-dobe itomarsunna? ¿Ibiga be beneyob itomarsunna? ³⁹ An-argan be dak-mala, an-nag be dakmarbali. Ar amba an-sunnad an gued. Be an-dakmar, be an-ebumar, ar an-sunnad an gued. Ar burbadi san sulid, garmar surbalid. Ar andi san nikad, garmar nikbalid. Be an-dakmalana.

⁴⁰ Deyob-soggwichidgi, emarga e-argan, degi, e-nag oyoded. ⁴¹ Ar e-sapingandi yeer-itogedbali, degi, weligwaledbali, Jesús-durgusad geger dak-malad. Degisoggu, Jesús amarga sogdesunnad:

—¿Masgunned be wis nikmala?

⁴² Geb ega ua-naraled bisgar uksamalad. ⁴³ Jesús e-sapingan-annik susgua, amar-asabin guchad.

⁴⁴ Jesús amarga sogded:

—Amba an bemarkar-abargi gudigu, bemarga bato weyob an sogsad: 'Moisés-Igargi-Angi-Narmakar-Maidi, bela angi guergebye. Degi, Bab-gayaburbarbarsogmalad-angi-narmaksamaladba, degine, Salmos'gi angi-narmakar-maidba bela angi guergebye an bemarga sogsamalad.'

⁴⁵ Degisoggu, Jesús Bab-Dummad-Gardagi-ibmar-sognaid e-sapingan-magar-itogega imaksad.

⁴⁶ Jesús amarga sogded:

“Weyob-narmakar-naid: ‘Cristo wilegergebye, ibapaagi gannar durguoye. ⁴⁷ Degine, bela we-
napneg-naid-ugakaase angi sunmaklegoye. Adi,

na dulemar e-isguedga-bukib-binsamalagarye, e-daed ogwamalagarye, degidbali, Bab-Dummad dulemarga isgued elinonikoye. We-igarmargi sunmaklegedi Jerusalén-akar onodoye sognaid.'

⁴⁸ Ar bemark-sunnad we-igargan-angi-gusad dak-samarsoggu, baiganga bemark sogmarmogo.

⁴⁹ "Emide, an-Bab bemarka sogsagusad, an bemarka ukoye, a an bemarka barmidagoed. Jerusalén-neggweburgi be edarbemalo, nibneg-akar burba-gangued bemarkse nonikoedse."

Jesús, nibnegse nakwid gusad

(Marcos 16:19-20; Gusmalad 1:6-11)

⁵⁰ Degi, Jesús, Betania'se e-sapingan sesagusad. Agi na e-argan niba-onakwidgu, e-sapingangi ise-nued binsasad.

⁵¹ E-sapingangi-ise-nued-binsagwichidgi, Jesús emargi banguded, nibnegse nakwide gusad.

⁵² Geb e-sapingana, Jesús-nug-ogannodmalad. Nue-weligwaledba gannar Jerusalén'se aligusmalad. ⁵³ Bab-Dummadse-goled-neggi gudigudamalad, Bab-Dummad-nug-ogannodii, degi, Bab-Dummadgi-nued-binsabukwa damalad. Be itomargua.

Bab-Dummad-Garda-Islidikid
The Holy Bible in the San Blas Kuna language of
Panama
La Santa Biblia en el lenguaje de San Blas Kuna de
Panamá

copyright © 2014 Wycliffe Bible Translators, Inc.

Language: San Blas Cuna (San Blas Kuna)

Translation by: Wycliffe Bible Translators, Inc.

Copyright Information

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Kuna, San Blas

© 2014, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

clxi

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-03-31

PDF generated using Haiola and XeLaTeX on 21 Feb 2024 from source files dated 29 Jan 2022

eb5c3a84-7a8b-5f2f-8344-21a6af7506b8